

## Madiu

### *Buki ana alamani weaqina*

Madiu wese ana wawa Libai. Tauna Diu 'olotona, ta ena fewa takesi 'ewa'ewa dadana me Diu 'idiega Loma gabemani weaqidi. Ba'e 'iuna 'inega me Diu Madiu ge ida 'awahaqiaqiea, ta Ieisu nuakokoloyea 'inega gabei mai 'inaya ta 'abibodea.

Buki ba'e Ieisu Valena weaqina Madiu 'wayavia ena tomotauyavo me Diu weaqidi. 'Inega yani qabuna Ieisu ena vi'oi 'inega be tautauya ana laba ya'itoto 'evivi 'aligea weaqina 'wayavia 'idia. 'Inega ena ve'ita waiwaina be, ena viaqa 'ebenuavoqana be waiwaidi ta wese ena 'aliga 'etoluai 'inaya weaqina simana 'ifoqeyedi ena 'wayavi qabuna 'idiega.

Ibeliu bonadiega Yaubada Natuna igabea To'etoyavua (Mesaia) ta Guliki bonadiega ana alamani Keliso. Tauna Mesaia nana me Diu iba'eba'eyea vonigo totutaya namai be na'etoyavuidi Loma gabemani edi luvine waiwaina 'inega. Me Diu edi tovanugwetayavo Ieisu ena mai 'iuna ivemwageyeya, ta wese tomotau qabudi nuadi voqana. Ta Madiu nuanuana ena tomotauyavo nave'itedi Ieisu tauna vonahaqiaqi Keliso, me Diu edi Toluvine Qiduana, 'inega simana 'idia Ieisu ena 'evivi mai ana tuta 'inaya na'ifoqe kavona Kini 'idewani.

Ta wese vaina vona fofofola nugwenugweina 'inamedi Yaubada ena venua'ivina weaqina, ta vona diavona adi aqiaqi ve'ifoqeyea Ieisu 'inega.

Madiu vaina yani 'ena'ena'ina weaqidi 'wayavia 'idewani Ieisu ena ve'ita ve'aidega weaqina Yaubada ena yo'o gamonaya. Ta wese ena vona sesebai 'eala 'wai'waividi tomotau edi lugu mahala ena 'Ebeluvine gamonaya weaqina.

### **Buki gamona**

1:1-2:23 Ieisu Keliso tubunavo ta wese ena vi'oi weaqina

3:1-12 Ioni Togivebabitaiso ena viaqayavo

3:13-4:11 Ieisu ena babitaiso ta wese ana sitonova

4:12-18:35 Ieisu ena viaqayavo tomotau nuania di'we Galili 'inaya

19:1-20:34 Ieisu Galili nogea ta tauya Ielusalema 'inaya

21:1-27:66 Ieisu ena wiki 'ebelu'ovoa

28:1-15 Ieisu ena ya'itoto 'evivi 'aligege ta wese ena 'ifoqe tomotau 'idia

28:16-20 Ieisu ana tovetumaqanayavo adi veyoveyoya neidi

### *Ieisu 'aqegiginavo*

*(Luke 3:23-28)*

<sup>1</sup>\* Ba'e Ieisu Keliso ena gadeyavo. Tauna Deibida ena gade 'inega, ta Deibida nana tubuna Ebelamo.

<sup>2</sup>'Inega ba'e 'edewani:

Ebelamo natuna Aisake,  
ta Aisake natuna Iakobo,  
ta Iakobo natuna Iuda ma tainavo ivi'oi.

<sup>3</sup>\* 'Inega Iuda nana natunavo Felesi ta Sela,  
ta inadi Temali.  
Felesi natuna Esiloni,

---

\* **1:1:** 1Yani 17:11; Nug 22:18      \* **1:3:** Nug 38:29-30; Lud 4:18-22

- ta Esiloni natuna Lemi.  
 4 'Inega Lemi natuna Aminadaba,  
 ta Aminadaba natuna Nasoni,  
 ta Nasoni natuna Salimoni.  
 5 \* 'Inega Salimoni moqanena Leabi ta natudi  
 Boasa,  
 ta Boasa moqanena Ludi ta natudi Obedi,  
 ta Obedi natuna Iese,  
 6 \* ta Iese natuna Deibida, tauna toluvine qidu-  
 ana.  
 Ta Deibida nana Ulaia wada'ena Betisiba vaqidi,  
 'inega natudi ivenatunea Solomoni,  
 7 be Solomoni natuna Lioboama,  
 ta Lioboama natuna Abaya,  
 ta Abaya natuna Asa,  
 8 ta Asa natuna Iosefata,  
 ta Iosefata natuna Iolama,  
 ta Iolama natuna Usaia.  
 9 Ta Usaia natuna Iotama,  
 ta Iotama natuna Easa,  
 ta Easa natuna Esekaia,  
 10 ta Esekaia natuna Manasa,  
 ta Manasa natuna Emoni,  
 ta Emoni natuna Iosaia,  
 11 \* ta Iosaia natuna Iekonaia ma tainavo, taudi  
 edi tutaya me Babiloni imai me Diu iluqo-  
 qonidi itauyedi Babiloni 'inaya.  
 12 \* Tuta nana Babiloni 'inaya itoatoa,  
 'inega Iekonaia natuna Salatieli vi'oi,  
 ta Salatieli natuna Selubabela,  
 13 ta Selubabela natuna Ebiuda,  
 ta Ebiuda natuna Eliakimi,

---

\* **1:5:** Lud 4:13-17    \* **1:6:** 2Sam 12:24    \* **1:11:** 2Kin 22:1-24:20;  
 2Yani 36:10; Iel 27:20    \* **1:12:** Esa 3:2

- ta Eliakimi natuna Esoli,  
<sup>14</sup> ta Esoli natuna Sadoka,  
 ta Sadoka natuna Akimi,  
 ta Akimi natuna Eliuda,  
<sup>15</sup> ta Eliuda natuna Eliesa,  
 ta Eliesa natuna Matani,  
 ta Matani natuna Iakobo,  
<sup>16</sup> ta Iakobo natuna Iosefa, tauna Meli moqa-  
 nena, ta Meli natudi Ieisu, ta Ieisu tauna iga-  
 bea To'etoyavua.
- <sup>17</sup> Ta Ebelamo 'inega kana avodi namai Deibida  
 'inaya lagata 14 adi yau i'ifoqe, ta wese Deibida  
 'inega be tuta nana me Babiloni me Diu iluqo-  
 qonidi itauyedi Babiloni 'inaya wese lagata adi  
 yau 14 i'ifoqe, ta edi toa nana Babiloni 'inaya be  
 ana laba Ieisu ena tutaya wese lagata adi yau 14.

*To'etoyavua Ieisu ena vi'oi*  
*(Luke 2:1-7)*

- <sup>18</sup> \* Ieisu ena vi'oi ba'e 'idewani 'ifoqe: Ieisu  
 inana Meli ta Iosefa maega igwaledi ta nawale  
 'wafina ge dagitonovi, ta Meli vebaea tawa vala-  
 gata Niboana Gwalagwalana 'inega.
- <sup>19</sup> 'Inega Iosefa nuana vita. Ta ena  
 ilivu tunutunuqina, 'inega ge nuana Meli  
 nagiveiniyauyauyei ta 'esi 'waivega nuana  
 vonigo Meli nanogea.
- <sup>20</sup> Nawale Iosefa nuana 'ivi'ivina noga weaqina,  
 'inega velovelovana 'inaya ve'wayoqega Yaubada  
 ena tovale'ewa 'ifoqe 'inaya vonaya, "Iosefa, o'a  
 Deibida tubuna, ge una nuavita Meli ena valagata  
 weaqina, mana bena'ena Niboana Gwalagwalana

---

\* **1:18:** Lk 1:27,35

ena waiwaiega valagata, 'inega una 'ebe'ewea moqaneu.

21 \* Nawale natuna me'olotona navi'oi ana wawa una gabea Ieisu, mana tauna ena tomo-tauyavo edi luveifana 'inega na'etoyavuidi."

22 Yani ba'e 'ifoqe be navevona aqiaqi, mana lova taha tovesimasimana Yaubada ena vona Buki Nugwenugweina gamonaya 'wayavia von-aya,

23 \* "Iahaba matayauyona navalagata be natuna me'olotona navenatunea ina gabea ana wawa Imanueli."

Ta wawa nana ana alamani "Yaubada ita'a maega".

24 'Inega Iosefa 'enovila ta Yaubada ena tovale'ewa ena vona vetumaqanea, 'inega Meli maega ivaqi ta 'ebe'ewedi tauyedi ena vanuea.

25 \* Ta Iosefa Meli 'wafidi ge dagitonovi ana laba iuweta, 'inega Iosefa gwama nana gabea ana wawa Ieisu.

## 2

### *Toalamani qidduquadi Ieisu ivayausia*

1 Ta Ieisu vi'oi 'abaga Bedeliema 'inaya di'we Iudia ena 'ebeluvine gamonaya, Elodi ena tuta vetoluvine 'inaya. 'Inega vaina toalamani qidduquadi baba'au ena 'ebeyayagega imai 'abaga qidua ana Ielusalema 'inaya ivetala'aiea ivonaya,

2 \* "Ma'inaya me Diu edi Kini vauvauna toatoa? Ahalamania tawa vi'oi mana ana 'wadima a'itea

---

\* 1:21: Lk 1:31; 2:21    \* 1:23: Ais 7:14    \* 1:25: Lk 2:21    \* 2:2: Naba 24:17

baba'au ena 'ebeyayaqega vanemai. 'Inega amai sabi iwa'odu 'inaya."

<sup>3</sup> Ta tuta nana Elodi edi vona noqolia 'inega nuna vita, ta wese me Ielusalema qabudi giwalidi a'ala ba'e vona nana weaqina.

<sup>4</sup> 'Inega Elodi toveguba qiduqiduadi be luvine ana tove'itayavo gaba va'auqidi imai, 'inega vetala'aiedi vonaya, "Ma'inaya To'etoyavua nana navi'oi?"

<sup>5</sup> Ena vetala'ai ive'iea ivonaya, "Abaga Bedeliema di'we Iudia 'inaya. Lova tovesimasi mana ena simana Buki Nugwenugweina gamonaya vonaya,

<sup>6</sup> \* 'Bedeliema 'abaga goyona gamonega nawale me Isileli edi Kini na'ifoqe, tauna egu tomtauyavo navanugwetedi. Ba'e weaqina Bedeliema 'abaga kaikaiwabuna ta qiduana Iudia 'abaganavo gamodiega.'"

<sup>7</sup> Elodi edi vona noqolia 'inega toalamani diavona gabedi imai ta 'waivega vetala'ai aqiaqiedi totutaya 'wadima nana 'ifoqe.

<sup>8</sup> 'Inega Elodi ena vetala'ai 'wadima nana weaqina ive'iea, e 'inega tauna luvinedi vonaya, "Ona tauya Bedeliema 'inaya nuanuagu gwama nana ona sali aqiaqiei be ona lobe, e 'inega ona mai ona vonegu, 'inega ya'a wese ena tauya ena iwa'odu 'inaya."

<sup>9</sup> Elodi ena vona lu'ovoia 'inega i'ifoqe, ta lova 'wadima nana i'itea wese vanugwetedi itauya, ta to'edia gwama nana 'eno'eno debanaya lua'u.

<sup>10</sup> Tuta nana toalamani diavona 'wadima nana i'itea iqaiawa gegoyo.

---

\* 2:6: Mai 5:2; Ion 7:42

11\* 'Inega ilugu vanuea ta gwama ma inana Meli i'tedi, 'inega 'amayabega isobadi ta ihiwa'odu 'inaya. Ta 'abiboda edi veyoluba kodeyega i'ewedi ia'uya gwama nana 'iawanaya. Ta kulufa diavona dabo kaikaiwabuna ana wawa goula, ta wese mulo be inisenisi.

12 'Abiboda Yaubada ve'wayoqega vematamag-ilafuyedi be ge ida 'evivi Elodi 'inaya, ta 'esi mali 'edega i'evivi itauya edi 'abagaya.

*Iosefa be gwama ma inana idena itauya di'we Itifita 'inaya*

13 Ta edi tauya 'abibodanaya Yaubada ena tovale'ewa taha ve'wayoqega Iosefa 'inaya 'ifoqe 'inega voneaya, "Uya'itoto, be gwama ma inana una 'ebe'ewedi 'inega ona dena ona tauya di'we Itifita 'inaya. Be omo'idia ona toatoa ana laba ena vonemi, mana Elodi nawale bena'e gwamana nasalia be vonigo naluve'aligia."

14 'Inega velovelovana 'inaya Iosefa ya'itoto ta gwama nana ma inana 'ebe'ewedi 'inega itauya Itifita 'inaya.

15\* Ta Itifita 'inaya itoatoa ta iba'eba'e ana laba Elodi yawaina nagumwala, 'inega Yaubada ena vona ana aqiaqi 'ifoqe, mana lova tovesimasi-mana taha madusimanea vonaya, "Itifita 'inega Natugu yagabei mai."

16 Elodi toalamani diavona nawale ba'eba'eyedi, ta ge ida 'evivi mai 'inaya. 'Inega nuana 'eqa'uya ge wese ina mai be ina vonei gwama nana weaqina. 'Inega diana vilei be ena luvine a'uya vonigo gogama me'ome'olotodi adi

\* 2:11: Same 72:10-15; Ais 60:6      \* 2:15: Ose 11:1

ya'wala magilafudi ta 'ayanaya ina luve'aligidi Bedeliema 'abaganavo 'idia, mana toalamaniavo edi simana 'inega ni'a alamania gwama nana ena tuta vi'oi weaqina.

17 Ta Elodi ena luvine ba'e 'inega tovesimasi-mana Ielemaia ena vona adi aqiaqi 'ifoqe vonaya,  
 18 \* “Duvoyavoya kanoqonoqolia 'abaga Lama 'inega,  
 visiqa ta mataelu maega iduduvoyavoya,  
 Litieli\* me ena gadeavo idoudou natudiavo weaqidi,  
 'inega ge nuanuadi taha toga nuadi nagenoi mana natudiavo ni'a i'aliga.”

### *Itifitayega i'evivi itauya Nasaleta*

19 Elodi ni'a 'aliga, ta Iosefa ena susu maega nawale Itifita 'inaya itoatoa. 'Inega 'wayoqega Yaubada ena tovale'ewa taha 'ifoqe Iosefa 'inaya vonaya,

20 “Uya'itoto, gwama ma inana una 'ebe'ewedi ta ona 'evivi Isileli bwa'obwa'onaya, mana gwama nana ana avia ni'a 'aliga.”

21 'Inega Iosefa ya'itoto ta gwama ma inana 'ebe'ewedi i'evivi Isileli 'inaya.

22 Tuta nana i'evivi imaimai Iosefa vale noqolia Elodi natuna Akeleasi tamana luve'iea ta vetoluvine Iudia 'inaya. 'Inega Iosefa mwaniniva ge nana ina tauya di'we nana 'inaya. Ta ve'wayoqega Yaubada vonea ina tauya di'we Galili 'inaya.

---

\* **2:18:** Iel 31:15; Nug 35:19 \* **2:18:** Litieli “*Rachel*” - taudi Iakobo moqanena taha, ta veyolubedi qiduana. Taudi Iosefa ta Beniamina inadi.



23 \* Tuata Nasaleta 'inaya ive'abaga. 'Inega tovesimasimanayavo edi simana adi aqiaqi 'ifoqe vonaya, "Tauna ina gabea Nasaleta 'olotona."

### 3

#### *Ioni Togivebabitaiso ena lugaihi*

*(Maki 1:1-8; Luke 3:1-18; Ioni 1:19-28)*

<sup>1</sup> Tuta nana Iesu Nasaleta 'inaya toatoa, 'inega Ioni Togivebabitaiso 'ifoqe di'we 'ava'avanaya Iudia gamonaya lugaihi vonaya,

<sup>2</sup> \* "Emi ilivu luveifana 'idiega ona nuagivila, mana mahala ena 'Ebeluvine tuta goyona na'ifoqe."

<sup>3</sup> \* Lova tovesimasimana Aisea ba'e Ioni nana weaqina simana vonaya, "Bona taha vevegabagaba di'we 'ava'avanega vonaya,

'Kaiwabu ena 'eda ona da'ea ta ona give-tunuqia.'"

<sup>4</sup> \* Ta Ioni ana kaleko yubai kameli vutuvutudi 'inega, ta ana gadi'wana yubai 'wafidi 'inega, be ana 'abwagayavo wakifou ta wese mu'awa.

<sup>5</sup> 'Inega tomotau Ielusalemega, be di'we Iudia ena 'ebeluvineyega ta wese go'ila Iolidani di'wenega 'abagadiavo 'idiega imai Ioni 'inaya.

<sup>6</sup> E edi ilivu luveifadi isimana 'ifoqeyedi ta 'inega Ioni givebabitaisodi go'ila Iolidani 'inaya.

<sup>7</sup> \* Ta Falisi be Sadusi qabudi wese imai sabi babitaiso, e Ioni 'itedi 'inega vonedia, "Omi'a 'idewani mwata natudiavo! Ta onuaia vonigo

---

\* 2:23: Ais 11:1; 53:2; Lk 2:39; Ion 1:45 \* 3:2: Md 4:17; Mk 1:15

\* 3:3: Ais 40:3 \* 3:4: 2Kin 1:8 \* 3:7: Md 12:34; 23:33

nawale Yaubada ana diavilavila 'inega ami fata ona dena, waisa?

<sup>8</sup> Ta nugweta emi nuagivila ona ve'ita 'ifoqeyedi emi veilivu aqiaqi 'idiega.

<sup>9</sup> \* Ge taumiega ona nuavane ta ona vonaya, 'Ita'a Ebelamo tubunavo, 'inega Yaubada nanu-akolokoloyeda.' Gebu'e otaqa! Yavona aqiaqiemi, Yaubada ana fata ba'e dabodiavo 'idiega Ebelamo tubunavo naviaqidi.

<sup>10</sup> \* Ta 'eguma ge ona veilivu aqiaqi, 'inega tuta goyona 'inaya Yaubada naluvematasabumi. 'Idewani 'aiwe, 'eguma ge davuaqa aqiaqi 'inega tomotau ina talaqi ta ina gabu yavulea.

<sup>11</sup> \* "Ta 'eguma ona nuagivila 'inega ya'a go'ilega ena givebabitaisomi. Ta vonahaqiaqi, nawale taha 'oloto 'abibodaguyega maimai, tauna veago va'inegu, 'inega ge agu fata ana 'aqeyafayafa ena 'avaledi. Tauna Niboana Gwalagwalana 'inega be wese 'aiwe saesaelina 'inega nagivebabitaisomi.

<sup>12</sup> Ta 'oloto ba'e ena daimayega witi nagivutuqidi be vuaqina aqiaqidi navedododi sailakaya, ta witi qainina 'aiwe 'ala'alata vatayana 'inaya nagabu yavuledi."

*Ioni Togivebabitaiso Ieisu givebabitaisoya  
(Maki 1:9-11; Luke 3:21-22)*

<sup>13</sup> 'Inega Galiliega Ieisu mai Ioni 'inaya sabi babitaiso Iolidani 'inaya.

---

\* **3:9:** Ion 8:33,39; Lom 4:12    \* **3:10:** Md 7:19; Lk 13:6-9    \* **3:11:** Ion 1:26-27,33; Via 1:5

14 Ta Ioni nuanuana Ieisu nahawatayea 'inega vonaya, “Ma'oda 'inega umai 'iguya be ena give-babitaissou, ta 'esi luaqiaqiea 'eguma o'a uda give-babitaissogu?”

15 Ta Ieisu Ioni ena vona ve'evivia vonaya, “Ge 'idewani una nuanua 'aiqa ta 'esi una give-babitaissogu, mana ba'e 'inega Yaubada ena nuanua aqiaqi kana 'abibodea.” E 'inega Ioni Ieisu givebabitaissoya.

16 \* Gumwala, 'inega Ieisu go'ilega fweula, ta tuta nana fweula 'inega mahala 'elalamia, 'inega Yaubada Niboanina 'itea webuwebui mai 'inaya, ana 'ita 'idewani malasi.

17 \* 'Inega bona taha mahalega 'ifoqe vonaya, “Ba'e Natu Otaqigu. Tauna weaqina yaqaiawa qiduana.”

## 4

### *Ieisu sitonova lobeia Seitani 'inega (Maki 1:12-13; Luke 4:1-13)*

1 \* 'Inega Yaubada Niboanina Ieisu 'ebe'ewei tauyeya di'we 'ava'avaya be yaqisa Seitani nasitonovia.

2 \* Ta 'aubena be velovana 40 gamodia Ieisu vedede 'ai 'inega, ta botana qiduana lutonovia.

3 'Inega tositonova 'ifoqe ta voneaya, “Eguma o'a Yaubada Natuna ba'e dabo diavona una vonedi be ina ve'abwaga.”

4 \* 'Inega Ieisu vonaya, “Buki Nugwenugweina ena simana vonaya,

---

\* **3:16:** Ion 1:32      \* **3:17:** Same 2:7; Ais 42:1; Md 12:18; 17:5; Lk 9:35      \* **4:1:** Ibe 2:18; 4:15      \* **4:2:** 'Ifo 34:28      \* **4:4:** Luve 8:3

‘Gebu ’abwaga namo ’inega tomotau iula ina lobei yawaidi weaqina,  
ta ’esi Yaubada ena vonayavo qabudi wese ’idiega.’ ”

<sup>5</sup> ’Inega Seitani Iesu ’ebe’ewei tauyea ’Abaga Gwalagwalana Ielusalema ’inaya, ’inega ivane Vanue Gwalagwalana ’ubutetenaya,

<sup>6</sup> \* ’inega Seitani vonaya, “Eguma o’a Yaubada Natuna ba’e ’inega una fifieu ta gebu una veilage. Mana Buki Nugwenugweina simana vonaya, ‘Yaubada ena tovale’ewayavo naluvinedi ina ’itamakiu’,  
be wese vonaya,

‘Nimadiega ina ’alagamoiu ’inega ge ’a’geu navelubai daboya.’ ”

<sup>7</sup> \* Ta Iesu Seitani ena vona ve’iea vonaya, “Vona taha wese Buki Nugwenugweina ’inaya ’eno’eno vonaya,

‘Eu Kaiwabu Yaubada ge una sitonovi!’ ”

<sup>8</sup> ’Inega Seitani wese Iesu ’ebe’ewei tauyea taha bwanaga qiduana debanaya, ta omo’e ’inaya bwa’obwa’o ena di’we qabudi adi ’ita aqiaqi otaqidi ve’itea,

<sup>9</sup> ta sitonovia ’inega voneaya, “Eguma ’iawaguya una sobadi ta una iwa’odu ba’e yani diavona ena neiu.”

<sup>10</sup> \* ’Inega Iesu voneaya, “Seitani, unogegu! Buki Nugwenugweina gamonaya luvine ’eno’enova vonaya,

---

\* **4:6:** Same 91:11-12    \* **4:7:** Luve 6:16    \* **4:10:** Luve 6:13

‘Eu Kaiwabu Yaubada ana ’aidega otaqa una iwa’odu ’inaya, ta wese una vetofewa ’inaya.’ ”

11 ’Inega Seitani Iesu nogei tauya, ta ’abibodanaya Yaubada ena tovale’ewayavo i’ifoqe ta Iesu ihiulea.

*Iesu ena fewa ve’alea di’we Galili ’inaya  
(Maki 1:14-15; Luke 4:14-15)*

12 \* Tuta nana Iesu Ioni valena noqolia ni’au ia’uluguyea vanue ’ebeyoqona ’inaya, ’inega ’evivi tauya di’we Galili ’inaya.

13 ’Inega Nasaleta nogei ta mai ve’abaga Kafaneumi ’inaya, lavu di’wenaya. ’Abaga nana gade Sebuloni be wese gade Nafitalai edi bwa’obwa’o.

14 Ba’e ’inega tovesimasimana Aisea ena vona adi aqiaqi ’ifoqe, vonaya,

15 \* “Sebuloni ena gade ta wese Nafitalai ena gade edi bwa’obwa’oyega  
lavu ana ’eda tauya go’ila Iolidani mali di’wea,  
ta bwa’obwa’o nana di’we Galili ena ’ebeluvine gamonaya, ta omo’e ’inaya taudi ge me Diu wese itoatoa.

16 Ta tomotau dina velovelovana ’inaya itoatoa ba’e ’itagana simatala qidwana tawa i’itea. Taudi ’aliga ena ’abaga luveifana ’inaya itoatoa, ba’e ’itagana simatala ni’au yayaqa ’idia.”

17 \* Tuta omo’e ’inega Iesu ena lugaihi ve’alea vonaya, “Emi ilivu luveifadi ’idiega ona nuagivila, mana mahala ena ’Ebeluvine ni’a vadi’wemi!”

\* 4:12: Md 14:3; Mk 6:17; Lk 3:19-20 \* 4:15: Ais 9:1-2 \* 4:17: Md 3:2; 10:7

*Ieisu tolu'iqana gabedi*  
(*Maki 1:16-20; Luke 5:1-11*)

<sup>18</sup> Taha tuta 'inaya Ieisu lavu Galili balabal-anega luluwivila, e 'inega tolu'iqana magilafudi ma taina 'itedi igomagomana, taha ana wawa Saimoni tauna wese igabea Fita, ta wese taina ana wawa Anidulu.

<sup>19</sup> 'Inega gabedi vonaya, “Omai, ona 'abibodegu, be ena ve'itemi ma'oda tomtau ona 'ona 'aiqedi.”

<sup>20</sup> 'Inega lukwayavonega edi gomana inogedi ta Ieisu i'abibodea.

<sup>21</sup> 'Inega wese Ieisu vavanaqo togomana toidi 'itedi wagaya edi gomana i'iva'ava'aidi adi wawa Iemesa be Ioni ma tamadi Sebedi. 'Inega Ieisu Iemesa ma taina gabedi,

<sup>22</sup> 'inega lukwayavonega edi waga be wese tamadi inogedi, ta Ieisu i'abibodea.

*Ieisu tomtau qabudi iuledi*  
(*Luke 6:17-19*)

<sup>23</sup> \* Ieisu luvivila di'we Galili 'abaganavo 'idia, ta edi vanue tafwalolo 'idia lugaihi Vale Aqiaqina Yaubada ena 'Ebeluvine weaqina, ta wese tomtau qabudi adi vihiqayavo 'idiega giveaqiaqiedi.

<sup>24</sup> \* Ta Ieisu Valena yawala di'we Silia 'abaganavo 'idia. 'Inega tovevihiqayavo adi vihiqa taha taha ediavo imimiedi Ieisu 'inaya. Vaina 'wafidi 'idia yuvaqa qiduana, ta vaina niboana luveifana ni'a lugu 'idia, ta vaina itafetafetafwai, ta wese vaina veilage be vihiqa give'enovidi imiedi. Ta Ieisu tovevihiqa diavona qabudi giveaqiaqiedi.

---

\* **4:23:** Md 9:35; Mk 1:39; Via 10:38      \* **4:24:** Mk 6:55

25 \* Ba'e 'iuna 'inega yo'o qiduadi Ieisu itala'obe dadanea Galili 'inega be, Dikafoliega be, Ielusalemega be, Iudiyega ta wese Iolidani mali di'wenega.

## Ieisu ena ve'ita bwanagaya

### 5

*(Madiu 5:1-7:29)*

<sup>1</sup> Ieisu qabu qiduadi 'itedi, 'inega 'watovu bwanagaya ta omo'e 'inaya toabui, ta ana to'abibodayavo wese i'watovu 'inaya.

<sup>2</sup> 'Inega Ieisu ve'ale ve'itedi vonaya,

*Qaiawa vataya weaqina*

*(Luke 6:20-23)*

<sup>3</sup> \* "Aiqabu nuanuadi 'ena'ina Niboana Gwalagwalana naluveagatuna'idi ina qaiawa, mana mahala ena 'Ebeluvine taudi weaqidi.

<sup>4</sup> \* Aiqabu ba'itaga me edi dou nawale ina qaiawa, mana Yaubada nalu'ai'aiedi.

<sup>5</sup> \* Aiqabu edi ilivu nuvana ina qaiawa, mana nawale Yaubada bwa'obwa'o qabuna naneidi.

<sup>6</sup> \* Aiqabu nuanuadi ilivu aqiaqina be tunutunuqina nave'ena'i 'idia ina qaiawa, mana Yaubada ilivu nana nagive'ifoqeyea 'idia.

<sup>7</sup> Aiqabu tonuakolokolo ina qaiawa, mana Yaubada wese nanuakolokoloyedi.

<sup>8</sup> Aiqabu giwalidi vunavunaqidi ina qaiawa, mana nawale Yaubada ina 'itea.

---

\* 4:25: Mk 3:7-8      \* 5:3: Ais 57:15      \* 5:4: Ais 61:2-3; Ve 7:17

\* 5:5: Same 37:11      \* 5:6: Ais 55:1-2

- 9 Aiqabu togivenuadaumwala ina qaiawa,  
mana nawale Yaubada na'awanatunedi.
- 10 \* Aiqabu vita ilobelobea tomotau 'idiega edi  
fewa tunutunuqina Yaubada weaqina e ina  
qaiawa,  
mana nawale mahala ena 'Ebeluvine 'inaya  
ina lugu.
- 11 \* “Ta 'eguma tomotau ina vegilemi be  
vita taha taha ina give'ifoqeyea 'imia ta wese  
u'avega ina 'awaluveifemi mana omi'a agu  
to'abibodayavo, e 'inega tua omi'a ona qaiawa.
- 12 \* Luaqiaqiemi be ona qaiawa qiduana, mana  
ami ve'ia 'ena'ina mahalaya 'eno'nova. Mana  
ba'e ilivu diavona tomotau lova wese iviaqia  
Yaubada ena tovesimasimanayavo 'idia.

*Ve'ita mwade'wa be simatala weaqina  
(Maki 9:50; Luke 14:34-35)*

- 13 “Omi'a 'idewani mwade'wa totoa bwa'obwa'o  
weaqidi. Ta ona nuaia, 'eguma mwade'wa  
nu'wana nagumwala ge wese ana fata  
navedibidibi 'evivi, waisa? 'Inega nagibwa  
ta kana guiwaqa yavulea ta tomotau ina  
vavefwayefwayea.
- 14 \* “Ta wese omi'a kavonaya simatala totoa  
bwa'obwa'o weaqidi. Vonahaqiaqi, omi'a kavona  
taha 'abaga simasimalina bwanaga debanaya,  
ta 'abaga nana tomotau qabudi adi fata ina 'itea.

---

\* 5:10: 1Fit 3:14 \* 5:11: 1Fit 4:14 \* 5:12: 2Yani 36:16; Via 7:52  
\* 5:14: Ion 8:12; 9:5



15\* Ta 'eguma lamufa ni'a kagabuya 'inega gebu 'ulena gamonaya kana talakabubui, ta 'esi luaqiaqiea be 'ebea'u debanaya kana a'uya ta 'inega vanue gamona nasimatata aqiaqiea.

16\* Ta omi'a wese 'idewanina luaqiaqiemu be emi ilivu simasimalidi ona ve'itayedi tomotau 'idia, be yaqisa ina 'itedi ta Tamami mahalaya ina awatuboya.

### *Ve'ita luvine weaqina*

17\* "Ge ona vonaya be ya'a yamai Mosese ena luvine ta wese tovesimasimana edi ve'ita sabi 'ewa yavulidi. Ta 'esi yamai sabi give'ifoqe aqiaqiedi.

18\* Vonahaqiaqi, mahala be bwa'obwa'o ina awala, ta ge taha yani goyosikwa otaqina luvine gamonega nahawala ana laba Yaubada ena nuanua na'ifoqe luvine nana 'inega.

19\* Ta 'eguma togama luvine dina 'idiega taha yani goyosikwana nanogea be tomotau wese 'idewani nave'itedi ina viaqia, 'inega tauna ana wawa navegoyo otaqa mahala ena 'Ebeluvine gamonaya. Ta 'esi 'eguma taha toga luvine dina namatayaga aqiaqiedi ta nave'itayedi tomotau 'idia, e tauna ana wawa naveqidua mahala ena 'Ebeluvine gamonaya.

20 Ta wese yavonemi, 'eguma omi'a emi ilivu ge naveaqiaqi va'ine taudi Falisiavo be luvine ana tove'itayavo edi ilivu 'idiega, e 'inega ge ami fata mahala ena 'Ebeluvine 'inaya ona lugu.

---

\* 5:15: Mk 4:21; Lk 8:16; 11:33      \* 5:16: Efe 5:8-9; 1Fit 2:12

\* 5:17: Lom 3:31      \* 5:18: Lk 16:17; 21:33      \* 5:19: Iem 2:10

*Ve'ita diavilavila ta luve'aliga weaqina*  
(Luke 12:57-59)

21 \* “Luvine 'itu'ituwaina tubudavo edi tutaya ni'a onoqolia vonaya, 'Ge una luve'aliga. Ta 'eguma taha toga una luve'aligia nawale luvine una lobea.’

22 \* “Ta ya'a yavonemi 'eguma taha toga taina 'inaya nanualuveifa luvine nalobea. Ta wese 'eguma taha toga iana na'awaluveifea luvine nalobea kaniselayavo 'idiega. Ta wese 'eguma taha toga iana navona ve'alatea, e nawale nalugu 'aiwe 'ala'alata 'inaya.

23 \* 'Inega 'eguma eu nei kavovo umimiea 'ebeveguba Yaubada 'inaya sabi a'una, ta taiu ena luveifana 'iuya unuaia,

24 e 'inega luaqiaqieu eu nei kavovo una a'uya 'ebeveguba di'wenaya ta una madutauya taiu 'inaya be maega ona veiana 'evivi. 'Inega 'abiboda una 'evivi mai be eu nei kavovo una a'uya 'ebeveguba nana 'inaya.

25 “Inega 'eguma voalau natauyeu toluvine matanaya kotu weaqina, 'inega nugweta lukwayavonega ona madugivetunuqia maega. Ta 'eguma gebu, nawale voalau natauyeu toluvine 'inaya be toluvine nana nave'ineieu vanue 'ebeyoqona ana to'itamaki 'idia, ta ina fela luguyeu vanue nana 'inaya.

26 Ta ge wese ina awafeleu be una 'ifoqe ana laba au aga una vemaisa 'ovoia.

*Ve'ita luabu weaqina*

\* 5:21: 'Ifo 20:13; Luve 5:17

\* 5:22: 1Ion 3:15

\* 5:23: Mk

11:25

27 \* “Luvine ’itu’ituwaina ni’a onoqolia vonaya, ‘Ge ona luabu!’

28 Ta ya’a yavonemi ’eguma taha ’oloto vaqivaqina vavine na’itea ta nuanega nainabo ’waivea, e ’inega tauna giwalinega luabu ni’a viaqia.

29 \* ’Inega ’eguma matau au ’ataqiega nagevebe’uyeu, ’inega una giou yavulea. Mana ge taha yani qidwana ’eguma ’wafiu du’una ta’a mona una ’ita’avea. Ta vonahaqiaqi, yani luveifa otaqina ’eguma mabubuyau ina felawebuieu ’aiwe ’ala’alata ’inaya.

30 \* Wese ’idewani ’eguma nima ’ataqiu nagevebe’uyeu, ’inega una da’a yavulea. Mana ge taha yani qidwana ’eguma ’wafiu du’una ta’a mona una ’ita’avea. Ta vonahaqiaqi, yani luveifa otaqina ’eguma mabubuyau ina fela webuieu ’aiwe ’ala’alata ’inaya.

*Ve’ita sa’ila weaqina*

*(Madiu 19:9; Maki 10:11-12; Luke 16:18)*

31 \* “Luvine ’itu’ituwaina wese vonaya, ‘Eguma taha toga nuanuana moqanena nasa’iledi, ’inega sa’ila ana leta namadu’wayavia ta moqanena naneidi.’

32 \* “Ta yavonemi, ’eguma taha ’oloto nuanuana moqanena nasa’iledi ta taudi ge luabu ida viaqi mali ’oloto maega, e ’inega ’oloto nana ni’a luveifana viaqia ’eguma taudi ina vaqi ukamana

---

\* 5:27: ’Ifo 20:14; Luve 5:18      \* 5:29: Md 18:9; Mk 9:47      \* 5:30: Md 18:8; Mk 9:43      \* 5:31: Luve 24:1-4; Mk 10:4      \* 5:32: 1Kol 7:10-11

'oloto vauvauna 'inaya, e 'inega 'oloto vauvauna wese luabu ilivuna viaviaqia.

*Ve'ita vona fofofola weaqina*

33 \* "Wese ni'a onoqolia luvine 'itu'ituwaina vonaya,

"Eguma Yaubada 'inaya ovona fofofola, gebu emi vona diavona ona qeunidi ta 'esi ona 'itamakidi be ona viaqidi.'

34 \* "Ta ya'a yavonemi, ge ona vona fofofola mahala 'inega, mana oa'ena Yaubada ena 'ebetoa.

35 \* Ta wese gebu bwa'obwa'o 'inega ona vona fofofola, mana ba'ena Yaubada 'aqena ana 'ebea'u, be wese gebu Ielusalema 'inega, mana 'abaga omo'ena Kini qiduana ena 'abaga.

36 Wese gebu 'unu'unumi 'inega ona vona fofofola, mana ge ami fata debami 'aidegana ona givilei be nalu'wadaeyei nage nalukwausi.

37 'Eguma taha yani ami fata ona viaqia 'inega ona vona "Ao', ta 'eguma ge ami fata 'inega ona vona 'Gebu'. Mana 'eguma emi vona nave'eala e vona nana Seitani 'inega.

*Ve'ita mebu weaqina*

*(Luke 6:29-30)*

38 \* "Ni'a onoqolia luvine 'itu'ituwaina vonaya, "Eguma taha toga matau naluveifea 'inega wese matana una luveifea. Wese 'eguma taha toga alau na'aumweddia 'inega o'a alana una 'aumweddia.'

---

\* **5:33:** Luve 23:21; Luvi 19:12; Naba 30:2 \* **5:34:** Ais 66:1; Iem 5:12; Md 23:22 \* **5:35:** Same 48:2; Ais 66:1 \* **5:38:** 'Ifo 21:24; Luvi 24:20; Luve 19:21

39 “Ta ya’a yavonevonemi, ’eguma taha toga ilivu luveifana ’iuya naviaqia ge nimana una ve’iei. Ta ’inega ’eguma togama ’ae’aeu navunuqia, ’inega una awafelei ta wese di’wenege navunuqia.

40 Ta wese ’eguma togama ena nuenuega na’ebe’ewe u natauyeu vetala’ai ’inaya ta au kaleko na’ewe, e ’inega wese au kwakwalufai una awafelei na’ewe.

41 Wese ’eguma taha toga naluvineu ena kulufa una ’avala ona tauya taha ’abaga ’inaya, e ’inega wese una awafeleu be ’abaga vemagilafuna ’inaya maega ona tauya.

42 Ta wese ’eguma taha toga ’iuya navenoqi taha yani weaqina ’inega yani nana una neia, ta gebu una vegagalei.

*Ada aviayavo kana veyolubedi*

*(Luke 6:27-28,32-36)*

43 \* “Luvine ’itu’ituwaina ni’a onoqolia vonaya, ’Emiavo ona veyolubedi, ta ami aviayavo ona vevoalanedi.’

44 \* “Ta ya’a yavonemi voalamiavo ona veyolubedi, ta wese taudi iveaviemi weaqidi ona venoqi.

45 Ba’e ’inega Tamami mahalaya na’awanatunemi, mana tauna veyoluba ’iuna be ’inega tauna ena baba’au nagiveyayaqia toaqiaqidi ta wese toluveifadi ’idia, ta wese ’wei awafelea taudi tunutunuqidi ta wese ge tunutunuqidi ’idia.

---

\* 5:43: Luvi 19:18      \* 5:44: ’Ifo 23:4-5; Lk 23:34; Via 7:60; Lom 12:14,20

46 Ta 'eguma emiavo dimo ona veyolubedi ge ana fata ve'ia Yaubada 'inega ona 'ewei, mana takesi ana to'ewa wese ediavo iveyolubedi.

47 Ta wese 'eguma emiavo dimo ona veiaianedi, 'inega ge ami ve'ia ona 'ewei, mana vaina tomotau Yaubada ge ida vetumaqanea taudi wese ediavo iveiaianedi. 'Inega taudi be omi'a emi ilivu lelelea.

48 \* Ta omi'a luaqiaqiemi be emi ilivu naveaqaqi otaqa 'idewani Tamami mahalaya."

## 6

### *Ve'ita nei kavovo weaqina*

1 \* Ta Iesu wese vonaya, "Eu nei kavovo ge una a'uya tomotau matadia, mana 'eguma 'idewani una viaqa 'aiqa 'inega ge taha ve'ia Tamau mahalaya naneiu.

2 'Inega tuta nana ona nei kavovo ge ona vevonavonayei 'idewani togagasa, mana taudi vanue tafwalolo gamonaya nage 'abagaya ineinei kavovo, ta 'abiboda tomotau 'idia ivonavonayea, mana nuanuadi tomotau ina awatubodi. Vonahaqiaqi, tawa adi ve'ia i'ewa vatayea ba'idia.

3 Ta 'inega omi'a 'waivega ona nei kavovo lukwalukwa 'idia.

4 'Inega tomotau emi nei kavovo ge ina 'itei, ta Tamami ana 'aidega tauna 'ita kwaivemi ni'a alamania, 'inega 'abiboda ve'ia aqiaqina naneimi."

### *Ve'ita noqi weaqina (Luke 11:2-4)*

---

\* 5:48: Luvi 19:2; Luve 18:13      \* 6:1: Md 23:5

5 \* Ta wese Ieisu vonaya, “Tuta nana ona noqi Yaubada 'inaya ge tou'ava ona vetutumedi, mana taudi nuanuadi vanue tafwalolo gamonaya wese 'abagaya tomotau matadia ina ya'itoto be ina noqi, 'inega tomotau ina awatubodi. Vonahaqi-aqi, adi ve'ia ni'a i'ewa vatayea.

6 “Ta 'esi o'a, tuta nana una noqi nugweta una lugu eu vanue gamonaya ta 'awa una bagini, be 'inega 'waivega una venoqi Tamau 'inaya. 'Inega tauna 'waivega 'iteuya nawale ve'ia aqi-aqina naneiu.

7 \* Ta wese tuta nana unoqinoqi ge eu vona una lu'evi'eviviei 'idewani taudi totoa velovelovana iavoavo kavokavovo. Taudi ivonaya be edi vona kuekuena 'inega ve'ia aqiaqina ina lobe.

8 \* Gebu taudi 'aqedi ona talaqi, mana ami vitayavo Tamami madualamanidi ta 'abiboda weaqidi onoqinoqi.

9-13 \* “Inega ba'idewani ona noqi 'aiqa:  
 Tamama, utoatoa mahalaya.  
 Au wawa gwalagwalana ana 'amayabea.  
 Nuanuama una luvinema.  
 Nuanuama totoa bwa'obwa'o eu nuanua ana vi-aqidi,  
     'idewani totoa mahala eu nuanua iviaviaqidi.  
 Nuanuama ama 'abwaga tuta qabuna una neima.  
 Ta ema lueifana una nuataqodi,  
     'idewani ima'a tomotau iveilivu veifa 'imaya  
     anuataqodi.  
 'Ebeu'ava 'inaya gebu una awafelema,

\* 6:5: Md 23:5; Lk 18:10-14    \* 6:7: 1Kin 18:25-29    \* 6:8: Md 6:32

\* 6:9-13: Lk 22:42; Md 18:21-35; Lk 22:40; Iem 1:13; Ion 17:15; 2Te 3:3; 2Tim 4:18

ta nuanuama toluveifana 'inega una vabode-  
bodema.

14 \* 'Eguma omi'a tomotau edi luveifana 'imia  
ona nuataqodi 'inega Tamami mahalaya wese emi  
luveifana nanuataqodi.

15 Ta 'eguma tomotau edi luveifana 'imia ge ona  
nuataqodi 'inega wese Tamami emi luveifana  
gebu nanuataqodi.

*Ve'ita vedede weaqina*

16 \* “Tuta nana ona vedede 'ai 'inega be yaqisa  
Yaubada namai di'wemia, 'inega ge ami 'ita ona  
givedumedumei tou'ava 'idewani, mana taudi  
nuanuadi adi 'ita dawalilina 'inega tomotau ina  
alamanian vonigo taudi ivevedede. Vonahaqiaqi,  
taudi adi ve'ia tawa i'ewea.

17 Ta 'esi tuta nana ona vedede 'inega 'iawami ta  
wese debami dede'wega ona 'abia,

18 'inega tomotau emi vedede gebu ina ala-  
manian, ta 'esi Tamami ge ana 'itamo emi vi-  
aqa qabuna 'wai'waividi 'ite'itedi, e 'inega tauna  
nawale ve'ia aqiaqina naneimi.

*Ve'ita mahala ana kaikaiwabu weaqidi*  
(Luke 12:33-36)

19 \* “Emi kulufa kaikaiwabudi ge ona luveaqedi  
bwa'obwa'oya, mana kwamukwamu be gana-  
gana ina luveifedi, ta wese tovanawala vanue ina  
baia ina lugu ta kulufa diavona ina vanawalidi.

20 \* Ta 'esi emi kaikaiwabuyavo mahalaya ona  
luveaqedi, mana omo'e 'inaya kwamukwamu be

---

\* 6:14: Mk 11:25-26      \* 6:16: Ais 58:5-9      \* 6:19: Iem 5:1-3

\* 6:20: Md 19:21; Lk 18:22



ganagana ta wese tovanawala ge adi fata ina luveifedi.

<sup>21</sup> Ta ona nuave'avinia ma'inaya emi kaikaiwabu 'eno'eno, e omo'e 'inaya emi nuanua wese natautauya.

*'Wafi ana simatala*

<sup>22</sup> “Matami kavona lamufa 'wafimi weaqina. Ta 'eguma matami aqiaqidi, e 'inega wese 'wafimi qabuna nasimatala.

<sup>23</sup> Ta 'eguma matami naluveifa 'inega wese 'wafimi qabuna navelovanea. Ta 'eguma lamufa nana na'weu 'inega nawale velovana qidua otaqina na'ifoqe.

*Ge ona nuanua vaina yani weaqina  
(Luke 16:13; 12:22-31)*

<sup>24</sup> “Ge taha toga ana fata navetofewa kaiwabu magilafudi 'idia. 'Inega taha nanogei ta taha naveyolubea. Ta wese taha na'awahaqiaqiea ta taha na'awaluveifea. 'Inega ge taha toga ana fata navetofewa Yaubada ta wese bwa'obwa'o ana kaikaiwabu 'idia.

<sup>25</sup> \* “Inega yavonemi, ge ona nuanua emi toa bwa'obwa'oya weaqina, 'idewani 'abwaga be go'ila ta wese 'wafimi ana kaleko weaqidi. Mana yawaimi yani 'ena'ina, ta kulufa diavona 'wafi weaqina ge yani 'ena'ina.

<sup>26</sup> \* Ona nuaidi manu, ge ida vaoqa, ta ge wese ida bolimana, ta wese ge edi sailakamo. Manuqa yani goyona, ta tuta qabuna Tamami

---

\* **6:25:** Fil 4:6; 1Tim 6:6-8; 1Fit 5:7 \* **6:26:** Md 10:29-31; Lk 12:6-7

mahalaya veve'ainidi. Ta omi'a yani 'ena'ina Yaubada 'inaya, 'inega wese ana fata nave'ainimi.

27 “Ge taha toga ana fata ena toa bwa'obwa'oya nagivekuei ena nuanuayavo 'idiega.

28 'Inega tola'ai weaqina onuanua qiduana ami kaleko weaqidi? Taha wese 'ebe'ita libi idina edi tabo weaqina ona nua'ivinidi, mana gebu ida fewafewa ta wese gebu adi kaleko ida viaviaqidi.

29 \* Ta yavona aqiaqiemi, toluvine qiduana kaikaiwabuna Solomoni ana kaleko ta wese ana 'ivala adi 'ita aqiaqina, ta libi idina adi 'ita aqiaqi otaqina.

30 'Inega ona nuaia Yaubada ena 'itamaki weaqimi. 'Itaga Yaubada libi idina ve'ivalidi aqiaqina ka'itedi, ta 'ibe namwatuqu 'inega tomotau ina tuinidi. Ta omi'a libi oveaqiaqi va'inedi, 'inega vonahaqiaqi ami kaleko naneimi. 'Inega tola'ai weaqina emi vetumaqana Yaubada 'inaya goyona?

31 “'Inega ge ona nuanua ta ona vonaya, 'Tola'ai kana 'ai, be tola'ai kana numa ta wese tola'aiega kana vekaleko?’

32 \* Vona ba'ena 'idewani taudi velovelovanaya itoatoa edi vona. Ta ba'e yani diavona weaqidi ge onuanua, mana Tamami mahalaya ni'a alamani aqiaqiedi.

33 \* 'Inega nugweta Yaubada ena 'Ebeluvine ona salia ta wese ena ilivu tunutunuqina ona 'abibodei 'inega yani diavona Yaubada naneimi.

---

\* 6:29: 1Kin 10:4-7; 2Yani 9:3-6 \* 6:32: Md 6:8 \* 6:33: 1Kin 3:11-14; Same 37:4,25; Lom 14:17

34 “Inega ge ona nuanua 'ibe weaqina, mana 'ibe 'aubena nana ana vita dumadumana, e 'inega ba'itagana ana vitayavo be ana nuanuayavo bena'e ta'iwa ami 'etofwafwa.

## 7

### *Ve'ita 'awaluveifa weaqina* (Luke 6:37-38,41-42)

1 \* “Gebu tomotau ona 'awaluveifedi fole nawale Yaubada wese na'awaluveifemi,

2 \* mana toyani weaqina tomotau ona 'awaluveifedi 'inega nawale Yaubada wese 'idewani na'awaluveifemi. Ta wese ma'oda ona veilivu 'aiqa tomotau 'idia nawale Yaubada wese 'idewana naveilivu 'aiqa 'imia.

3 Ta tola'ai weaqina taiu matana 'inaya 'aiwe kismanina weaqina uvonavona ta o'a tau'u matauya kigabugabu 'eno'enova ta ge uda 'itea?

4 'Inega ge daluaqiaqieu be taiu una vonei 'aiwe kismanina matanega una 'ewa yavulea, mana o'a matauya kigabugabu 'eno'enova.

5 O'a taha tou'ava, nugweta matauyega kigabugabuna una 'ewa yavulei ta 'inega una 'ita aqiaqi, ta 'abiboda taiu matanega kismanana una 'ewei ta una felea.

6 'Eguma taha yani aqiaqina kedewa kana neidi, nawale ina luveifea ta wese ina 'uteda. Ta wese 'idewani ami bagi gebu bawe ona neidi mana nawale ina vavefwayefwayea. Ta wese 'idewani Yaubada ena yani aqiaqina ge ona neidi tovegwavu'ai 'idia mana nawale ina veyani kavokavovoyedi.

---

\* 7:1: Lom 2:1; 1Kol 4:5; Iem 4:11-12      \* 7:2: Mk 4:24

*Una noqi 'inega Yaubada naneiu  
(Luke 11:9-13)*

7\* “Ona venoqi 'inega Yaubada naneimi, ta wese ona sali 'inega ona lobe, ta wese ona 'auveida'a 'inega 'awa na'ewa'ea weaqimi.

8\* Mana tomeqabu inoqinoqi Yaubada naneidi, ta tomeqabu isalisali nawale ina lobe, ta wese tomeqabu 'awaya i'au'auveida'a nawale na'ewa'ea weaqidi.

9 Ta ma'oda omi'a 'eguma natumiavo 'abwaga weaqina inoqinoqi 'imia nage dabo ona neidi?

10 Ta wese 'idewani 'eguma 'iqana weaqina inoqinoqi 'imia nage bunelala ona neidi? Gebu'e otaqa!

11\* Vonahaqiaqi, omi'a luveluveifami ta natumiavo 'idia ni'au oalamaniania yani aqiaqi dimo ona neidi, 'inega ona alamani aqiaqiea tomeqabu inoqinoqi Tamami mahalaya ena 'iwavo aqiaqi otaqina naneidi.

12\* Ta tola'ai nuanuami tomotau ina viaqia 'imia, e wese omi'a 'idewana ona viaqa 'aiqa 'idia. Mana ba'e ilivu nana ana viaqa 'inega Mosese be tovesimasimanayavo edi luvineavo adi alamani oveve'itayea.

*'Awa ta 'eda magilafudi weaqidi  
(Luke 13:24)*

13 “Awa sadana 'inega ona lugu ta gebu 'awa bababana 'inega. Ta 'awa bababana wese ana 'eda bababana, 'inega tomotau qabudi

---

\* 7:7: Mk 11:24; Ion 14:13; 15:7; 16:23-24      \* 7:8: 1Ion 3:22;  
5:14-15      \* 7:11: Iem 1:17      \* 7:12: Md 22:39-40; Lk 6:31; Lom  
13:8-10

'awanegana ilugulugu ta itautauya. Ta ba'e 'eda nana 'ebeveilaqe ana 'eda.

14 Ta yawai aqiaqina ana 'awa goyona ta ana 'eda sadana, 'inega tomotau 'evisa dimo ba'e yawai nana ilobelobea.

*'Aiwe ta vuaqina*  
(Luke 6:43-44)

15 \* “Ona 'itamakimi tovesimasimana 'e'eu'au'avidu weaqidi, mana nawale ina mai 'imia kavona sifi gumegumeidi 'idewana, ta 'esi gamodia 'idewana yubai sasasadi.

16 \* Ta edi fewayavo 'idiega nawale ona alamanidi, mana talitali gebu ana fata be vuaqina navenaqo'ai, ta wese 'ue 'idewana gebu ana fata be vuaqina nave'ala'ai.

17 Ta wese 'idewani 'aiwe aqiaqidi wese vuaqidi aqiaqidi, ta 'aiwe veifadi vuaqidi wese veifadi.

18 Vonahaqiaqi, 'aiwe aqiaqidi ge ana fata vuaqa veifadi ina vuaqayei, ta wese 'aiwe veifadi 'idewana ge ana fata vuaqidi aqiaqina ina vuaqayei.

19 \* 'Inega 'eguma taha 'aiwe ge davuaqa aqiaqi kana talaqa yavulei be kana gabuya.

20 \* 'Idewana wese tovesimasimana luveifadi vuaqidi 'idiega ana fata ona alamanidi.

*To'abiboda ge aqiaqidi weaqidi*  
(Luke 13:25-27)

21 \* “Tomotau 'eala i'awa'awa Kaiwabuyegu, ta 'idiega ge qabudi ina lugu mahala ena 'Ebeluvine

\* 7:15: Md 24:24; Via 20:29; 2Fit 2:1 \* 7:16: Gal 5:19-22; Iem 3:12

\* 7:19: Md 3:10; Lk 3:9; Ion 15:6 \* 7:20: Md 12:33 \* 7:21: Lk 6:46; Iem 1:25

'inaya, ta 'esi aiqabu Tamagu mahalaya ena nu-anua imatamatayagea e taudina adi 'aidega ina lugu.

<sup>22</sup> Vona Vetala'ai ana tuta 'inaya tomotau 'eala ina vonaya, 'Kaiwabu, afewa weaqiu ta au wawega asimana ta wese niyoana luveifadi tomotau 'idiega a'wavi 'ifoqeyedi, ta wese fewa 'ebenuavoqana 'eala aviaqidi.'

<sup>23</sup> \* 'Inega ena vonedi, 'Omi'a toluveifami, otauya! Ya'a ge taha ana tufwa eda alamanimi! "

*Ve'ita vanue ana to'eyoqona weaqidi*  
(Luke 6:47-49)

<sup>24</sup> Ta wese Iesu vonedi vonaya, "Vona diavona yaveveqayedi 'eguma aiqabu ina noqolodi ta ina viaqidi, e 'inega taudi 'idewana taha to'eyoqona ena vanue nayoqonia ena alamani aqiaqi 'inega. Nugweta ena avutugu aqiaqina navenua'ivinia ta wese ena 'oqola falafaladi 'idewana agumo naluda'edi. Ta 'inega bwa'obwa'o aqiaqinaya navetovolodi ta vanue nana nayoqonia.

<sup>25</sup> E 'inega 'eguma 'wei na'wei ta seuseu nainoqa ge nayagwei. Ta wese 'eguma yaqina natoa ge ana fata vanue nana nabuini, mana bwa'obwa'o falafalana ta wese 'oqola aqiaqidi ta waiwai.

<sup>26</sup> Ta 'eguma aiqabu egu vona inoqonoqolodi ta ge ida viaqidi, e 'inega taudi 'idewani to'eyoqona veifa, mana to'eyoqona nana ge ena avutugu davenua'ivina aqiaqiei ta wese ena 'oqolayavo gebu 'aiwe falafaladi.

<sup>27</sup> Ta wese vanue nana yoqonia gelasaya ta go'ila di'wenaya, 'inega tuta nana 'wei 'ena'ina nawebui

---

\* **7:23:** Same 6:8; 2Tim 2:19

ta seuseu nainoqa be wese yaqina natoa, 'inega vanue nana na'avala qeunia."

<sup>28</sup> Tuta nana Ieisu ena ve'ita ba'e lu'ovoidi 'inega tomotau qabudi nuadi voqana qiduana,

<sup>29</sup> \* ta ivonaya, "Luvine ana tove'itayavo edi ve'ita dawalilina, ta 'esi ba'e 'oloto nana me ena luvine ta wese me ena waiwai veve'ita."

## 8

### *Ieisu 'oloto 'wago'wagoina giveaqlaqiea (Maki 1:40-45; Luke 5:12-16)*

<sup>1</sup> Tuta nana Ieisu bwanagera webui mai 'inega qabu qiduadi i'abibodea.

<sup>2</sup> 'Inega taha 'oloto 'wago'wagoina mai Ieisu 'inaya tuqatuqanega sobadi 'iawanaya ta vonaya, "Kaiwabu, 'eguma eu nuanua 'inega una giveaqlaqiegu, mana o'a au fata."

<sup>3</sup> 'Inega Ieisu nimana si'otoia ta 'oloto nana 'wafina gitonovi ta vonaya, "Aqlaqina, eu nuanua ena viaqla, uvevunavunaqa ta uveaqlaqi!" 'Inega lukwayavonega veaqlaqi.

<sup>4</sup> \* 'Inega Ieisu vonea vonaya, "Una tauya, ta ge taha toga 'inaya una vesimasimanei tola'ai ni'a yaviaqa 'iuya, ta 'esi tunutunuqina una tauya toveguba 'idia una ve'itayeu ta ina 'awahaqiaqlieu, 'inega eu nei kavovo Yaubada 'inaya una a'ui 'idewani Mosese ena luvine vonavona. 'Inega nei kavovo nana nave'ebe'ita tomotau 'idia ta ina alamania vonigo ni'au uveaqlaqi."

---

\* **7:29:** Mk 1:22; Lk 4:32      \* **8:4:** Luvi 14:1-32; Md 9:30; Lk 17:14

*Ieisu toluavia adi tovamatana ena tofewa  
giveaqlaqiea*

*(Luke 7:1-10)*

<sup>5</sup> Ta Ieisu ni'a 'ifoqe 'abaga Kafaneumi 'inaya, 'inega taha toluavia me Loma adi tovamatana mai Ieisu 'inaya ta venoqliea vonaya,

<sup>6</sup> "Kaiwabu, taha egu tofewa vihiqa qiduana 'ewea ta vanuea lulumutula. Ta 'wafinaya visiqa 'ena'ina, ta wese ge ana fata nawayaqa."

<sup>7</sup> 'Inega Ieisu voneaya, "Aqlaqina, ena wai ta ena giveaqlaqiea."

<sup>8</sup> 'Inega tovamatana nana Ieisu ena vona ve'iea vonaya, "Kaiwabu, ge wese daluaqlaqiegu be una mai egu vanuea, ta 'esi una vonamo be 'inega egu tofewa naveaqlaqi 'evivi.

<sup>9</sup> Mana ya'a wese egu tovamatana qiduqiduadi 'ayadia yatoatoa, ta edi vona ya'abi'abibodea, ta wese ya'a egu toluaviayavo 'ayaguya itoatoa ta yaluviluvinedi. 'Inega 'eguma togama 'inaya ena vonaya, 'Utauya!' e natauya. Ta wese 'eguma togama 'inaya ena vonaya, 'Umai!' e 'inega namai, ta wese 'eguma egu tofewa 'inaya ena vonaya, 'Ba'e uvialqi!' e 'inega navialqia."

<sup>10</sup> Tovamatana nana ena vona 'inega Ieisu nuana voqana aqlaqi, 'inega ana to'abibodayavo qabudi vonedi, vonaya, "Vonahaqlaqi, ge taha toga me Isileli 'imiega eda 'ita lobei ena vetumaqana ba'e 'idewani.

<sup>11</sup> \* Ta yavonemi nawale tomotau 'eala di'we qabudi 'idiega ina va'auta Ebelamo be Aisake ta wese Iakobo maega Yaubada ena 'Ebeluvine sagalina 'inaya.

---

\* **8:11:** Lk 13:29



12 \* Ta aiqabu lova Yaubada venua'ivinidi ena 'Ebeluvine ana lugu weaqina nawale ge ina lobei, ta 'esi Yaubada ena tovale'ewayavo ina fela webuiedi 'abaga velovelovanina 'inaya. Omo'e 'inaya ina dou ta aladi navetalakikokiko.”

13 'Inega Ieisu tovatatana nana voneaya, “U'evivi utauya eu vanuea, ta eu tofewa naveaqiaqi eu vetumaqana 'inega.” Ta tuta nana 'inaya tofewa nana ni'a veaqiaqi 'evivi.

*Ieisu tomotau qabudi giveaqiaqiedi  
(Maki 1:29-34; Luke 4:38-41)*

14 'Inega Ieisu tauya Fita ena vanuea ta lugu, 'inega Fita lawana 'itedi 'wafidi lu'wea'weava ta 'ivia i'eno'eno.

15 Ta Ieisu tovevihuqa dina nimadi gitonovia, 'inega 'atuvulihidi. 'Inega iya'itoto ta 'abwaga i'iva'ava'aia Ieisu weaqina.

16 Mata'au lavilavi 'inaya tomotau ediavo imiedi Ieisu 'inaya, taudi niboana luveifadi ni'a i'wahalidi. 'Inega Ieisu ena vonega 'wavi 'ifoqeyedi, ta wese tovevihuqa qabudi giveaqiaqiedi.

17 \* Ieisu ena viaqa ba'e 'inega tovesimasimana Aisea ena vona ana aqiaqi 'ifoqe vonaya, “Tauna eda visiqa be wese ada vihiqayavo 'ewa yavuledi.”

*Tomotau nuanuadi Ieisu ina 'abibodea ta ge adi fata  
(Luke 9:57-62)*

---

\* 8:12: Md 22:13; 25:30; Lk 13:28      \* 8:17: Ais 53:4

18 Tuta nana Ieisu tomotau qabudi 'itedi itoa vivilia 'inega ana to'abibodayavo vonedi ina luvivila lavu di'wenaya.

19 'Inega taha luvine ana tove'ita mai Ieisu 'inaya ta voneaya, "Tove'ita, ma'inaya utautauya nuanuagu be ena 'abibodeu."

20 \* 'Inega Ieisu tomotau nana ve'iea vonaya, "Bwadu'e ma adi vetoa ta wese manu ma adi nevuqa, ta ya'a Tomotau Natuna ge taha egu 'ebeveyawaimo."

21 \* Wese to'abiboda taha mai Ieisu 'inaya ta vonaya, "Kaiwabu, nuanuagu ena 'abibodeu ta nugweta una awafelegu be tamagu ena ba'eyei yawaina nagumwala ta ena tavunia, e 'inega ena 'abibodeu."

22 'Inega Ieisu ve'iea vonaya, "Aqiaqina u'abibodegu, ta tomeqabu niboanidi 'ali'aligidi e taudiege edi to'aligayavo ina tavunidi."

*Ieisu yaqina waiwaina givedaumwalia  
(Maki 4:35-41; Luke 8:22-25)*

23 Ieisu ana to'abibodayavo maega igelu waga,

24 ta tuta nana ivavaukamana 'inega yaqina qid-uana 'ifoqe ta wese nufula luveafedi tuta goyona ida damana. Ta Ieisu 'eno motaiva waga gamon-aya.

25 'Inega to'abiboda dina idivanoya ivoneaya, "Kaiwabu, una iuleda mana tuta goyona kana damana!"

---

\* 8:20: 2Kol 8:9      \* 8:21: 1Kin 19:20

26 \* Ta Ieisu ve'iedi vonaya, “Tola'ai weaqina omwanimwaniniva? Omi'a emi vetumaqana goyona.” 'Inega Ieisu ya'itoto ta yaqina be wese nufula lugwaeyedi vonaya, “Olua'u!” Tuata yaqina be wese nufula 'avalagwaedi, 'inega lavu nana lu'otea.

27 'Inega nuadi voqana ta ivonaya, “To'oloto ba'e, mana yani qabuna ivelumamatayagea, ta wese yaqina be nufula bonana ivemamatayagea?”

*Ieisu niboana veifadi 'wavi 'ifoqeyedi*  
(Maki 5:1-20; Luke 8:26-39)

28 Ieisu ma enavo ivaukamana lavu di'wenaya ta ilugu me Gelasine edi di'we 'inaya. 'Inega 'oloto magilafudi niboana luveifadi ni'a i'wahalidi deba'unuyega i'ifoqe. Ta edi ilivu veifana 'ebegaululu 'inega ge taha toga ana fata di'we omo'e 'inaya natauya.

29 \* Magilafudina Ieisu i'itea 'inega ivegabegabea ivonaya, “Ei, o'a Yaubada Natuna, tola'ai una viaqi 'imaya? Luvematasabu ana 'aubena nawale, ta o'a nage ni'a umaimai sabi luvematasabuma?”

30 Ta di'wenaya bawe 'eala iduaduala ta adi to'itamakiavo itoatoa.

31 'Inega niboana luveifa dina Ieisu ivenoqiea ivonaya, “Eguma una 'wavi 'ifoqeyema, e 'inega nuanuama una luvetunema ana tauya bawe 'idia ana lugu.”

32 'Inega Ieisu vonedia, “Otau!” Tuata 'oloto magilafudina 'idiega niboana luveifadi i'ifoqe

---

\* 8:26: Md 14:31; Same 89:9      \* 8:29: Mk 1:24; Lk 4:34

'inega itauya ilugu bawe 'idia. 'Inega bawe diavona ivihila iwebui dabega i'elube'u lavuya ta ifonu.

<sup>33</sup> 'Inega bawe adi to'itamakiavo idena itauya edi 'abagaya, ta yani diavona ni'a i'itedi ediavo 'idia iveqaeyedi. Ta wese ivelulu'uyayea ma'oda 'inega 'oloto magilafudina iveaqaiaqi 'aiqa niboana luveifadi 'idiega.

<sup>34</sup> Ta totoa 'abaga qabudi itauya Ieisu 'inaya sabi 'itana, ta tuta nana ilobea 'inega ivona waiwai 'inaya vonigo edi di'we nanogei ta natauya mali di'we 'inaya.

## 9

### *Ieisu 'oloto belubeluna giveaqaiaiea (Maki 2:1-12; Luke 5:17-26)*

<sup>1</sup> \* 'Inega Ieisu wagaya gelu vaukamana 'evivi ena 'abagaya.

<sup>2</sup> 'Inega taha 'oloto belubeluna vaina tomotau ma 'ivina i'avalei imiea Ieisu 'inaya. Ta Ieisu to'avala dina edi vetumaqana 'itea 'inega tovevahiqa nana vonea vonaya, "Natugu, ge una nuavita, mana eu luveifayavo ni'a yanuataqodi."

<sup>3</sup> Ta vaina luvine ana tove'itayavo Ieisu ena vona inoqolia, e taudiega ivetala'aiedi ivonaya, "Oloto ba'e ena vona 'inega taunega givaneyea kavona tauna Yaubada 'idewani."

<sup>4</sup> \* Edi nuanua Ieisu ni'au alamania ta vonedi vonaya, "Tola'ai weaqina giwalimiega nuanua veifadi weaqidi onuanua?"

---

\* **9:1:** Md 4:13      \* **9:4:** Lk 9:47; Ion 2:25

<sup>5</sup> Ta isana ma'oda ena vona 'aiqa 'oloto ba'e 'inaya, nage ena vonaya, 'Eu ilivu luveifana ni'au yanuataqodi', nage ena vonaya, 'Uya'itoto utauya!'

<sup>6</sup> \* Ta nuanuagu ona alamani aqiaqiea ya'a Tomotau Natuna me egu luvine waiwaina, ta luvine nana ena vefewea bwa'obwa'oya, 'inega wese agu fata tomotau edi ilivu luveifana ena nuataqodi.'" Inega Iesu belubelu nana vonea vonaya, "Uya'itoto, eu 'ebana u'avalei ta utauya eu 'abagaya."

<sup>7</sup> Inega 'oloto nana ya'itoto ta tauya ena 'abagaya.

<sup>8</sup> Tuta nana qabu diavona ba'e viaqa nana i'itea 'inega nuadi voqana 'ena'ina, mana ialamani aqiaqiea vonigo Yaubada ena waiwai ba'e 'oloto nana neia ta vetunei mai tomotau 'idia. 'Inega Yaubada iawatuboya ba'e yani nana weaqina.

*Iesu Madiu gabea*

*(Maki 2:13-17; Luke 5:27-32)*

<sup>9</sup> Iesu di'we ba'e nogea ta tautauya, 'inega takesi ana to'ewa 'itea ana wawa Madiu vanue 'ebefewa 'inaya toatoa. 'Inega Iesu vonea vonaya, "Umai u'abibodegu!" 'Inega Madiu ya'itoto ta Iesu 'abibodea.

<sup>10</sup> Ta tuta nana Iesu ma ana to'abibodayavo ilugu Madiu ena vanuea sabi 'ai, 'inega takesi ana to'ewayavo 'eala be wese toveilivu veifa imai, ta Iesu ma ana to'abibodayavo maega i'ai.

<sup>11</sup> \* Ta vaidi Falisi Iesu i'itea, 'inega ana to'abibodayavo ivetala'aiedi ivonaya, "Tola'ai

---

\* **9:6:** Ion 17:2      \* **9:11:** Lk 15:2

weaqina emi Tove'ita takesi ana to'ewayavo ta wese toluveifadi maega i'ai'ai?"

<sup>12</sup> Ta Ieisu edi vona ba'e noqolia 'inega vonedi vonaya, "Taudi aqiaqidi ge daluaqiaqiedi be ina tauya togiveaqiaqi 'idia, ta 'esi tovevihiqa nuanuadi togiveaqiaqi.

<sup>13</sup> \* Ta luaqiaqiemi be Yaubada ena vona Buki Nugwenugweina gamonaya ona 'itea 'inega ona alamania ta ona nuaia, vonaya, 'Yubai ovegubayedi 'iguya ge nuanuagu, ta 'esi nuanuagu tomotau ona nuakokoloyedi.'

"Ya'a ge eda mai tunutunuqidi weaqidi, ta 'esi yamai toluveifadi sabi iuladi."

*Vetala'ai vedede weaqina*  
(Maki 2:18-22; Luke 5:33-39)

<sup>14</sup> \* 'Inega Ioni Togivebabitaiso ana to'abibodayavo imai Ieisu 'inaya ivetala'aiea ivonaya, "Ima'a ta wese Falisiavo maega vaina tuta 'inaya avevedede, ta ma'oda 'inega au to'abibodayavo ge ida vedede?"

<sup>15</sup> 'Inega Ieisu vona sesebaiega vonedi vonaya, "Tola'ai ana aqiaqi 'eguma vaqi ana toyo'oyavo ina nuavita tuta nana tovaqi me'olotona maega itoatoa? Ge taha wese ana aqiaqi! Ta nawale tuta maimai 'inaya vaina tomotau tovaqi nana ina kafia ina tauyea, 'inega enavo me edi nuavita ina vedede."

<sup>16</sup> Ta wese vona sesebaiega vonedi vonaya, "Ge ana fata be kaleko vauvauna matavusinega kaleko 'itu'ituwaina kana bwabwadei. Ge daluaqiaqiea mana nawale kana 'utuya 'inega

---

\* **9:13:** Md 12:7; Ose 6:6      \* **9:14:** Lk 18:12

bwabwada vauvauna nabwagogoma ta kaleko 'itu'ituwainana ena eabu nagive'ena'ia."

17 Wese 'idewani 'oine wagna yubai 'wafidiega weaqina Iesu vonedi vonaya, "Eguma 'oine vauvauna wage 'itu'ituwaina 'inaya kana iwaqia 'inega nawale wage nana nanabahabuya, ta 'oine nana naguiwaqa ta wese wage nana naluveifa. Ta 'esi luaqiaqiea be 'oine vauvauna kana iwaqia wage vauvauna gamonaya, 'inega magilafudi tuta kuena ina 'eno'eno."

*Iesu vivine magilafudi giveaqiaqiedi  
(Maki 5:21-43; Luke 8:40-56)*

18 Iesu nawale vonavona 'idia, 'inega me Diu edi toluvine taha mai, ta Iesu 'iawanaya tuqatuqanega sobadi ta voneaya, "Kaiwabu, natugu mevavinena yawaina ni'a gumwala, ta nuanuagu una mai be nimauyega 'wafina una gitonovi 'inega nayawaha 'evivi."

19 'Inega Iesu ya'itoto ta toluvine nana maega itutuvila itauya, ta wese ana to'abibodayavo 'idewani.

20 Nawale itautauya 'inega taha vavine gwavudiega mai ta Iesu ana kwakwalufai noyana gitonovia. Vavine nana vihiqa 'ena'ina 'ewea 'inega sulalina inoinoqa ya'wala tuwelo gamonaya,

21\* ta nuanega vonaya, "Eguma Iesu ana kwakwalufai ena gitonoviamo e 'inega ena veaqiaqi."

22 'Inega Iesu givila ta vavine nana 'itea vonaya, "Novugu, ge una nuanua ta 'esi una qaiawa, eu

---

\* 9:21: Md 14:36

vetumaqana 'inega ni'a uveaqlaqi." Ta omo'e tuta nana 'inaya vavine nana veaqlaqi.

23 'Inega Ieisu 'ifoqe lugu toluvine nana ena vanuea, 'inega todou ta wese to'ewabamu 'itedi ta bonadi veago va'ine.

24 'Inega Ieisu vonedi vonaya, "O'ifoqe! Gwama ba'e ge da'aliga ta 'esi 'eno motaiva 'eno'eno." 'Inega todou Ieisu idagiea.

25 'Inega qabu diavona i'ifoqe ta Ieisu lugu gwamana 'inaya ta nimanaya kafi, e 'inega gwama nana ya'itoto.

26 Ta 'abiboda vale ba'e yawala di'we qabuna 'idia.

*Ieisu matakwaya magilafudi giveaqlaqiedi*

27 \* Ieisu omo'e di'we nana nokea ta tautauya, 'inega matakwaya magilafudi i'abi'abibodea ta igabagaba ivonaya, "Deibida tubuna ye, uda nukolokoloyema!"

28 'Inega vanuea lugu ta magilafudina imai 'inaya ta Ieisu vonedi vonaya, "Ma'oda, nage ovetumaqanegu be agu fata matami ena giveaqlaqiedi?"

Ta ive'iea ivonaya, "Ao Kaiwabu, au fata."

29 'Inega Ieisu matadi gitonovia ta vonedia, "Emi vetumaqana 'inega matami ina veaqlaqi",

30 \* 'inega magilafudi matadi 'eaea ta Ieisu luvine waiwaina neidi vonaya, "Ge taha toga 'inaya ona vonayei ba'e weaqina!"

31 Ta itutuvila itauya, 'inega Ieisu Valena iyawala dadanea di'we qabuna 'idia.

---

\* 9:27: Md 20:29-34      \* 9:30: Md 8:4



*Ieisu nakunaku taha giveaqlaqiea*

<sup>32</sup> 'Oloto magilafudina ni'a itauya ta Ieisu ma ana to'abibodayavo nawale itoatoa, 'inega vaina tomotau taha 'oloto imiea Ieisu 'inaya. 'Oloto ba'e ge ana fata naveqae mana niboana luveifana meana givilea.

<sup>33</sup> \* Ta tuta nana Ieisu niboana luveifana 'wavi 'ifoqeyea 'inega 'oloto nana veaqlaqi ta veveqae. Ta tomotau qabudi nuadi voqana 'inega ivonaya, "Tuta lova 'inega be ana laba ba'itagana ge taha toga ena viaqa ba'e 'idewani kada 'itea Isileli gamonaya."

<sup>34</sup> \* Ta Falisi ivonaya, "Tauna niboana luveifadi 'wavi'wavi 'ifoqeyedi niboana luveifadi edi kaiwabu ena waiwaiege."

*Ieisu tomotau nuakolokoloyedi*

<sup>35</sup> \* 'Inega Ieisu 'abaga agoagodi be goyogoyodi 'idia luvivila ta edi vanue tafwalolo 'idia ve'ita ta lugaihi Yaubada ena 'Ebeluvine valena weaqina, ta wese vihiqa qabudi tomotau 'idiega giveaqlaqiedi.

<sup>36</sup> \* Ta tuta nana Ieisu qabu qiduana 'itedi 'inega 'ita nuaduyedi, mana me edi nuavita itoatoa ta wese ge adi toiulamo, 'inega qabu dina kavona sifi luluve'waividi ge adi to'itamakimo.

<sup>37-38</sup> \* 'Inega ana to'abibodayavo vonedia, "Boli-mana qiduana ana tuta ni'a 'ifoqe ta toala ge 'ealidi, 'inega bolimana ana Kaiwabu 'inaya ona

---

\* **9:33:** Mk 2:12      \* **9:34:** Md 12:24; Mk 3:22; Lk 11:15      \* **9:35:**  
Md 4:23; Mk 1:39      \* **9:36:** Sek 10:2; Naba 27:17; 1Kin 22:17; Md  
14:14; Mk 6:34      \* **9:37-38:** Lk 10:2

venoqi be yaqisa tofewa 'eala navetunedi ena vaoya qaya sabi ala."

## 10

*Ieisu ena tovaletuyana adi wawayavo  
(Maki 3:13-19; Luke 6:12-16)*

<sup>1</sup> \* Ieisu ana to'abibodayavo adi yau tuwelo gabedi ta ena luvine be wese ena waiwai neidi, 'inega adi fata niboana luveifadi tomotau 'idiega ina 'wavi 'ifoqeyedi, ta wese vihiqa qabudi tomotau 'idiega ina giveaqaqiedi.

<sup>2</sup> Tovaletuyana tuwelo dina adi wawa ba'e: Nugweta Saimoni tauna igabea Fita, 'inega taina Anidulu be wese Iemesa ma taina Ioni, taudi tamadi Sebedi.

<sup>3</sup> Ta wese Filifi be, Batolomio be Tomasi ta wese Madiu, tauna takesi ana to'ewa. Ta wese Iemesa tauna Alifio natuna be Tadiasi,

<sup>4</sup> ta wese Saimoni tauna Seloti edi qabu 'idiega, be wese Iudasa Isakaliota, tauna Ieisu ana tosulua.

*Tovaletuyana edi fewa  
(Maki 6:7-13; Luke 9:1-6)*

<sup>5</sup> Ieisu tuwelo dina vebibinedi ta vetunedi vonaya, "Ge ona tauya taudi ge me Diu 'idia, ta wese gebu Samelia 'abaganavo 'idia ona lugu.

<sup>6</sup> \* Ta 'esi ona tauya me Isileli 'idia, mana vaina qabu 'idiega edi toa kavona sifi luluve'waividi.

<sup>7</sup> \* 'Inega ona tauya ona lugaihi 'idia ona vonaya, 'Yaubada ena 'Ebeluvine tuta goyona na'ifoqe.'

---

\* **10:1:** Mk 6:7; Lk 9:1    \* **10:6:** Iel 50:6    \* **10:7:** Md 3:2; 4:17; Lk 10:9,11

<sup>8</sup> Tovevihuqayavo ona giveaqaqiedi be to'aliga ona giveya'itoto 'eviviedi be 'wago'wagoidi ona giveaqaqiedi ta ina vevunavunaqa, be wese niboana luveifadi tomotau 'idiega ona 'wavi 'ifoqeyedi. Yaubada ena veyoluba ni'au nei kavovomi 'inega wese luaqiaqiemi omi'a ona fewa kavovo tomotau 'idia, ta ge ve'ia weaqina ona nuanua.

<sup>9</sup>\* "Ta emi luvivila 'inaya gebu mane ona dodoi emi kodekodea 'abwaga weaqina,

<sup>10</sup>\* ta ge emi kode ona 'ewei, ta wese ge ami kaleko vemagilafuna. Ta wese 'aqeyafayafa be kewala ge ona 'ewedi, mana tofewa ba'e yani diavona adi fata ina lobedi tomotau 'idiega.

<sup>11</sup> Ta 'eguma 'abaga agona nage goyona 'inaya ona tauya nugweta ona sali togama ena ilivu aqiaqina, 'inega maega ona toatoa ana laba 'abaga nana ona nogea.

<sup>12</sup>\* Ta 'eguma taha vanue 'inaya ona lugu 'inega nugweta tonivanue ona lukaiwa 'idia,

<sup>13</sup> ta 'eguma ena susuyavo edi ilivu aqiaqina 'inega ona vona veyolubedi, ta 'eguma gebu 'inega ge taha tola'ai ona vonei 'idia.

<sup>14</sup>\* Ta 'eguma ge taha toga na'ebe'ewemi ena vanuea nage emi vona ge nanoqonoqoli, e 'inega 'abaga nana ona nogei, ta 'aqemiega fwayafwaya ona vavutuvutuqia ta ona tauya.

<sup>15</sup>\* "Vonahaqiaqi, nawale vetala'ai ana 'aubena 'inaya Yaubada me Sodoma be wese me Gomola naluvematasabudi, ta yavona aqiaqiemi

---

\* **10:9:** Lk 10:4      \* **10:10:** Lk 10:7; 1Kol 9:14      \* **10:12:** Lk 10:5-6

\* **10:14:** Lk 10:10-12; Via 13:51      \* **10:15:** Md 11:24; Iud 7

tomeqabu ge ida 'ebe'ewemi edi vanuea nawale 'aubena nana 'inaya luvematasabu ago va'inena ina lobe a Yaubada 'inega.

*Jeisu ena tovaletuyanayavo nawale vita ina lobe a*

*(Maki 13:9-13; Luke 21:12-17)*

16 \* “Onogolia! Omi'a yavevetunemi kavona sifi 'idewani yubai sasasadi nuanidia. 'Inega ona 'itamaki aqiaqiemi ta tuta qabuna ona veilivu aqiaqi.

17 \* Vonahaqiaqi, ona 'itamakimi, mana nawale tomotau ina tauyemi kotu 'inaya be vanue tafwalolo 'inaya ina vunuqa dadanemi wayo metametanega.

18 Ta wese tomotau ina tauyemi tolumineavo be kiniavo 'iawadia ta ina ve'ewemi, mana omi'a agu to'abibodayavo. Ta omo'e tuta nana 'inaya Valegu Aqiaqina ona simanea 'idia, ta wese taudi ge me Diu 'idia.

19 Ta tuta nana ina ve'ewemi tolumineavo 'iawadia ge ona nuana ma'oda ona vona 'aiqa, mana nawale tuta nana 'inaya Yaubada emi vona naneimi,

20 \* ta omi'a ge ona vona, ta 'esi Yaubada Niboan-ina 'imia toatoa navonavona.

21 \* “Inega 'oloto taina nasuluvei tolumineavo 'idia be ina luve'aligia, be wese tauna natuna nasuluvea be ina luve'aligia, ta wese gogama inadiavo be tamadiavo ina vevoalanedi 'inega ina awafeledi toluve'aliga 'idia.

\* **10:16:** Lk 10:3; Lom 16:19

\* **10:17:** Mk 13:9-11; Lk 12:11-12;

21:12-15 \* **10:20:** Ion 14:26

\* **10:21:** Mai 7:6; Md 10:35; Mk

13:12; Lk 21:16

22 Ta tomotau qabudi ina vevoalanemi mana omi'a agu to'abibodayavo. Ta tomeqabu ina to-volo'i'ita ana laba tuta ana 'ebelu'ovoa 'inaya, e taudi yawai vataya ina lobeaa.

23 Ta 'eguma taha 'abaga 'inaya ina veilivu veifa 'imia, 'inega ona dena mali 'abaga 'inaya. Yavona aqiaqiemii, emi fewa nana ge ona lu'ovoi 'abaga qabudi Isileli gamonaya ana laba ya'a Tomotau Natuna ena 'evivi ena mai.

24 \* "To'abiboda gebu ana fata ena tove'ita naveago va'inei, 'idewani wese tofewa gebu ana fata ena kaiwabu naluvinei.

25 \* Tola'ai 'ifo'ifoqe ya'a emi Tove'ita 'iguya, e nawale wese 'idewani na'ifoqe 'aiqa omi'a to'abiboda 'imia. Ta tola'ai 'ifo'ifoqe kaiwabu taha 'inaya, e wese 'idewani na'ifoqe ena tofewa 'inaya. Ta ya'a emi Kaiwabu ni'a i'awaluveifegu ivonaya be vonigo ya'a niboana luveifadi edi kaiwabu Belisibubi, e 'inega nawale omi'a egu qabuyavo wese 'idewani ina 'awaluveifa aqiaqiemii.

### *Mwaniniva weaqina*

*(Luke 12:2-7)*

26 \* "Inega taudi togivegaululu gebu ona mwaninivedi, mana yani qabuna 'wai'waividi nawale Yaubada nave'ifoqeyedi, ta tola'ai edi nuanua 'inaya i'waivea wese nave'ifoqeyedi.

27 Inega tola'ai velovelovana 'inaya yasimanea 'imia, 'aubenaya ona simanayea tomotau qabudi 'idia, ta tola'ai yave'awahayayayea 'imia omi'a ona simana 'ifoqeyea.

---

\* **10:24:** Lk 6:40; Ion 13:16; 15:20      \* **10:25:** Md 9:34; 12:24; Mk 3:22; Lk 11:15      \* **10:26:** Mk 4:22; Lk 8:17

28 \* “Ta taudi nuanuadi ’wafimi ina luve’aligia gebu ona mwaninivedi, mana taudi ’wafi mimo ana fata ina luve’aligia ta niboanimi gebu. Ta ’esi luaqiaqiemu be Yaubada ona mwaninivea, mana tauna ana fata ’aiwe ’ala’alata ’inaya ’wafimi ta wese niboanimi naluveawalidi.

29 Dagedage magilafudi kagimwanedi adi ve’ia siliba ’agedanega ta tua Yaubada ’ita’itamakidi, ta ’eguma taha ’idiega na’aliga e Tamami ni’a alama-nia.

30 Ta wese Yaubada debami adi yau tawa alamanidi.

31 \* ’Inega gebu giwalimi naha’ala tomotau weaqidi mana omi’a Yaubada ena yani qiduana, ta ’abiboda dagedage.

32 “Eguma tomeqabu ina ’awahaqiaqiegu tomotau matadia, nawale wese ya’a Tamagu mahalaya matanaya ena ’awahaqiaqiedi.

33 \* Ta ’eguma tomeqabu ina vegeqegu tomotau matadia, nawale wese ya’a Tamagu mahalaya matanaya ena vegeqedi.

*Vevoalana gade nuanidia*

*(Luke 12:51-53; 14:26-27)*

34 “Ge ona vonaya be ya’a eda mai bwa’obwa’oya be toadaumwala eda miei, ta ’esi egu mai ’inega vetoatoasi’i na’ifoqe tomotau nuanidia.

35 \* Ta egu mai nana ’inaya,  
 ‘Gwama me’olotona tamana navevoalanea,  
 ta wese gwama mevavinena inana  
 navevoalanedi,

---

\* 10:28: Iem 4:12 \* 10:31: Md 6:26 \* 10:33: Mk 8:38; Lk 9:26;  
 2Tim 2:12 \* 10:35: Mai 7:6

ta vavine vaqivaqidi lawadi ina vevoalane*di*,  
<sup>36</sup> ta taha 'oloto ena gade gamodiega ina  
 vevoalanea.'

<sup>37</sup> "Eguma taha toga veveyolubegu ta ena  
 veyoluba tamana be inana 'idia veqidua va'inegu  
 'inega ge ana fata na'abibodegu. Ta wese  
 'idewani 'eguma taha toga veveyolubegu ta ena  
 veyoluba natuna me'olotona nage mevavinena  
 'idia veqidua va'inegu e 'inega ge ana fata be  
 na'abibodegu.

<sup>38</sup> \* Ta 'eguma togama yawaina ge nahawafela  
 aqiaqiei 'iguya ta ge nuanuana yuvaqa be veilage  
 nalobei 'idewani ya'a nawale ena lobe*a* 'etoluai  
 'inaya, e tauna ge agu fata be ena 'awanatunea.

<sup>39</sup> 'Eguma taha toga taunega yawaina weaqina  
 fewafewa nawale yawaina naluve'waivia, ta 'esi  
 'eguma taha toga yawaina naluve'waivia weaqigu  
 e nawale yawai aqiaqina nalobe*a*.

*Ve'ia weaqina*  
*(Maki 9:41)*

<sup>40</sup> \* "Ta omi'a 'eguma taha toga na'ebe'ewemi  
 'inega tauna wese na'ebe'ewegu. Ta 'eguma  
 taha toga na'ebe'ewegu 'inega wese agu Tove*tune*  
 na'ebe'ewea.

<sup>41</sup> Ta 'eguma taha tomotau taha tovesimasi-  
 mana na'ebe'ewea mana tauna Yaubada ena  
 tovesimasimana, 'inega tomotau nana nawale  
 ana ve'ia na'ewea 'idewani tovesimasimana ana  
 ve'ia. Ta wese 'eguma taha tomotau taha 'oloto  
 tunutunuqina na'ebe'ewea mana tauna 'oloto

---

\* **10:38:** Md 16:24-25; Mk 8:34-35; Lk 9:23-24; 17:33; Ion 12:25

\* **10:40:** Mk 9:37; Lk 10:16; Ion 13:20

tunutunuqina, e 'inega nawale tomotau nana ana ve'ia nalobea 'idewani 'oloto tunutunuqina ana ve'ia.

<sup>42</sup> Ta 'eguma taha tomotau agu to'abiboda vauvauna go'ila fayou'una navenumea mana tauna agu to'abiboda, 'inega yavona aqiaqiemi tomotau nana nawale ana ve'ia aqiaqina na'ewea."

## 11

<sup>1</sup> Ieisu ena lugaihi lu'ovoia ana to'abibodayavo tuwelo 'idia, 'inega di'we nana nokea ta luwivila 'abaga taha taha 'idia, ta omo'e 'inaya veve'ita ta wese lulugaihi.

*Ioni Togivebabitaiso Ieisu Valena noqolia*  
(*Luke 7:18-35*)

<sup>2</sup> Ioni Togivebabitaiso ni'au ia'uya vanue 'ebeyoqona 'inaya, ta tuta nana To'etoyavua ena fewa valena noqolia, 'inega vaina ana to'abibodayavo vetunedi itauya Ieisu 'inaya,

<sup>3</sup> ta ivetala'aiea ivonaya, "Ima'a To'etoyavua Keliso aba'eba'eyea. Nage o'a tau'u To'etoyavuauna, nage mali 'oloto weaqina ana ba'eba'e?"

<sup>4</sup> 'Inega edi vona Ieisu ve'evivia vonaya, "Ona 'evivi Ioni 'inaya ta yani diavona ni'au o'itedi ta onoqolidi ona veqaeyea 'inaya, 'idewani

<sup>5</sup> \* matadi kwayakwayana ni'au i'ita'ita aqiaqi ta wese 'aqedi veifana ni'au iveaqiaqi iyabayaba, wese 'wago'wagoidi 'wafidi veaqiaqi 'evivi, ta taniqadi kwavakwavana ni'au vona inoqonoqolia, ta to'aliga iyawaha 'evivi, ta wese lukwalukwadi vale aqiaqina ni'au inoqolia.

---

\* 11:5: Ais 35:5-6; 61:1



6 'Inega ona tauya Ioni 'inaya ta ona vonea ge wese navenuana magilafu ya'a togama, mana 'eguma taha toga ena vetumaqana weaqigu gebu nadawalili 'inega tauna naqaiawa."

7 Tuta nana Ioni ana to'abibodayavo i'evivi itautauya, 'inega Iesu qabu diavona Ioni weaqina simana 'idia vonaya, "Lova qabumi di'we 'ava'avaya otauya Ioni sabi noqolina, ta tola'ai ovonaya be oda 'itei? Nage otauya taha 'oloto dawalilina kavona didiala yaqina dayueyuei sabi 'itana? Ana 'ita gebu.

8 Nage otauya taha 'oloto ana kaleko kaikai-wabuna sabi 'itana? Gebu, mana taudi adi kaleko kaikaiwabuna toluvine qiduqiduadi edi vanuea itoatoa.

9 Ta tola'ai weaqina otauya di'we 'ava'avaya? Nage onuaia vonigo tovesimasimana taha oda 'itei? Vonahaqiaqi, 'oloto nana ni'a o'itea tovesi-masimanayavo qabudi veqidua va'inedi.

10 \* Ioni nana weaqina lova Yaubada ena vona Buki Nugwenugweina 'inaya ba'e 'idewani simanea vonaya,

'Ba'e egu tovaletuyana ena vetunea natauya ta eu 'eda naqadalia.' "

11 'Inega Iesu wese vonaya, "Vonahaqiaqi, Ioni Togivebabitaiso tauna totoa bwa'obwa'o qabudi veqidua va'inedi, ta taudi ge adi wawa 'ena'ina mahala ena 'Ebeluvine gamonaya Ioni iveqidua va'inea.

12 \* Ta Ioni Togivebabitaiso ena tuta 'inega be

---

\* 11:10: Mal 3:1; Lk 1:76 \* 11:12: Lk 16:16

ana laba ba'itagana tomotau nuanuadi edi waiw-  
iega mahala ena 'Ebeluvine ina 'ewea.

<sup>13</sup> Lova tovesimasimanayavo qabudi edi von-  
ayavo be Mosese ena luvineavo 'idiega iveta-  
lasimasimanea 'Ebeluvine nana weaqina ana laba  
Ioni mai.

<sup>14</sup> \* Ta 'eguma nuanuami be tovesimasi-  
manayavo edi vona ona 'awahaqiaqiea 'inega  
ona alamani aqiaqiea Ioni tauna Ilaitia. Mana  
taudi tovesimasimana diavona ena mai weaqina  
lova isimanea.

<sup>15</sup> 'Inega 'eguma ma teniqami vona ba'e ona  
noqolidi!

<sup>16</sup> "Inega omi'a lagata ba'e ma'oda ena ve-  
talatutula 'aiqa weaqimi? Nage ena vonaya  
vonigo omi'a 'idewana gogama 'ebevegimwane  
ana 'abaga gamonaya ilahalaha ta ediavo 'idia  
igabagaba ivonavonaya,

<sup>17</sup> 'Emavo, ma'oda 'inega alavulavua ta ge oda  
ouou.

Ta wese a'ewa'ewabamu ta ge oda doudou.'

<sup>18</sup> Vetalatutula ba'e ana alamani, Ioni mai ta ge  
da'ai ta wese ge danuma, ta 'inega omi'a ovonaya,  
'Niboana veifana lugu Ioni 'inaya.'

<sup>19</sup> \* Ta ya'a Tomotau Natuna yamai be ya'ai'ai  
ta yanumanuma ta wese weaqigu olugwae ovon-  
avonaya, "Oloto ba'ena to'ai ta tonuma va'ine, ta  
wese takesi ana to'ewayavo be wese luveluveifadi  
veiaianedi.' Nawale tomotau Yaubada ena ala-  
mani aqiaqi ina 'itea vuaqa aqiaqina 'inega."

---

\* **11:14:** Mal 4:5; Md 17:10-13; Mk 9:11-13      \* **11:19:** Md 9:10

*Vaina 'abaga luveifadi adi luvematasabu  
(Luke 10:13-15)*

20 Ieisu 'abaga taha taha 'idia viaqa waiwaidi viaqidi, ta 'abaga diavona adi totoayavo ge ida nuagivila edi luveifayavo 'idiega, 'inega lugwaeyedi vonaya,

21 \* “Omi'a me Kolesini be wese me Bedesaida nuakolokolomi, mana 'ebenuavoqana diavona ni'au yaviaqidi 'imia ta ge oda nuagivila. Ta 'eguma me Taia be wese me Saidoni ba'e viaqa diavona lova eda viaqidi matadia e 'inega ida nuagivila ta edi vaiqavu 'inega taudiega ida ve'itayedi tawa edi ilivu luveifana 'idiega ni'a inuagivila.

22 Ta yavona aqiaqiemi, vetala'ai ana 'aubena 'inaya nawale me Taia be wese me Saidoni Yaubada naluvematasabudi, ta omi'a luvematasabu qidua va'inena ona lobe.

23 \* Ta me Kafaneumi omi'a ma'oda? Vonigo taumiega ogivaneyemi mahalaya, wa? Ta ge ami fata! Ta 'esi nawale to'aliga edi 'abagaya ina a'uwebuiemi, mana 'ebenuavoqana dina ni'au yaviaqidi 'imia ge oda nuagivila 'idiega. Ta 'eguma lova me Sodoma 'idia ba'e viaqa diavona eda viaqidi ida nuagivila, 'inega Yaubada ge daluveawalidi ta ba'itagana edi 'abaga nawale kada 'itea da'eno'eno.

24 \* 'Inega vetala'ai ana 'aubena 'inaya Yaubada nawale me Sodoma naluvematasabudi, ta omi'a luvematasabu qidua va'inena ona lobe.”

---

\* **11:21:** Ais 23:1-18; Isi 26:1-28:26; Ioe 3:4-8; Emo 1:9-10; Sek 9:2-4

\* **11:23:** Ais 14:13-15; Nug 19:24-28 \* **11:24:** Md 10:15; Lk 10:12

*Toa aqiaqina Ieisu 'inega*  
(*Luke 10:21-22*)

25 \* Ba'e vona diavona 'abibodanaya Ieisu venoqi vonaya, "Kaiwa Tamagu, o'a mahala ta bwa'obwa'o adi Toluvine, alamani ba'e ua'ukwaivea toalamaniavo ta tonua'eqa'u 'idia, ta 'esi tomotau kavokavovo alamani nana ni'a ugive'ifoqeyea 'idia.

26 Tamagu, vonahaqiaqi ba'e eu nuanua aqiaqina."

27 \* Ta wese vonaya, "Yani qabuna Tamagu ni'a a'uya nimaguya. Ge taha toga dahalamanigu ta Tamagu ana 'aidegamo. Ta wese ge taha toga Tamagu dahalamaniana, ta ya'a agu 'aidega. Ta wese 'eguma tomeqabu Tamagu nuanuadi ina alamaniana 'inega ya'a alamani nana ena give'ifoqeyea 'idia.

28 \* "Ta omi'a emi 'onena vitana ona mai 'iguya be veyawai ena neimi.

29 Egu 'ebe'avala bai'wana ona 'ewei ona 'avalayea, ta ona vetutumegu mana ya'a tonuawebui ta egu ilivu nuvana, 'inega veyawai 'iguyega ona lobeaya waimi weaqina.

30 \* Mana egu bai'wana ge vitana, ta wese egu 'onena meaqana."

## 12

*Ieisu Sabate ana Kaiwabu*  
(*Maki 2:23-28; Luke 6:1-5*)

---

\* **11:25:** 1Kol 1:26-29      \* **11:27:** Md 28:18; Ion 1:18; 3:35; 10:15;  
17:2      \* **11:28:** Iel 31:25      \* **11:30:** 1Ion 5:3

1 \* Ge tuta kuena 'abibodanaya taha Sabate 'inaya Ieisu ana to'abibodayavo maega vaoqa gamonega itautauya, ta to'abiboda dina ma botanidi 'inega witi vuaqina ma walona i'egigoluya ta i'ai'ai.

2 \* Ta tuta nana Falisiavo i'itedi 'inega Ieisu ivoneaya, "Kaiwabu u'itei, au to'abibodayavo Sabate ana luvine ibaia ba'e viaqa nana 'inega, waisa?"

3 \* Ta Ieisu edi vona ve'evivia vonaya, "Nage ge oda avoi Buki Nugwenugweina 'inaya i'wayavia, Deibida ma enavo taudi wese 'edewani ibotana?"

4 \* 'Inega Yaubada ena vanuea lugu ta beledi gwalagwalana 'ewei 'inega i'ainia, ta beledi nana ma ana luvine vonigo toveguba dimo adi luaqiaqi be ina 'ainia. 'Inega ge ana fata Deibida ma enavo beledi nana ina 'ai, ta ibotana 'inega tua i'ainia.

5 \* Nage wese ge oda avoi Mosese ena luvine gamonaya vonigo Vanue Gwalagwalana ana tovegubayavo Sabate 'aidega 'aidega Sabate ana luvine iqeueunia edi veyoveyoa 'inega, ta ge taha adi ve'ewamo?

6 \* Ta yavona aqiaqiemi, Vanue Gwalagwalana yani qiduana, ta taha tomotau ni'a mai toatoa, ta tauna vanue nana veqidua va'inea.

7 \* Buki Nugwenugweina ena vona vonaya, 'Nuakolokolo nuanuagu ta ge guba yubai 'idiega.'  
"Eguma vona ba'e ana alamani oda alamania 'inega gebu agu to'abibodayavo oda ve'ewedi, mana ge taha luveifana ida viaqi.

\* 12:1: Luve 23:25      \* 12:2: 'Ifo 20:10      \* 12:3: 1Sam 21:1-6

\* 12:4: Luvi 24:5-9      \* 12:5: Naba 28:9-10      \* 12:6: Md 12:41-42

\* 12:7: Ose 6:6; Md 9:13

8 Mana ya'a Tomotau Natuna Sabate ana Kai-wabu."

*Isisu 'oloto nimana belubeluna giveaqlaqla*  
(Maki 3:1-6; Luke 6:6-11)

9 'Inega Isisu 'abaga nana nogea ta tauya edi vanue tafwalolo 'inaya lugu.

10 \* E omo'e 'inaya taha 'oloto 'itea nimana belubeluna toatoa. Ta Falisiavo nuanuadi taha luveifana ina lobeia Isisu 'inaya, be yaqlaqla adi fata ina ve'eweia 'inega ivetala'aiea ivonaya, "Kai-wabu, nage ana fata Sabate 'inaya tovevihuqa kana giveaqlaqla?" Ta ivonaya be Isisu ena vona 'evivi 'inega ina tauyeya toluvine 'idia ta ina vekotuya.

11 \* 'Inega Isisu vona 'eviviedi vonaya, "Omi'a 'eguma taha toga 'imiega ena sifi 'aidegana Sabatea nabe'u vetoaya 'inega nuanuana nalihi vaneyea, waisa?"

12 Vonahaqlaqla, sifi yani goyona, ta tomotau yani qiduana 'inega ana fata Sabatea iula aqlaqla kana neidi kana viaqlaqla."

13 'Inega Isisu 'oloto nana vonea vonaya, "Nimau usi'otoi!" Tuata 'oloto nana nimana si'otoia 'inega veaqlaqla 'evivi 'edewani nimana di'wena.

14 \* 'Inega Falisiavo vanuega i'ifoqe ta adi 'aidega idima govaqa ma'oda Isisu ina luve'aliga 'aiqlaqla.

*Yaubada ena tofewa vevenua'ivinina*

---

\* 12:10: Lk 14:3      \* 12:11: Lk 14:5      \* 12:14: Ion 5:16

15 Ta edi dima Ieisu ni'au alamania 'inega 'abaga omo'e nogea tauya mali di'we 'inaya. Ta tomotau 'eala i'abibodea, ta omo'e 'inaya tovevihiqa qabudi giveaqaqiedi,

16 \* ta wese luvinedi ge ina vevonavonayei tomotau 'idia.

17 Ba'e 'inega tovesimasimana Aisea Yaubada ena vona ana aqiaqi ve'ifoqeyea Ieisu weaqina, mana lova vonaya,

18 \*\* "Ba'e egu Tofewa yavenua'ivinea

ta me egu qaiawa giwaliguyega yaveveyolubea.

Niboanigu ena a'uya 'inaya, be luvine tunutunuqina

'iguyega nasimanea taudi ge me Diu 'idia.

19 Tauna nawale ge nave'ae'aetoga ta wese ge navekolukolua,

be wese 'abaga gamonaya ge bonana qiduanega navonavona.

20 Ta tomeqabu dawalilidi 'idewani didiala baibaina gebu nanogedi,

ta wese taudi edi vetumaqana dawalilina kavona odamu niginigina

ge nanogedi ina 'weu, ta 'esi naiuledi,

ana laba tauna luvine tunutunuqina nave'ifoqeyea ena waiwai 'inega.

21 Ta wese tauna ana wawa 'inega di'we taha taha ana totoayavo ina lu'ita vane 'etoyavua weaqina."

*Ieisu ta Belisibubi*

*(Maki 3:20-30; Luke 11:14-23)*

---

\* 12:16: Md 8:4; Mk 3:12 \* 12:18: Ais 42:1-4 \* 12:18: Md 3:17

22 'Inega taha 'oloto lova niboana luveifadi edi fewega matana ikwayea ta wese meana igivilea 'inega ge ana fata naveqae imiea Ieisu 'inaya ta giveaqaqiea. 'Inega 'abiboda 'oloto nana ana fata naveqae ta wese na'ita.

23 'Inega tomotau qabudi nuadi voqana Ieisu ena viaqa weaqina ivonaya, "Nage ba'e 'oloto nana Deibida tubuna?"

24 \* Ta Falisiavo Ieisu ena viaqa ba'e valena inoqolia ivonaya, "Ba'e yani nana ana fata, mana niboana luveifadi edi kaiwabu ana wawa Belisibubi ena waiwaiega niboana luveifadi 'wavi'wavi 'ifoqeyedi."

25 Ta Ieisu edi nuanua ni'au alamania 'inega vonedi vonaya, "Belisibubi tauna enavo ge nu-anuana na'wavi 'ifoqeyedi." Ta wese vonaya, "Eguma taha 'ebeluvine 'inaya tomotau nuanidia ve'eto'eto'idi 'ifoqe ta taudiega ivevedavi, 'inega nawale 'ebeluvine nana nadawalili ta naluveifa. Wese 'eguma 'abaga nage gade 'idewana nuanidia 'eto'idi na'ifoqe nawale ina toasi'i be edi toa naluveifa.

26 Seitani wese 'idewana 'eguma ma enavo taudiega ina vedavi 'inega edi toa naluveifa ta wese ena 'ebeluvine naqeunia.

27 Ni'a ovonaya vonigo ya'a Belisibubi ena waiwaiega niboana luveifadi ya'wavi 'ifoqeyedi, ta ami to'abibodayavo togama isana ena waiwaiega i'wavi'wavi 'ifoqeyedi? Belisibubi 'inega nage Yaubada 'inega? Ba'e weaqina ona nuanua, 'inega wese nuami na'eqa'uya vonigo emi ve'ewa 'iguya ge taha ana vonahaqiaqi!

---

\* 12:24: Md 9:34; 10:25



28 \* Ta ya'a Yaubada Niboanina ena waiwaiega niboana luveifadi ya'wavi'wavi 'ifoqeyedi, 'inega ona alamania vonigo Yaubada ena 'Ebeluvine ni'au 'ifoqe mai 'imia.

29 “Ebevetalatutula ba'e ona noqolia: 'Oloto waiwaina ena vanuea ge taha toga ana fata nalugu be ena kulufa na'ewedi. Ta 'esi 'eguma tovanawala nugweta wayoyega tovewaiwai nana ni-mana be wese 'aqena nayoqonia, e 'inega 'abiboda ana fata vanuea nalugu be ena kulufa na'ekilidi.

30 \* 'Eguma taha toga gebu agu toiula 'inega tauna agu avia. Ta wese 'eguma taha toga ge naiulegu ta tomotau ge nava'auqidi namiedi 'iguya, e tauna egu fewa ana togiveluveifa.

31 \* “'Inega ba'e yavona aqiaqiemi, tomotau edi luveifana ta wese edi vona veifa qabuna Yaubada nanuataqodi. Ta 'eguma taha toga Niboana Gwalagwalana na'awaluveifea 'inega Yaubada ge ana fata tomotau nana nanuataqoi.

32 'Eguma taha toga ya'a Tomotau Natuna na'awaluveifegu 'inega Yaubada nawale tomotau nana nanuataqoya. Ta 'eguma taha toga Niboana Gwalagwalana na'awaluveifea 'inega Yaubada ge ana fata nanuataqoi tuta ba'e 'inaya ta wese tuta maimai 'inaya.”

*'Aiwe vuaqidi*

*(Luke 6:43-45)*

33 \* Ta Iesu wese vonedi, “'Eguma 'aiwe aqi-aqina 'inega wese vuaqina aqiaqina, ta 'eguma

---

\* 12:28: Via 10:38; 1Ion 3:8 \* 12:30: Mk 9:40; Lk 9:50 \* 12:31: Ibe 6:4-6 \* 12:33: Md 7:16-20

'aiwe luveifana wese vuaqina luveifana. 'Inega 'aiwe taha taha kana alamanidi vuaqidi 'idiega.

34\* Omi'a mwata natunavo, 'inega gebu ami fata vona aqiaqidi ona vonayedi mana omi'a luveluveifami. Ta tola'ai luveifana giwalimia 'eno'eno va tuta qabuna 'awamiega i'ifo'ifoqe.

35 Taha 'oloto aqiaqina giwalinega nuanua aqiaqidi i'ifo'ifoqe, ta wese 'idewani 'oloto luveifana giwalinega yani veifadi i'ifo'ifoqe.

36 'Inega yavonemi vetala'ai ana 'aubena 'inaya omi'a emi vona kavokavovo weaqina Yaubada navetala'aiemi 'inega ona vona 'ifoqeyedi.

37 Emi vonayavo 'idiega Yaubada na'awahaqiaqiemi nage na'awaluveifemi."

*Tomotau nuanuadi 'ebe'ita*  
(Maki 8:11-12; Luke 11:29-32)

38 \* 'Inega vaina Falisi ta wese luvine ana tove'itayavo Ieisu ivonea ivonaya, "Tove'ita, nuanuama 'ebe'ita taha una viaqi ana 'itea."

39 \* Ta Ieisu vonedi, "Omi'a ba'e lagata luveifami, ta ge nuanuami Yaubada ena nuanua ona 'abibodei. 'Inega ni'a ovonegu be 'ebe'ita taha ena viaqia, ta ge nuagu! Ta yavonemi tovesimasi-mana Iona ona nuave'avinia tauna 'ebe'ita ana 'aidegamo 'imia.

40 \* Mana Iona nana 'aubena toi be wese velovelovana toi 'idia 'iqana qiduana gamonaya toatoa, ta ya'a Tomotau Natuna wese 'idewani 'aubena toi be velovelovana toi 'idia bwa'obwa'o gamo otaqinaya ena toatoa.

---

\* **12:34:** Md 3:7; 15:18; Lk 3:7; 6:45      \* **12:38:** Md 16:1; Lk 11:16;  
Ion 6:30      \* **12:39:** Md 16:4; Mk 8:12      \* **12:40:** Ioa 1:17

41 \* Nawale vetala'ai ana 'aubena 'inaya me Ninibe ina tovolu be lagatamina ba'e ina ve'ewemi, mana Iona 'idia lugaihi ta edi ilivu luveifanega inuagivila, ta taha 'oloto omi'a nuanimia toatoa ena lugaihi aqiaqi otaqina ta 'abiboda Iona, ta gebu oda nuagivila.

42 \* "Wese 'idewani taha vavine kaikaiwabudi bolimana ana 'awayaqiega imai Solomoni ena alamani sabi noqolina, ta vetala'ai ana 'aubena 'inaya ina tovolu ta omi'a lagatamina ina ve'ewemi, mana taudi luluwai otaqega imai Solomoni ena alamani sabi vineneqina. Ta ba'e 'itagana taha tomotau nuanimia toatoa ena alamani qidua va'inena, ta 'abiboda Solomoni. Ta omi'a ge nuami tomotau nana ena vona ona noqoli.

*Niboana luveifana 'evivi mai taha 'oloto 'inaya  
(Luke 11:24-26)*

43 "Eguma niboana veifana 'oloto taha 'inega na'ifoqe, 'inega 'oloto nana naveaiaqi ta niboana veifana nana nayabayaba kavokavovo go'ila geqanaya, ta ena 'ebeveyawai salisalia, ta ge ana fata nalobei.

44 'Inega niboana nana taunega 'inaya vonaya, 'Ana 'ita ena 'evivi egu 'ebetua nugwenugweina 'inaya.' 'Inega 'evivi ta 'ebetua nana lobeia kawakawana ta vunavunaqina ta wese 'i'iva'ava'aina.

45 \* "Inega 'ifoqe tauya ta enavo niboana adi yau seveni luveifa otaqidi wese 'ebe'ewedi miedi, 'inega qabudi ilugu 'ebetua nana 'inaya itoatoa.

---

\* 12:41: Ioa 3:5      \* 12:42: 1Kin 10:1-10      \* 12:45: 2Fit 2:20

'Inega 'oloto nana ena toa igiveluveifa otaqia, lova ge 'idewani. Omi'a lagata ba'ena wese 'idewani luveifami, ta tuta 'ebel'u'ovoa 'inaya emi toa naluveifa otaqa."

*Isisu inana ta wese tainavo  
(Maki 3:31-35; Luke 8:19-21)*

<sup>46</sup> Isisu nawale yo'o 'idia vonavona ta inana be tainavo maega imai. 'Inega 'atamanaya itovotovololo ta nuanuadi Isisu maega ina veqae.

<sup>47</sup> 'Inega 'oloto taha valedi miea Isisu 'inaya vonaya, "Inau taimwavo maega itovotovololo 'abagaya nuanuadi ina voneu."

<sup>48</sup> Ta Isisu 'oloto nana ena vona ve'evivia vonaya, "Togama inagu ta tomeqabu taigwavo?"

<sup>49</sup> 'Inega Isisu nimana si'otoi yo'o dina 'idia ta 'oloto nana voneaya, "Ba'e tomotau diavona inagu be taigwavo.

<sup>50</sup> \* Mana tomeqabu Tamagu mahalaya ena nunua i'abi'abibodea e taudi taigwavo be novugwavo ta wese inagwavo."

## 13

*Vona sesebai witi vewanina weaqina  
(Maki 4:1-9; Luke 8:4-8)*

<sup>1</sup> 'Aubena nana 'inaya Isisu vanuega 'ifoqe ta iqo balabalaya toabui.

<sup>2</sup> \* Ta qabu qiduadi iva'auta 'inaya tuata wagaya gelu toabui ta qabu dina balabalaya itovotovololo.

<sup>3</sup> 'Inega vona sesebaiega yani 'eala ve'itedi, ta wese vonedi vonaya, "Oloto taha tauya vaoqaya witi vewanidi sabi veyavulina.

---

\* 12:50: Lom 8:29      \* 13:2: Lk 5:1-3

<sup>4</sup> E 'inega ve'ale veyavuledi, ta vaina vewana 'edabalaya iavuta 'inega manuqa i'itedi iwebui i'ainidi.

<sup>5</sup> Ta vaina vewana iavuta bwa'o dabodabonaya, ta 'abiboda itabo kwayavona, mana bwa'obwa'o yalalayana.

<sup>6</sup> Ta tuta nana baba'au vanemai 'inega guve'aligidi, mana kwalamidi ge dawebui bwa'obwa'o gamo otaqinaya.

<sup>7</sup> E vaina vewana talitali gamonaya iavuta ta maega itabo vefofo, 'inega talitali nana vewaiwai ta witi ge ana fata navuaqa.

<sup>8</sup> Ta wese vaina vewana bwa'obwa'o aqiaqina 'inaya iavuta itabo ta ivuaqa, 'inega vewana diavona 'idiega vaina ivuaqa 100 'idewani, ta vaina 60 ta wese vaina 30.

<sup>9</sup> Ta 'eguma ma taniqami ba'e vona nana ona noqolidi."

*Vona sesebai ena 'ifoqe 'iuna  
(Maki 4:10-12; Luke 8:9-10)*

<sup>10</sup> 'Inega Iesu ana to'abibodayavo imai 'inaya ta ivoneaya, "Tola'ai weaqina tomotau vona sesebaiega uveve'itedi?"

<sup>11</sup> 'Inega Iesu vonaya, "Omi'a Yaubada awafelemi be vaina yani 'wai'waividi ena 'Ebeluvine weaqina ni'a oalahalamaniana, ta ba'e qabu diavona gebu.

<sup>12</sup> \* Aiqabu vaina yani 'idia nawale givetomana ago va'inena ina lobe, ta aiqabu ge yani agona 'idia, e nawale Yaubada wese na'ewa yavulea 'idiega.

---

\* **13:12:** Md 25:29; Mk 4:25; Lk 8:18; 19:26

13 Ba'e 'iuna 'inega vona sesebaiega yaveve'ita 'idia, mana matadiega i'ita'ita ta ge ida 'ita aqi-aqiea. Ta wese ivivineneqa ta ge ida noqoli be ge ida alamania.

14\* "Tovesimasimana Aisea ena vona ana aqiaqi ni'a 'ifoqe, mana lova tauna ba'e tomotau diavona weaqidi madusimanea vonaya, 'Nawale ivivineneqa ta nuadi ge da'eqa'ui, wese i'ita'ita ta ge ida 'itei.

15 Mana ba'e tomotau diavona edi nuanuayavo 'eluatufa, ta teniqadi 'elukwava ta wese matadi 'elukwaya.

Ta 'eguma matadiega ida 'ita'ita ta teniqadiega ida noqonoqola 'inega ida nuagivila 'iguya be eda giveaqi-aqiedi.'

16\* Ta omi'a me emi qaiawa, mana matamiega o'ita'ita ta wese teniqamiega onoqonoqolia.

17 Vonahaqiaqi, ba'e yani diavona ni'a o'itedi be onoqolidi lova tovesimasimanayavo ta wese tomeqabu edi ilivu tunutunuqina nuanuadi qid-uana ida 'itei ta wese ida noqolia, ta ge adi fata ida lobei.

*Isisu ena vona sesebai givesimatalia*

*(Maki 4:13-20; Luke 8:11-15)*

18 "Inega vona sesebai vewana ana veyavula weaqina ana alamani ona noqolia.

19 'Eguma taha toga Yaubada ena 'Ebeluvine valena nanoqolia ta nuana ge da'eqa'ui, e tauna 'idewani vewana dina iavuta 'edabalaya, 'inega

---

\* 13:14: Ais 6:9-10; Ion 12:40; Via 28:26-27 \* 13:16: Lk 10:23-24

toluveifana maimai ta vona diavona 'oloto nana giwalinaya 'eno'eno 'ewa'ewa yavuledi.

<sup>20-21</sup> Ta vaidi tomotau Valena Aqiaqina inoqolia ta lukwayavonega me edi qaiawa iawafeledi Yaubada 'inaya. Ta 'abiboda tuta nana vita nage vevoalana ilobea Vale nana weaqina wese lukwayavonega edi vetumaqana ina nogea, mana taudi kavona vewana dina dabodabo 'inaya i'eluavuta ta kwalamidi ge davave'abi bwa'obwa'oya.

<sup>22</sup> \* Vaidi tomotau Valena Aqiaqina inoqolia ta i'ewa aqiaqiea, ta 'abiboda bwa'obwa'o ana kaikaiwabuyavo be wese edi toa bwa'obwa'oya weaqina nuadi 'ewea, 'inega taudi edi vetumaqana inuafania ta ge adi fata be ina vuaqa, mana ba'e tomotau diavona kavona vewana dina i'eluavuta talitali gamonaya.

<sup>23</sup> Ta 'esi vaidi tomotau Valena Aqiaqina inoqolia ta nuadi 'eqa'uya 'inega ivuaqa aqiaqi, ta vuaqidi vaina 100 ta vaina 60 ta wese vaina 30, mana omoe tomotau diavona kavona vewana dina bwa'obwa'o aqiaqina 'inaya i'eluavuta.”

### *Vona sesebai witi be libi weaqina*

<sup>24</sup> 'Inega taha wese vona sesebai Iesu tomotau vonedi vonaya, “Mahala ena 'Ebeluvine kavona taha 'oloto witi vewanina aqiaqina veyavulea ena vaoqa 'inaya.

<sup>25</sup> Ta velovelovana 'inaya ena tofewayavo maega i'eno motaiva ta ana avia taha mai vaoqaya

---

\* **13:22:** Lk 12:16-21; 1Tim 6:9-10,17

ta libi vewanidi veyavuledi witi otaqa gamonaya, 'abo tauya.

<sup>26</sup> Yani qabuna 'elutabo ta wese ivuaqa, 'inega tofewa diavona libi nana i'ita 'inanea.

<sup>27</sup> "Inega tonivaoqa ena tofewayavo imai ta ivoneaya, 'Kaiwabu, vewana aqiaqina eu vaoqaya lova uveyavuledi, ta ma'oda 'inega libi maega itabo vinivinioya?"

<sup>28</sup> Ta tonivaoqa vonaya, 'Ba'e taha voalagu ena viaqa.' 'Inega ena tofewayavo ivetela'aiea ivonaya, 'Ma'oda, nage libi dina ana luabu yavuledi?"

<sup>29</sup> Ta tonivaoqa vonaya, "Etobala, mana 'eguma libi diavona ona luabuya 'inega wese vaina witi maega ona abu yavuledi.

<sup>30</sup> Ta 'esi bolimana ana tutaya egu toda'ayavo ena vonedi libi diavona ina vavutuqidi witi 'idiega, 'inega libi diavona ina gabu yavuledi, ta 'esi witi daisina ina va'auqidi ta egu sailakaya ina vedododi.' "

*Vewana goyona ana giveago vona sesebaina  
(Maki 4:30; Luke 13:18-19)*

<sup>31</sup> Wese Iesu taha vona sesebaiega tomotau vonedi vonaya, "Mahala ena 'Ebeluvine kavona taha 'oloto te'wa vewanina na'ewei ta ena talaqa 'inaya na'wadia.

<sup>32</sup> Vonahaqiaqi, te'wa vewanina yani goyona, ta 'eguma kana 'wadia 'inega ena tabo 'inaya yani qabuna vaoqaya naveqidua va'inedi kavona 'aiwe be 'inega manuqa ina mai ta laqanaya ina nevuqa."

*Falawa ana 'ebegiveago isiti vona sesebaina  
(Luke 13:20-21)*



<sup>33</sup> 'Inega Ieisu wese vona sesebaiega vonedi vonaya, "Mahala ena 'Ebeluvine kavona taha vavine falawa ana 'ebegiveago ana wawa isiti goyona na'ewei ta falawa qiduana maega nawayavilea, 'inega falawa nana nadidina."

*Ieisu ena vona sesebai 'iuna*  
(Maki 4:33-34)

<sup>34</sup> Ieisu tuta qabuna vona sesebaiega tomotau veve'itedi. Tauna ge taha yani davonedi mali vona 'inega, ta 'esi tuta qabuna vona sesebaiega veve'itedi.

<sup>35</sup> \* Ba'e 'inega tovesimasimana taha ena vona ana aqiaqi 'ifoqe, mana lova madusimanea vonaya,

"Vona sesebaiega tomotau ena vonedi, be tola'ai yanidiavo Yaubada a'ugovaqedi bwa'obwa'o ana 'iva'ava'ata 'unuyega ena vona 'ifoqeyea 'idia."

*Ieisu libi vona sesebaina givesimatalia*

<sup>36</sup> 'Inega Ieisu qabu diavona nogedi ta lugu vanuea, ta ana to'abibodayavo imai 'inaya ta ivonaya, "Vona sesebai libi vaoqaya ana alamani una givesimatalia 'imaya."

<sup>37</sup> 'Inega Ieisu vonedi vonaya, "Witi vewanina aqiaqina ana toveyavula, tauna ya'a Tomotau Natuna.

<sup>38</sup> Ta vaoqa nana kavona bwa'obwa'o qabuna, ta vewana aqiaqina taudi Yaubada ena 'Ebeluvine ana tomotauyavo, ta libi taudi toluveifana ena tomotauyavo.

---

\* **13:35:** Same 78:2

39 Ta libi ana toveyavula bena'e Seitani. Ta bolimana ana tuta bena'e tuta ana 'ebelu'ovoa, ta tobolimana taudi Yaubada ena tovale'ewayavo.

40 \* Be tuta ana 'ebelu'ovoa 'inaya toluveifadi taudi 'idewani libi Yaubada ena tovale'ewayavo ina va'auqidi be ina gabu yavuledi.

41 \* "Ta ya'a Tomotau Natuna egu tovale'ewayavo ena vetunedi be toluveifana ena tove'itayavo be ena tofewayavo ina va'auqidi ta ina 'wavinidi Yaubada ena 'Ebeluvine 'inega.

42 \* Ta ina felawebuiedi 'aiwe 'ala'alaina gamonaya, ta 'inaya visiqa ina lutonovi be ina dou ta wese aladi navetalakikokiko.

43 \* Ta 'abiboda taudi tunutunuqidi Tamadi ena 'Ebeluvine gamonaya ina simatala baba'au 'idewana. 'Eguma ma taniqami ba'e vona nana ona noqolia.

*Yani toi vona sesebaidi*

44 "Mahala ena 'Ebeluvine ba'e 'idewani. Taha 'oloto yani kaikaiwabu otaqina lobe a bwa'obwa'o gamonaya, ta wese a'ukwaiva 'eviviea. 'Inega me ena qaiawa tauya ta ena kulufayavo qabuna vegimwaneyedi ta adi ve'ia 'ewea, 'inega bwa'obwa'o nana gimwane a.

45 "Ta wese mahala ena 'Ebeluvine kavona taha tomotau nuanuana taha mwali aqiaqina nagimwane a.

46 Ta tuta nana taha mwali aqiaqi otaqina lobe a, e 'inega ena kulufa qabuna vegimwaneyedi be yaqisa mwali nana ana fata nagimwane a.

---

\* **13:40:** Ion 15:6      \* **13:41:** Md 24:31; 25:31; Mk 13:27      \* **13:42:** Md 8:12      \* **13:43:** Dan 12:3

47 “Ta wese mahala ena ’Ebeluvine ’idewani to-gomana edi gomana ibwa’uya lavuya, ta ’iqana taha taha i’onedu.

48 Ta tuta nana ’iqana gomana iluveagatuna’ia ’inega ilihv vaneyea balabalaya, ta ’inega itoabui ta ’iqana qabudi ivavutuqidi. ’Inega ’iqana aqi-aqidi kwalisi ’inaya ivedododi ta ’iqana veiveifadi iveyavuledi.

49 Ta wese ’idewani tuta ana ’ebelu’ovoa ’inaya Yaubada ena tovale’ewayavo ina mai ta tomotau luveifadi ina vavutuqidi tomotau aqiaqidi ’idiega.

50\* Ta tomotau luveifadi ina felawebuiedi ’aiwe ’ala’alaina gamonaya, ta ’inaya visiqa ina lutonovi be ina dou ta aladi navetalakikokiko.”

*Kulufa kaikaiwabu vauvaudi ta ’itu’ituwaidi*

51 ’Inega Iesu vetala’aiedi vonaya, “Ma’oda, nage vona sesebai qabuna ba’e ni’a oalamanidi?” ta ivonaya, “Ao, ’edewana.”

52 Ta wese vonedia, “’Inega ona alamani aqiaqiea ’eguma luvine ana tove’ita taha ni’a veto’abiboda mahala ena ’Ebeluvine weaqina, e ’inega taunana kavona taha tonivanue lugu vanue gamonaya ta ena kulufa vauvauna ta wese ’itu’ituwaina ’ewa ’ifoqeyedi.”

*Tomotau Iesu inogea*

*(Maki 6:1-6; Luke 4:16-30)*

53 Tuta nana Iesu ena vona sesebai lu’ovoidi ’inega omo’e di’we nana nogea.

54\* ’Inega ’evivi ena ’abagaya ta vanue tafwalolo ’inaya lugu ta ve’itedi. Ta tomotau qabudi nuadi voqana ’inega ivonaya, “Oloto ba’e ma’inega ena

---

\* 13:50: Md 13:42; Lk 13:28      \* 13:54: Ion 7:15

alamani 'ewei, ta wese ma'inega waiwai 'ewea 'inega ana fata yani 'ebenuavoqana viaviaqidi?"

55 \* Ta wese ivonaya, "Bena'e 'oloto nana tauna to'eyoqona natuna, waisa? Ta inana Meli ta tainavo Iemesa be Iosefa be Saimoni ta wese Iudasa, wa?"

56 Ta wese novunavo maega katoatoa. Ta ma'inega ena alamani be ena waiwai 'ewei?"

57 \* 'Inega inogea, ta Iesu vonedi vonaya, "Tovesimasimana adi 'amayaba ilobelobea mali 'abaga 'idia, ta edi 'abagaya ta wese edi gadeavo 'idiega ge taha 'amayaba ida lobei."

58 'Inega Iesu 'abaga nana 'inaya ge viaqa waiwai 'eala daviaqidi, mana ge ida vetumaqanea.

## 14

### *Ioni Togivebabitaiso ena 'aliga*

*(Maki 6:14-29; Luke 9:7-9)*

1 Lova Elodi Ioni kafia ta vanue 'ebeyoqona 'inaya a'uya. Ta Ioni ana kafi 'iuna taha vavine adi wawa Elodiasa, taudi Elodi tuana Filifi moqanena.

2 Ta Elodi luabuyedi 'inega vaqidi ta Ioni Elodi voneaya, "Ba'e ge ilivu aqiaqina mana tuau moqanena uvaqidi, 'inega o'a luvine ubwegea!"

3 \* Omo'e 'iuna 'inega Elodi nuanuana vonigo Ioni naluve'aligia, ta tomotau qabudi Ioni i'awatovesimasimaneana 'inega Elodi gaululu tomotau weaqidi 'inega Ioni ge daluve'aligi ta 'esi a'uluguyea vanue 'ebeyoqonaya.

---

\* 13:55: Ion 6:42    \* 13:57: Ion 4:44    \* 14:3: Luvi 18:16; 20:21; Lk 3:19-20

<sup>4</sup> 'Abiboda Elodi ena vi'oi ana 'aubena ana 'ebenuave'avina sagalina 'inaya tomotau ni'a iva'auta, ta Elodiasa natudi mevavinena qabu matadia ouou, ta ena ou weaqina Elodi qaiqaiawa.

<sup>5</sup>\* 'Inega Elodi iahaba nana 'inaya vona fofofola vonaya, "Tola'ai eu nuanua e ana fata ena neiu", ta wese 'awatamatamana ba'e vona nana weaqina.

<sup>6</sup> 'Inega Elodiasa natudi 'inaya ive'awahayahaya edi nuanua weaqina, ta 'inega iahabana Elodi voneaya, "Nuanuagu Ioni Togivebabitaiso 'unu'ununa ma gaebana una neigu."

<sup>7</sup> 'Inega Elodi nuana vita qiduana, ta ni'a tamada 'inanea ta wese tolusagali ena vona fofofola ni'a inoqolia 'inega iahaba nana ena vona awafelea.

<sup>8</sup> Ta ena tofewayavo luvetunedi itauya vanue 'ebeyoqona 'inaya, ta Ioni magana ida'ea.

<sup>9</sup> Ta 'unu'ununa gaebaya ia'uya 'inega iahabana 'inaya imiea 'ewea, ta 'inega inana neidi.

<sup>10</sup> Ta Ioni ana to'abibodayavo imai 'inega Ioni 'wafina i'ewei itavunia. Ta 'abiboda itauya Ieisu 'inaya, 'inega yani qabuna ivonayea Ioni weaqina.

<sup>11</sup> Ta tuta nana toluvine Elodi Ieisu Valena noqolia,

<sup>12</sup> 'inega ena tofewayavo vonedia, "Omo'e 'oloto nana ana 'ita tauna Ioni Togivebabitaiso ta 'aligega ni'a ya'itoto 'evivi, mana me ena waiwai yani 'ebenuavoqana viaviaqidi."

*Qabu qiduadi Ieisu ve'ainidi  
(Maki 6:45-52; Ioni 6:15-21)*

---

\* 14:5: Md 21:26

13 Ieisu Ioni Togivebabitaiso ena 'aliga valena noqolia, 'inega 'abaga nokea ta wagaya gelu tauya di'we tomotau geqana 'inaya. Ta tomotau Ieisu ena tauya valena inoqolia, 'inega 'abaga taha taha 'idiega 'aqediega itauya 'inaya.

14 Ta tuta nana Ieisu wagega vawebui balabalaya 'inega qabu qidua va'inedi 'itedi ta nukolokoloyedi. 'Inega tovevihiqa qabudi giveaqaqiedi.

15 Ni'a velavilaviea 'inega ana to'abibodayavo imai Ieisu 'inaya ivonea ivonaya, "Kaiwabu, di'we ba'ena tomotau geqana, tuta goyona naboinia 'inega qabu ba'e una vetunedu ina tauya, ta adi 'abwaga ina gimwane omo'e 'abaganavo di'wedega."

16 Ta Ieisu vonedia, "Ge ina tauya, ta 'esi omi'a 'abwaga ona neidi ina 'ai."

17 'Inega ivona 'eviviea ivonaya, "Gebu, mana ima'a ama 'abwaga ge 'eala, u'itei beledi nima 'aidegana ta wese 'iqana magilafudimo."

18 Ta 'inega Ieisu vonaya, "Beledi ta wese 'iqana oneigu!"

19 \* 'Inega tomotau qabudi vonedi libia ina toabui ta beledi nima 'aidegana ta 'iqana magilafudi 'ewedi ta 'ita vane mahalaya, 'inega 'abwaga dina weaqidi lukaiwa. Ta 'abiboda beledi gitomwedi ta ana to'abibodayavo neidi, 'inega beledi nana tomotau 'idia ivewila'ayea.

20 'Inega qabudi i'ai ta gamodi 'elukoko. 'Ai gumwala, 'inega to'abiboda diavona 'awagigi iva'auqidi, ta kwalisi tuwelo iluveagatuna'idi.

---

\* 14:19: Md 15:35-39; Mk 8:6-10

21 To'ai diavona gamodiega 'oloto dimo iavodi adi yau 5,000 'idewani, ta vivine be wese gogama qabudi ge adi avomo.

*Isisu mwade'wa debanega tauya*  
(Maki 6:45-52; Ioni 6:15-21)

22 'Inega ana to'abibodayavo luvetunedi wagaya ina igelu ina nugweta ta ina vaukamana mali di'wea. Ta tauna nawale tomotau qabudi vevematamagilafuyedi ina 'evivi edi 'abagaya.

23 \* 'Inega to'abiboda dina wagaya igelu ta Isisu qabu dina vetunedi itauya. 'Abibodanaya tauna ana 'aidega bwanagaya 'watovu sabi venoqi Yaubada 'inaya. 'Inega ni'a velovelovanea ta Isisu ana 'aidega toatoa.

24 Ta to'abiboda dina edi waga ni'a ineyeyei itete malavetaya, 'inega nufula qiduana ilobea. 'Inega edi waga 'ubuibuinia ta wese yaqina 'au'ia'iawedi.

25 Ta manu bodobodoya Isisu mwade'wa debanega mai ana to'abibodayavo di'wedea 'ifoqe.

26 \* Omo'e 'inaya Isisu ana to'abibodayavo i'itea mwade'wa debanega maimai 'inega imwaniniva qiduana idiula ta ivonaya, "Ieii, o'itei otala omo'e maimai!"

27 Ta Isisu vonedia, "Ge ona mwaniniva, ya'a ba'e taugu emi Kaiwabu."

28 'Inega Fita vonaya, "Kaiwabu, 'eguma vonahaqiaqi o'a tau'una e 'inega una gabegu ta mwade'wa debanega ena wai 'iuya."

29 Ta Isisu voneaya, "Umai!" 'inega Fita wagega vawebui ta mwade'wa debanega ve'ale natauya Isisu 'inaya.

---

\* 14:23: Lk 6:12; 9:28      \* 14:26: Lk 24:37

30 Tuta nana tautauya ta nufula qiduana 'itea 'inega mwaniniva ta mwade'waya ve'ale damana 'inega gaba vonaya, "Kaiwabu, uiulegu!"

31\* 'Inega Ieisu lukwayavonega nimana si'otoia Fita kafia ta voneaya, "Eu vetumaqana goyona, tola'ai weaqina uvenuana magilafu?"

32 'Inega magilafudi wagaya igelu ta yaqina 'avalaulihia.

33 Ta to'abiboda dina wagaya itoatoa ihiwa'odu Ieisu 'inaya ta ivonaya, "Vonahaqiaqi, o'a Yaubada Natu Otaqina."

*Ieisu tovevhiqa qabudi giveaqiaqiedi Genasaleta 'inaya*

*(Maki 6:53-56)*

34 'Inega ivaukamana i'ifoqe 'abaga Genasaleta 'inaya ta wagega ivawebui bwa'obwa'oya.

35 Ta 'abaga nana ana totoayavo Ieisu i'ita 'inanea, 'inega valena iyawala dadanea 'abaga qabudi 'idia, ta totoa 'abaga edi tovevhiqayavo qabudi imiedi 'inaya.

36\* Ta Ieisu inoqiea ivonaya, "Kaiwabu, nage ana fata tovevhiqa ba'e au kaleko matavusina ina gitonovia?" Tuata Ieisu awafeledi, 'inega aiqabu ana kaleko igitonovia e iveaqiaqi.

## 15

*Me Diu tubudiavo edi ilivu weaqina*

*(Maki 7:1-13)*

1 'Abibodanaya Falisi ta wese luvine ana tove'itayavo 'abaga Ielusalema 'inega imai Ieisu 'inaya ta ivoneaya,

\* 14:31: Md 8:26; Mk 4:39

\* 14:36: Md 9:20-21



<sup>2</sup> “Tola'ai weaqina au to'abibodayavo 'ai ana tuta 'inaya nimadi ge ida 'utu'utudi ta 'abwaga i'ai'ai, bena'ena viaqa nana 'inega tubudavo edi ilivu iqeugeunia?”

<sup>3</sup> Ta Iesu vonedia, “Omi'a Yaubada ena luvine oqeugeunia, mana tubumiavo edi ilivu o'abi'abibodea.

<sup>4\*</sup> Yaubada ena luvine magilafuna ba'e vonaya, 'Inau ta tamau una 'amayabedi',  
ta wese vonaya,  
“Eguma togama tamana nage inana navona ve'alatedi  
luaqiaqiea be ona luve'aligia'.

<sup>5</sup> “Ta omi'a ovonaya 'eguma taha toga tamana ta wese inana navonedi navonaya, 'Ya'a egu kulu-fayavo ni'au yahawafeledi Yaubada 'inaya, 'inega gebu agu fata ena iulemi'. Ta ba'e vona nana 'inega ovonaya be ina be tama adi 'itamaki gebu yani qiduana 'iuya.

<sup>6</sup> Ba'e 'idewanina tubumiavo edi luvine o'abibodea, ta Yaubada ena luvine obwegeb-wegea.

<sup>7</sup> Vonahaqiaqi, omi'a to'eu'au'ava! Lova tovesi-masimana Aisea weaqimi simanayea, vonaya,

<sup>8\*</sup> ‘Tomotau ba'e 'awadiega i'amayabegu ta giwalidiega itoa luluvai 'iguyega.

<sup>9</sup> Ta wese 'iguya itafwalolo kavovo,  
mana edi ve'ita luvine weaqina ge ya'a 'iguyega  
ta 'esi tomotau edi nuenuega 'ifoqe.' ”

---

\* **15:4:** 'Ifo 20:12; 21:17; Luve 5:16      \* **15:8:** Ais 29:13

*Ieisu ena ve'ita toyani tomotau nagivebwavudi  
(Maki 7:14-23)*

10 Inega Ieisu qabu qiduana gabedi imai vonedi vonaya, “Vona ba'e ona noqolia 'inega nuami na'eqa'uya!

11 \* 'Abwaga 'awadega ka'ai'ainidi gebu ana fata nagivebwavuda, ta 'esi eda vonayavo 'awadega i'ifoqe mai ana fata ina givebwavuda.”

12 Inega Ieisu ana to'abibodayavo imai 'inaya ta ivoneaya, “Kaiwabu, nage Falisiavo u'itedi eu vona ba'e weaqina diadi vilea?”

13 Ta Ieisu vonaya, “Tamagu mahalaya toa-toa 'aiwe diavona ge da'wadidi nawale ena tovale'ewayavo ina abu yavuledi.

14 \* Ta Falisiavo ona nogedi, mana taudi tovanugweta matadi kwayakwayana. Ta 'eguma matakwaya taha iana wese matana kwayakwayana navanugwetea e 'inega nawale magilafudina gulia ina be'u.”

15 Inega Fita vetala'aiea vonaya, “Vona sesebai ba'e ana alamani una givesimatalia 'imaya.”

16 Ta Ieisu vonaya, “Nage omi'a wese nawale nuami ge dasimatala?”

17 Mana tola'ai 'awadega ka'ai'aini ta lugu-lugu gamodaya e yani nana 'abiboda tautauya avuqainaya.

18 Ta vonahaqiaqi, tola'ai tomotau giwalidiega 'ifo'ifoqe ta 'awadiega ivonavonayea, e ba'e vona diavona 'idiega ana fata taudiega ina givebwavudi.

---

\* 15:11: Md 12:34      \* 15:14: Lk 6:39; Lom 2:19

19 Mana giwalidiega nuanua luveifadi 'ifo'ifoqe 'idewana luve'aliga be, luabu be, velamo'eno kavokavovo be, vanawala be, 'eu'au'ava ta wese awagila.

20 Ba'e yani diavona tomotau gigivebwavudi, ta 'eguma nimada ge kana 'utudi 'ai ana tuta 'inaya ge ana fata nagivebwavuda."

*Kenani vavinedi edi vetumaqana  
(Maki 7:24-30)*

21 Ieisu ena viaqayavo 'abibodanaya di'we nana noega ta tauya di'we Taia ta Saidoni 'idia.

22 Ta di'we nana 'inega Kenani vavinedi taha i'ifoqe imai Ieisu 'inaya ta igaba ivonaya, "Kaiwabu, o'a kini Deibida tubuna uda nuakokoloyegu, mana niboana luveifana natugu mevavinena 'wahalia ta gigiveluveifa aqiaqiea."

23 Ta Ieisu vavine dina edi gaba ge taha vona 'inega dave'evivia. 'Inega ana to'abibodayavo imai ta Ieisu ivoneaya, "Vavine dina una vonedi ina tauya, mana edi vegabagaba 'inega igivesiniqaiqaiema."

24 \* Ta Ieisu vonaya, "Yaubada vetunegu yamai sifi luluve'waividi Isileli ena 'ebeluvine gamonaya adi 'aidega weaqidi."

25 'Inega vavine dina imai Ieisu matanaya tuqatuqadiega isobadi ta ivonaya, "Kaiwabu uda iulegu!"

26 Ta Ieisu vonaya, "Ge daluaqiaqiei be gogama adi 'abwaga kana 'ewei 'idiega ta kana felei kedewa 'idia."

---

\* 15:24: Md 10:6

27 Ta vavine dina ivonaya, “Kaiwabu, eu vona ba’e vonahaqiaqi, ta ’abwaga salimuguna avuavuta kaiwabu ena ’ebe’aiega ’inega ena kedewayavo i’ai’ainia?”

28 ’Inega Iesu vavine dina edi vona ve’evivia vonaya, “Vavine, emi vetumaqana waiwaina, ’inega emi venoqi ana ve’ia na’ifoqe.” Ta tuta ba’e ’inaya vavine dina natudi veaqiaqi ’evivi.

*Tovevhiqa qabudi Iesu giveaqiaqiedi*

29 ’Inega Iesu di’we nana nogei ta lavu Galili balabalanega luvivila ta ’watovu bwanagaya ta oade toabui.

30 Ta qabu qiduadi wese i’watovu ta edi tovevhiqayavo imiedi taudi ’aqedi lueifana be, matadi kwayakwayana be, tovenakunaku ta wese tovevhiqa ’eala Iesu matanaya ia’udi. Ta qabudi giveaqiaqiedi.

31 \* ’Inega qabu diavona nuadi voqana qiduna, mana tovenakunaku ivonavona be, ’aqedi lueifana itautauya ta matadi kwayakwayana wese i’ita ’evivi. ’Inega qabu diavona me Isileli edi Yaubada iawatuboya.

*Iesu qabu qiduadi ve’ainidi*  
(Maki 8:1-10)

32 \* ’Inega Iesu ana to’abibodayavo gabedi imai ta vonedia, “Qabu ba’ena yanuakokoloyedi mana ni’a ’aubena toi ba’idia maega atoatoa ta ge adi ’abwagamo. ’Inega ge nuanuagu ma botanidi ena vetunedi ina ’evivi fole nawale ’edaya ’ai weaqina ina ’elutava.”

---

\* 15:31: Mk 7:37      \* 15:32: Md 14:14

33 Ta ana to'abibodayavo ivoneaya, "Di'we ba'ena tomotau geqana, ta ma'oda qabu qiduadi ba'e adi 'abwaga kana loba 'aipei, be tola'aiega kana ve'ainidi?"

34 Inega Iesu vetala'aiedi vonaya, "Evisa beledi 'imia 'eno'eno?"

Inega ivoneaya, "Beledi seveni ta wese vaina 'iqana goyogoyodi maega."

35 Inega Iesu qabu diavona vonedi bwa'obwa'oya ina toabui.

36 Ta beledi seveni dina be wese 'iqana dina 'ewedi ta vona lukaiwa Yaubada 'inaya weaqidi. Inega gitomwedi ta neidi ana to'abibodayavo 'idia, 'inega ivewila'ayea qabu diavona 'idia,

37 ta i'ai ana laba gamodi 'elukoko. 'Abibodanaya Iesu ana to'abibodayavo 'abwaga 'awagigidi iva'auqidi, ta kwalisi seveni iluveagatuna'idi.

38 To'ai diavona 'oloto dimo adi yau 4,000, ta vivine be gogama ge adi avomo.

39 Iesu qabu dina vetunedi itauya, 'inega waga-gaya gelu ta tauya di'we Magadana 'inaya.

## 16

*Tomotau nuanuadi 'ebe'ita waiwaina ina 'itea  
(Maki 8:1-13; Luke 12:54-56)*

1\* Taha 'aubena 'inaya Falisiavo ta wese Sadusiavo imai Iesu 'inaya sabi sitonovina, 'inega ivetala'aiea ivonaya, "Nage au fata 'ebe'ita taha mahalega una viaqi ana 'itea, be 'inega ana 'awahaqiaqieu vonigo eu waiwai Yaubada 'inega mai."

---

\* 16:1: Md 12:38; Lk 11:16

<sup>2</sup> 'Inega Ieisu vonaya, "Omi'a 'eguma lavilavi 'inaya baba'au ona 'itea nalia'unuva ta mahala nalubwealia, 'inega ni'au oalamaniana 'ibe mahala ive.

<sup>3</sup> Ta 'eguma 'awa'awai 'inaya waumana kwauk-wausina mahala naumabodea ona 'itea, e 'inega ni'au oalamaniana nawale 'wei na'wei. Vonahaqi-aqi, mahala ana 'ita 'inega ni'a oalamaniana tola'ai na'ifoqe, ta tola'ai ba'itagana matamia i'ifo'ifoqe adi alamani weaqina nuami nawale ge da'eqa'ui.

<sup>4</sup>\* Lagata ba'e omi'a luveifami ta wese Yaubada ge nuanuami ona alamaniana. Omi'a ovetala'aiegu 'ebe'ita taha weaqina. Ta ge taha wese 'ebe'ita ena neimi, ta 'esi Iona tauna ta'iwa emi 'ebe'ita." 'Inega Ieisu nogedi ta tauya.

*Ieisu ena vona sesebai Falisi be Sadusi weaqidi  
(Maki 8:14-21)*

<sup>5</sup> 'Inega lavu di'wenaya italaukamana ta Ieisu ana to'abibodayavo adi beledi ivenuafania ge ida 'ewei.

<sup>6</sup>\* 'Inega Ieisu vonedia, "Falisiavo be Sadusiavo edi isiti 'inega ona 'itamakimi."

<sup>7</sup> 'Inega to'abiboda dina taudiega iveqae ivon-aya, "Ana 'ita Ieisu ba'e 'idewani vonavona 'aiqa, mana ada beledi ge kada 'ewei."

<sup>8</sup> Ta Ieisu edi nuanua ni'a alamaniana 'inega vonedi, "Omi'a emi vetumaqana goyona. Tola'ai weaqina taumiega oveveqae vonigo ge ami beledimo? Ya'a ge eda vonavona beledi weaqina.

<sup>9</sup>\* Nage nawale nuami ge da'eqa'uya? Nage ni'a ovenuafania tuta nana beledi faibi 'inega tomotau

---

\* **16:4:** Md 12:39; Lk 11:29    \* **16:6:** Lk 12:1    \* **16:9:** Md 14:17-21

5,000 yave'ainidi? Ta wese 'abwaga 'awagigidi ova'auqidi, e 'inega kwalisi 'eala oluveagatuna'idi.

<sup>10</sup> \* Ta wese beledi seveni 'inega tomotau adi yau 4,000 yave'ainidi, ta 'awagigidi ova'auqidi ta kwalisi 'eala oluveagatuna'idi, waisa?

<sup>11</sup> 'Inega tola'ai weaqina ge oda alamania ya'a ge beledi weaqina eda vonavona? Ta 'esi Falisiavo be Sadusiavo edi isiti 'inega ona 'itamakimi."

<sup>12</sup> E omo'e 'inega nuadi 'eqa'uya ta ialamania Ieisu ge davonedi be ina 'itamakidi beledi ana isiti weaqina, ta 'esi Falisiavo be Sadusiavo edi ve'itayavo 'idiega ina 'itamakidi.

*Fita ena alamani Ieisu weaqina simana 'ifoqeyea*

*(Maki 8:27-31; Luke 9:18-21)*

<sup>13</sup> Tuta nana Ieisu mai taha di'we 'abaga Sisalia Filifai di'wenaya, 'inega ana to'abibodayavo vetala'aiedi vonaya, "Ma'oda tomotau ivonavona 'aiqa ya'a Tomotau Natuna weaqigu?"

<sup>14</sup> \* 'Inega ive'iea ivonaya, "Vaina tomotau ivonaya be o'a Ioni Togivebabitaiso, ta vaina ivonaya be o'a Ilaitia, ta vaina ivonaya be o'a Ielemaia, ta wese vaina ivonaya nage o'a taha tovesimasi-mana nugwenugweina."

<sup>15</sup> 'Inega Ieisu vetalamatanedi vonaya, "Ta omi'a, ma'oda emi nuanua vonigo ya'a togama?"

<sup>16</sup> \* 'Inega Saimoni Fita vona 'eviviea vonaya, "O'a To'etoyavua, Yaubada mayawaina Natuna!"

---

\* **16:10:** Md 15:34-38      \* **16:14:** Md 14:1-2; Mk 6:14-15; Lk 9:7-8

\* **16:16:** Ion 6:69

17\* Ta Ieisu Fita vonea vonaya, “Saimoni o’a Ioni natuna, vonahaqiaqi una qaiawa, mana ba’e eu alamani ge tomotau ’idiega da’ifoqe ta ’esi Tamagu mahalaya neiu.

18\* Ta wese yavoneu, o’a au wawa Fita ta ana givila dabo, ’inega dabo nana debanaya egu ’ekalesia ena yoqonia, ’inega ’aliga ena waiwai gebu ana fata egu ’ekalesia nageuni.

19\* Wese mahala ena ’Ebeluvine ana ’ebesiuwa’a ena neiu, ’inega tola’ ai bwa’obwa’oya una yoqonia wese mahalaya Yaubada nayoqonia. Ta wese tola’ ai bwa’obwa’oya una yavua wese mahalaya Yaubada nayavua.”

20 Omo’e ’inaya Ieisu ana to’abibodayavo vona waiwaina neidi vonedia, “Ge taha toga ’inaya ona simanegu vonigo ya’a To’etoyavua.”

*Ieisu ena ’aliga weaqina simana ’ifoqeyea  
(Maki 8:31-9:1; Luke 9:22-27)*

21 Tuta omo’e ’inega Ieisu ana to’abibodayavo ve’ale ve’itedi vonaya, “Ya’a luaqiaqiegu be ena tauya Ielusalema ’inaya, ta visiqa qiduana ena lobe’a ’abaga ana tovanugwetayavo be tovegu uba qiduquadi ta wese luvine ana tove’itayavo ’idiega. Omo’e ’inaya ina luvigigigu ta ’aubena vetoina ’inaya Yaubada nagiveyawaha ’eviviegu.”

22 ’Inega Fita Ieisu ’ebe’ewei vanaqoyea ta lugwaeyea vonaya, “Kaiwabu, ba’e yani diavona gebu na’ifoqe ’iuya!”

23 ’Inega Ieisu tunugivila Fita ’inaya ta voneaya, “O’a ’idewani Seitani, ’inega unogegu! Ge una

---

\* **16:17:** Gal 1:15-16    \* **16:18:** Ion 1:42; Efe 2:20    \* **16:19:** Md 18:18; Ion 20:23



awatayegu, mana eu nuanua tomotau edi nuanua 'idewani, ta gebu Yaubada 'inega.”

24 \* 'Abiboda Ieisu ana to'abibodayavo vonedi vonaya, “Eguma taha toga nuanuana na'abibodegu luaqiaqiea be tauna ena nuanua nanogea 'inega taunega ana 'etoluai na'avalea ta na'abibodegu.

25 \* 'Inega togama yawaina navegagalea nawale yawaina naluve'waivia, ta togama yawaina weaqigu nahawafelea nawale yawai aqiaqina nalobe.

26 \* 'Eguma taha toga bwa'obwa'o ana kulufayavo qabudi na'ewedi ta 'abiboda na'aliga, tola'ai ana aqiaqina? Mana ge ana fata yawaina na'ewa 'eviviei ena kaikaiwabu 'idiega.

27 \* “Nawale ya'a Tomotau Natuna egu tovale'ewayavo maega ana 'evivi ana mai Tamagu ena simatala kaikaiwabuna 'inega, ta tomotau edi viaqayavo ana ve'ia ena neidi.

28 Yavona aqiaqi 'imia, nawale tomotau vaina 'imiega gebu ona 'aliga ana laba ya'a Tomotau Natuna kavona Kini ena 'evivi ena mai me egu luvine.”

## 17

*Ieisu ana 'ita vedumaduma  
(Maki 9:2-3; Luke 9:28-36)*

1 'Aubena sikisi gumwala Fita ta wese Iemesa ma taina Ioni, Ieisu 'ebe'ewedi maega i'watovu bwanaga taha kuena debanaya.

\* **16:24:** Md 10:38; Lk 14:27

\* **16:25:** Md 10:39; Lk 17:33; Ion

12:25 \* **16:26:** Md 4:8-9

\* **16:27:** Md 25:31; Same 62:12; Vos

24:12; Lom 2:6; Ve 22:12

2 \* Itoatoa 'inega matadia Ieisu ana 'ita vedu-maduma ta 'iawana simatala baba'au 'idewana, ta wese ana kaleko luwadaeyea ana 'ita namana-mala otaqina.

3 Ta ba'e tuta nana 'inaya Mosese be Ilaitia i'ifoqe imai ta Ieisu maega iveveqae.

4 'Inega Fita Ieisu 'inaya vonaya, "Kaiwabu, ba'idia ana toa aqiaqi otaqina, 'inega 'eguma nu-anuau didi toi ena yoqonidi taha o'a weaqiu, taha Mosese weaqina ta wese taha Ilaitia weaqina."

5 \* Fita nawale vonavona, 'inega gawata wadawadaea otaqina umedi 'inega taha bona gawatega 'ifoqe vonaya, "Ba'e Natu otaqigu, tauna weaqina yaqaiawa qiduana. 'Inega tauna ena vona ona noqolia."

6 Ta to'abiboda dina vona nana inoqolia 'inega imwaniniva ge goyo ta igivelukabwebwe bwa'obwa'oya.

7 'Inega Ieisu mai gitonovidi vonedi vonaya, "Ge ona mwaniniva, oya'itoto!"

8 Ta tuta nana itunuvane Ieisu ana 'aigeda tovo-tovolo i'itea.

9 Tuta nana bwanagega iwebui mai 'inega Ieisu luvine waiwaina neidi vonedi vonaya, "Yani di-avona ni'a o'itedi ge taha toga 'inaya ona vonavon-ayei ana laba ya'a Tomotau Natuna 'aligege ena ya'itoto 'evivi."

10 \* Ta Ieisu ana to'abibodayavo ivetala'aiea ivonaya, "Tola'ai weaqina luvine ana tove'itayavo

---

\* **17:2:** 2Fit 1:16-18  
Lk 3:22; Luve 18:15

\* **17:5:** Same 2:7; Ais 42:1; Md 3:17; Mk 1:11;  
\* **17:10:** Mal 4:5

ivonavona Ilaitia nanugweta namai ta 'abiboda To'etoyavua namai?"

11 'Inega Iesu vonaya, "Vonahaqiaqi, Ilaitia nugweta namai, 'inega yani qabudi nagivetunuqidi,

12 \* ta yavona aqiaqiemi Ilaitia nana ni'a mai ta tomotau ge ida 'inanea, ta 'esi iveyani kavokavovoyea edi nuenuega, nawale wese ya'a Tomotau Natuna 'idewani ina veilivu 'aiqegu."

13 \* 'Inega to'abiboda dina inuaia Iesu Ioni To-givebabitaiso weaqina vonavona 'idia.

*Taha gwama niboana luveifana 'wahalia Iesu giveaqaqiea*

*(Maki 9:14-29; Luke 9:37-43a)*

14 'Inega Iesu ana to'abibodayavo maega imai qabu 'idia, ta taha 'oloto mai ta tuqatuqanega sobadi Iesu 'iawanaya,

15 ta vonea vonaya, "Kaiwabu, natugu me'olotona una nuakolokoloyea, mana lugelabo 'ewea 'abo tuta qabuna vevekaoya ta tafetafefwai. Ta wese 'wafina visivisiqa qiduana, 'inega vaina tuta be'ube'u 'aiwe 'ala'alaina 'inaya ta wese go'ilaya.

16 'Inega au to'abibodayavo 'idia yamiea ta ge adi fata ida giveaqaqiei."

17 Ta Iesu vonedi, "Omi'a ma'oda? Debami 'i'wanina! Nage ge oda vetumaqanegu, waisa? Ta emi deba 'i'wana 'inega 'wafigu siniqaiqai. Omiei gwamana eda 'itei!"

---

\* 17:12: Md 11:14      \* 17:13: Lk 1:17

18 'Inega Ieisu niboana luveifana luvetunei 'ifoqe gwama nana 'inega, ta tuta ba'e 'inega veaqa-aqi 'evivi.

19 \* 'Abiboda Ieisu ana to'abibodayavo adi 'aidega imai 'inaya ivetala'aiea ivonaya, "Kai-wabu, tola'ai weaqina ima'a ge ama fata niboana luveifana ada 'wavi 'ifoqeyei?"

20 \* Ta Ieisu vonaya, "Omi'a emi vetumaqana dawalilina, 'inega ge ami fata. Ta yavona aqiaqiemi, 'eguma emi vetumaqana kavona te'wa ve-wanina ana fata 'idewana, e 'inega meaqana 'imia be bwanaga omo'e 'inaya ona vonaya, 'Ba'inega utoaiqo oi'idia!' ta namatayagemi. 'Inega ami fata yani qabuna ona viaqia.

21 Ta yavona aqiaqiemi, noqi ta wese vedede 'inega ami fata ba'e niboana diavona ona 'wavi 'ifoqeyedi. Ta ge taha wese yani 'inega."

*Ieisu ena vona vemagilafuna ena 'aliga weaqina  
(Maki 9:30-32; Luke 9:43b-45)*

22-23 \* Tuta nana Ieisu ana to'abibodayavo maega di'we Galili 'inaya itoa va'auta, 'inega vonedi vonaya, "Ya'a Tomotau Natuna nawale agu tosuluva nave'ineiegu tomotau 'idia be ina luve'aligigu, ta 'aubena vetoina 'inaya Yaubada mayawaigu nagiveya'itoto 'eviviegu." 'Inega Ieisu ana to'abibodayavo nuadi vita qiduana ba'e vonana weaqina.

*Vanue Gwalagwalana ana takesi weaqina*

---

\* 17:19: Md 10:1 \* 17:20: Md 21:21; Mk 11:23; Lk 17:6; 1Kol 13:2

\* 17:22-23: Md 16:21

24 \* Tuta nana Ieisu ma ana to'abibodayavo imai 'abaga Kafaneumi 'inaya, 'inega Vanue Gwalagwalana ana takesi ana to'ewa imai Fita 'inaya ivetala'aiea ivonaya, "Ma'oda, nage eu tove'ita taketakesi, nage gebu?"

25 Ta Fita vonaya, "E, tauna ena takesi a'ua'uya." 'Inega lugu vanuea ta Ieisu iana Fita vetala'aiea vonaya, "Saimoni, ma'oda unuanua 'aiqa bwa'obwa'o ana toluvineavo weaqidi? Aiqabu 'idiega takesi i'ewe'ewei, taudi edi tomotau 'idiega, nage mali tomotau 'idiega?"

26 'Inega Fita vonaya, "Mali tomotau 'idiega." 'Inega Ieisu wese vona 'evivi vonaya, "Vona-haqaqi, ta ba'e ilivu nana 'inega edi tomotauyavo edi toa igigivemeaqania.

27 Ta takesi ana to'ewayavo adi lutonova ge kana giveluveifei. 'Inega bani una 'ewei ta una tauya lavuya ta 'iqani nana umadu'onea e 'awana una gila'ei, 'inega mane una lobe ta una 'ewei. 'Inega una tauya takesi ana to'ewa 'idia ta mane nana una neidi ita'a weaqida."

## 18

*Togama ana wawa 'ena'ina mahala ena 'Ebeluvine gamonaya?*

*(Maki 9:33-37; Luke 9:46-48)*

1 \* 'Aubena omo'e 'inaya Ieisu ana to'abibodayavo imai ta ivetala'aiea ivonaya, "Kaiwabu, togama ana wawa 'ena'ina mahala ena 'Ebeluvine gamonaya?"

---

\* 17:24: 'Ifo 30:13; 38:26      \* 18:1: Lk 22:24

2 'Inega Ieisu taha gwama gabei mai ta nuanidia vetovoloi,

3-4 \* vonedia, “Yavona aqiaqiemi, omi'a 'eguma ona nuawebui gwama ba'ena 'idewani, 'inega omi'a ami wawa nave'ena'i mahala ena 'Ebeluvine gamonaya. Ta 'eguma ge ona nuawebui gogama goyogoyodi 'idewani, e nawale ge wese ona lugu 'Ebeluvine nana 'inaya.

5 \* 'Inega 'eguma togama taha gwama kavona ba'e gwama nana na'ebe'ewea ya'a agu wawega, e tauna ya'a wese 'ebe'ewegu.

*Sitonova luveifana ana viaqa weaqina*  
(Maki 9:42-48; Luke 17:1-2)

6 “Ta 'eguma taha tomotau ba'e gwama nana 'idewani nagivebe'uyea be ena vetumaqana 'iguya nanogea, e 'inega tomotau nana luaqiaqiea be dabo agona 'ebefiaqa maganaya ina yoqoni, ta ma dabona ina felawebuiea malavetaya nadamana nawebui.

7 Omi'a totoa bwa'obwa'o nuakolokolomi, mana 'ebebe'u 'eala 'eno'eno. Vonahaqiaqi, sitonova tuta qabuna 'ifo'ifoqe, ta 'eguma taha 'oloto enavo sitonovega nagivebe'udi e nawale 'oloto nana veilage qiduana nalobea.

8 \* “Ta 'eguma nimau nage 'aqeu ina givebe'uyeu 'inega una da'a yavuledi. Mana ge taha ana luveifana 'eguma nimau nage 'aqeu da'ada'adi ta yawai vataya una lobea, ta 'esi ge taha au luaqiaqi 'eguma ma bubuyau ina felawebuieu 'aiwe 'ala'alata vatayana 'inaya.

---

\* **18:3-4:** Md 19:14; Mk 10:15; Lk 18:17      \* **18:5:** Md 10:40; Lk 10:16; Ion 13:20      \* **18:8:** Md 5:29-30

<sup>9</sup> Matau wese 'idewani 'eguma nagivebe'uyeu una bwaqi yavulea. Luaqiaqieu 'eguma matau 'aidegana ta yawai vataya una lobeia, ta ge dalu-aqiaqieu 'eguma matau magilafudi ta ina felawe-buieu 'aiwe 'ala'alata vatayana 'inaya.

<sup>10</sup> \* “Gogama ba'e 'idewanina gebu taha 'idiega ona dikinekeinei. Yavona aqiaqi 'imia, gogama qabudi edi tovale'ewayavo tuta qabuna mahalaya Tamagu 'iawanaya itoatoa ta i'ite'itea.

*Vona sesebai sifi luluve'waivina weaqina*  
(Luke 15:3-7)

<sup>11</sup> \* “[Ta ya'a Tomotau Natuna yamai luluve'waividi sabi 'etoyavuidi.]

<sup>12</sup> Ta ona nuaia 'eguma taha 'oloto ena sifiavo adi yau 100 ta 'aigedana 'idiega naluve'waiva, 'inega ma'oda naviaqa 'aiqa? Yavona aqiaqiemi, nawale 99 dina bwanaga veanaya navalovedi ina toatoa ta natauya luluve'waivi nana sabi salina.

<sup>13</sup> Ta yavona aqiaqiemi, tuta nana naloba 'eviviea 'inega naqaiawa qiduana, ta 'abiboda 99 dina, mana taudi aqiaqidi itoatoa.

<sup>14</sup> 'Inega ona alamani aqiaqiea, Tamami mahalaya ge nuanuana gogama ba'e 'idiega taha naluve'waiva tomotau edi sitonova 'inega.

*Luveifana ana givetunuqa weaqina*

<sup>15</sup> \* “Eguma iau luveifana naviaqia 'iuya, 'inega una tauya 'inaya ta magilafumi ami 'aidega ena luveifana ona givetunuqia. Ta 'eguma eu vona nanoqolia 'inega ni'a maega oveiana 'evivi.

---

\* **18:10:** Ibe 1:14    \* **18:11:** Lk 19:10    \* **18:15:** Lk 17:3; Gal 6:1

16 \* Ta 'eguma ge nuana be eu vona nanoqoli 'inega tomotau 'aidegina nage magilafudi una 'ebe'ewedi ta maega ona tauya iau 'inaya. 'Inega o'a eu ve'ewa iau 'inaya una simana 'ifoqeyea togivetunuqa magilafudina matadia, 'inega taudi adi fata ve'ewa nana ina alamani aqiaqiei be ina 'awahaqiaqieu.

17 Ta 'eguma ge nuanuana emi vona nanoqoli 'inega iau nana ona tauyeya 'ekalesia 'idia ta vita nana weaqina ona vematamagilafuyedi. Ta 'eguma ge nuanuana edi vona nanoqoli 'inega ona nokea natoa 'ifoqe 'idewani takesi ana to'ewayavo, nage aiqabu ge Yaubada ida vetumaqanea.

18 \* “Yavona aqiaqi 'imia, 'eguma tola'ai bwa'obwa'oya oyoqoyoqonidi 'inega yani diavona nawale wese mahalaya Yaubada nayoqonidi. Ta wese 'eguma tola'ai bwa'obwa'oya oyavuyavuidi nawale yani diavona wese mahalaya Yaubada nayavuidi.

19 \* “Ta wese yavonemi, 'eguma bwa'obwa'oya tomotau magilafumi taha yani weaqina nuanua 'aideganega ona venoqi Yaubada 'inaya, e 'inega Tamagu mahalaya emi nuanua nave'iea.

20 Mana 'eguma tomotau magilafudi nage toidi agu wawega ina toava'auta, 'inega ya'a wese nu-anidia yatoatoa.”

### *Nuataqo weaqina*

21 'Inega Fita mai ta Ieisu vonea vonaya, “Kai-wabu, 'eguma iagu tuta qabuna 'iguya luveifana

\* **18:16:** Luve 19:15; Ion 8:17

\* **18:18:** Md 16:19; Ion 20:23

\* **18:19:** Mk 11:24; Ion 15:7



viaviaqia 'inega 'evisa tuta ena nuataqoi, nage tuta seveni ana yau?"

<sup>22</sup> \* Ta Ieisu vonaya, "Ge seveni ana yau, ta 'esi tuta qabuna una nuanuataqoya,

<sup>23</sup> mana nuataqo ilivu nana ba'e 'idewani mahala ena 'Ebeluvine 'inaya, ovivineneqa! Tolvine qiduana taha nuanuana ena tofewayavo adi aga ana buki na'itea 'inega nahalamani aqiaqiea 'evisa mane lova i'ewei 'inega.

<sup>24</sup> "Ta buki nana 'ite'itei, 'inega ena tofewa taha imiea 'inaya, ta tofewa nana ana aga 'evisa milioni 'idewani.

<sup>25</sup> Ta ge ana fata nave'iei, 'inega ena kaiwabu luvinea vonaya, 'O'a eu susuyavo maega emi kulufa qabuna ona vegimwaneyedi be mane nana una neigu au aga weaqina!

<sup>26</sup> Ta tofewa nana me ena nuavita tuqatuqanega sobadi venoqi 'inaya vonaya, 'Kaiwabu, tua uda nuakokoloyegu ta nawale aga nana ena vemaisa 'eviviea 'iuya.'

<sup>27</sup> 'Inega kaiwabu nana nuakokoloyea ta ana aga qabuna nuataqoya, ta 'inega awafelea webui tauya.

<sup>28</sup> "Tofewa nana ni'a webui, 'inega iana taha 'ita lobe, ta tauna ana aga goyona kavona 'aubena 'aidegana ana ve'ia lova 'inega 'ewea. 'Inega maganaya kafi givegaululuya ta voneaya, 'O'a au aga ba'itagana una ve'iea 'iguya!

<sup>29</sup> 'Inega iana tuqatuqanega sobadi ta venoqiea vonaya, 'Tua uda nuakokoloyegu ta nawale aga nana ena vemaisa 'eviviea 'iuya.'

---

\* **18:22:** Nug 4:24; Lk 17:4

30 Ta ena venoqi ge danoqolia ta 'esi vanue 'ebeyoqona 'inaya a'uluguyea be omo'e 'inaya natoa ana laba ana aga qabuna nalu'ovoia.

31 "Ta wese vaidi tofewa ba'e ilivuna i'itea 'inega nuadi vita qiduana. 'Inega itauya edi kaiwabuna 'inaya ta yani qabuna ni'a i'itea isimana 'ifoqeyea.

32 'Inega kaiwabu nana ena tofewa gabei mai ta voneaya, 'O'a tofewa veifa otaqiu, mana uvenoqiegu vonigo au aga qabuna ena nuataqodi, ta eu nuanua ni'a yaviaqia.

33 'Inega o'a wese luaqiaqieu 'eguma iau nana uda nuakolokoloyea be ana aga 'iuya uda nuataqoi 'idewani ya'a ni'a yaviaqia 'iuya, waisa?"

34 \* 'Inega kaiwabu nana diana vilei ta vanue 'ebeyoqona ana to'itamakiavo luvinedi ba'e tofewa nana vanue nana 'inaya wese ina a'uluguyea, ta ina luvematasabuya ana laba ana aga nana qabuna navemaisa 'ovoia."

35 \* 'Inega Iesu ena vona lu'ovoia vonaya, "Tamagu mahalaya wese ba'e 'idewani naviaqa 'aiqa 'imia 'eguma emiavo ge ona nuakolokoloyedi be edi luveifayavo ona nuataqodi."

## 19

### *Iesu ena ve'ita sa'ila weaqina (Maki 10:1-12)*

1 Tuta nana Iesu ba'e ve'ita diavona lu'ovoia, 'inega di'we Galili nogei ta lugu di'we Iudia gamonaya, ta taha di'we 'inaya toatoa go'ila Iolidani di'wenaya.

---

\* **18:34:** Md 5:25-26      \* **18:35:** Md 6:15; Mk 11:25; Efe 4:32; Kol 3:13

<sup>2</sup> 'Inega qabu qiduadi Ieisu i'abibodea, ta omo'e 'inaya tovevihiqa qabudi giveaqaqiedi.

<sup>3</sup> Ta Falisiavo imai Ieisu 'inaya sabi sitonovina, 'inega ivetala'aiea ivonaya, "Nage ana fata taha 'oloto taunega ena 'iu kavokavovo 'inega moqanena navesa'ilidi?"

<sup>4</sup> \* Ta Ieisu edi vona ve'evivia vonaya, "Ni'a oalamanian Buki Nugwenugweina 'inaya i'wayavia tuta 'ebeve'ale 'unu 'inaya To'iva'ava'ata tomotau magilafudi viaqidi me'olotona ta wese mevavinenena",

<sup>5</sup> \* ta vonaya,  
"Ba'e 'iuna 'inega 'oloto tamana wese inana nanogedi ta moqanena maega ina luvetuba, 'inega magilafudi 'wafidi nave'aidega.

<sup>6</sup> Lova edi toa kavona magilafudi 'idewani, ta 'esi ba'itagana 'wafidi ni'a ve'aidega, 'inega tola'ai Yaubada ni'a luvetubea ge taha toga navetoasi'iei."

<sup>7</sup> \* 'Inega Falisi ivonaya, "Tola'ai weaqina Mosese ena luvine a'uya vonigo 'oloto taha ana fata leta 'inaya ena noga na'wayavia ta moqanena naneidi 'inega nasa'iledi?"

<sup>8</sup> Ta Ieisu vonedi, "Emi vedeba 'i'wana weaqina Mosese awafelemi be moqanemiavo ona vesa'ilidi. Ta lova tuta ana 'ebeve'ale 'inaya gebu wese taha awafela da'eno'eno sa'ila weaqina.

<sup>9</sup> \* Ta yavonemi, 'eguma taha 'oloto moqanena ge taha luveifana ida viaqi ta tua moqa-

---

\* **19:4:** Nug 1:27; 5:2      \* **19:5:** Nug 2:24; Efe 5:31      \* **19:7:** Luve 24:1-4; Md 5:31      \* **19:9:** Md 5:32; 1Kol 7:10-11

nena navesa'ilidi ta navaqi ukamana mali vavine 'inaya, e 'inega 'oloto nana luabu ilivuna ni'a vi-aqia.”

<sup>10</sup> 'Inega Ieisu ana to'abibodayavo ivoneaya, “Eguma vaqi ana luvine ba'e 'idewani 'inega lu-aqiaqiea be ge taha toga navaqi.”

<sup>11</sup> Ta Ieisu vonedi, “Ve'ita ba'e gebu tomotau qabudi adi fata be ina 'awahaqiaqiedi, ta 'esi tomeqabu Yaubada alamani ni'a neidi ba'e yani diavona weaqina, e taudi adi fata ve'ita nana ina 'awahaqiaqiedi.

<sup>12</sup> Tomotau vaina ge ida vaqi edi 'iu taha taha 'idiega. Nage taha 'oloto tubu veiveifana 'inega ge ana fata navaqi, ta wese taha 'oloto ge ana fata navaqi mana vaina tomotau yani ni'a iviaqia 'wafina 'inaya. Ta wese taha 'oloto taunega vaqi nogea, mana nuanuana Yaubada weaqina navetofewa. 'Inega 'eguma taha toga ba'e vona nana na'awahaqiaqiedi e 'inega ona awafelea be na'awahaqiaqiedi.”

*Ieisu gogama vona veyolubedi  
(Maki 10:13-16; Luke 18:15-17)*

<sup>13</sup> 'Inega tomotau gogama imiedi Ieisu 'inaya nuanuadi nagitonovidi be weaqidi nanoqi Yaubada 'inaya. Ta ana to'abibodayavo tomotau diavona gogama imiedia iawatayedi.

<sup>14</sup> \* Ta Ieisu vonedi vonaya, “Gogama ona awafeledi be ina mai 'iguya, ta ge ona 'etobodedi, mana gogama ba'e 'edewanina mahala ena 'Ebeluvine taudi weaqidi.”

---

\* **19:14:** Md 18:2-3

15 'Inega Ieisu gogama diavona gitonovidi ta vona veyolubedi, 'inega 'abaga nana nogei ta tauya.

*Taha 'oloto kaikaiwabuna weaqina  
(Maki 10:17-31; Luke 18:18-30)*

16 'Abiboda 'oloto taha mai Ieisu 'inaya ta vonaya, "Tove'ita, tola'ai aqiaqina ena viaqi be 'inega yawai vataya ena 'ewei?"

17 \* Ta Ieisu vonaya, "Tola'ai weaqina uvevetala'aiegu ilivu aqiaqina ana viaqa weaqina? Mana Yaubada ana 'aidega aqiaqi otaqina toatoa, ta 'eguma nuanuau yawai vataya una lobe'a 'inega tauna ena luvineavo una 'abibodedi."

18 \* 'Inega 'oloto nana vetala'aiea vonaya, "Isana 'ai luvine?"

'Inega Ieisu vonea, "Ge una luv'e'aliga, ge una luabu, ge una vanawala, ta wese kotu ana tuta 'inaya iau ge u'avega una ve'ewa kavovoi.

19 \* Ta tamau be inau una 'amayabedi, be wese emwavo una veyolubedi 'idewani tau'u uveveyolubeu."

20 'Inega 'oloto nana vonaya, "Luvine ba'e qabudi ni'a ya 'abiboda aqiaqiedi, ta tola'ai wese ena viaqi?"

21 'Inega Ieisu voneaya, "Eguma nuanuau eu ilivu navetunutunuqa aqiaqi 'inega una 'evivi eu 'abagaya be eu kulufa qabudi una vegimwaneyedi. Ta mane nana una 'ewei una vewila'ayea lukwalukwa 'idia, ta 'inega una mai

---

\* **19:17:** Luvi 18:5; Lk 10:28      \* **19:18:** 'Ifo 20:13-16; Luve 5:17-20

\* **19:19:** 'Ifo 20:12; Luvi 19:18

una 'abibodegu, be 'inega kaikaiwabu mahalaya una lobeá.”

<sup>22</sup> 'Oloto nana Ieisu ena vona ba'e noqolia 'inega me ena nuavita 'evivi tauya, mana ena kulufayavo vegagaledi.

<sup>23</sup> 'Inega Ieisu ana to'abibodayavo vonedi, “Yavona aqiaqiemí, taudi tovekaikaiwabu edi lugu Yaubada ena 'Ebeluvine 'inaya vitana.

<sup>24</sup> Ta wese yavonemi yubai kameli ena lugu saima vetoana 'inega vitana, ta taudi tovekaikaiwabu edi lugu Yaubada ena 'Ebeluvine 'inaya vita otaqina.”

<sup>25</sup> Ieisu ana to'abibodayavo ena vona ba'e inoqolia 'inega nuadi voqana qiduana ta ivonaya, “Eguma vonahaqiaqi ba'e 'idewanina, 'inega togama ana fata 'etoyavua nalobei?”

<sup>26</sup> \* Ta Ieisu 'itedi ta vonaya, “Yani ba'e tomotau ge adi fata, ta Yaubada 'inaya yani qabuna ana fata!”

<sup>27</sup> 'Inega Fita vonaya, “Kaiwabu, ta ima'a ma'oda, mana ema kulufayavo qabudi ni'au anogedi ta a'abi'abibodeu?”

<sup>28</sup> \* Ta Ieisu vonedia, “Vonahaqiaqi, nawale bwa'obwa'o ana givevauvau 'inaya ya'a Tomotau Natuna agu galiva kaikaiwabuna 'inaya ena toabui. Ta omi'a agu to'abibodayavo ami galiva tuwelo 'idia wese ona toabui, be me Isileli edi gade tuwelo ona luvinedi.

<sup>29</sup> “Eguma tomeqabu omi'a emi vanueavo nage taimiavo nage novumiavo nage tamamiavo be inamiavo nage natumiavo nage ami talaqayavo

---

\* **19:26:** Iob 42:2      \* **19:28:** Md 25:31; Lk 22:30; Ve 3:21

onogedi ya'a weaqigu, 'inega ba'e yani diavona ni'a onogedia nawale ona loba 'eviviedi ma ana luvetomana, ta wese yawaimi vataya maega.

<sup>30</sup> \* Ta tomeqabu ba'itaga inugwenugweta nawale 'eala 'idiega ina 'abiboda, ta taudi ba'itaga i'abi'abiboda nawale ina nugweta.

## 20

### *Vaoqa ana tofewa adi ve'ia weaqina*

<sup>1</sup> "Mahala ena 'Ebeluvine ba'e 'edewana: Taha 'oloto 'awa'awai otaqaya ya'itoto tauya 'abaga 'ebetoava'auta 'inaya ta vaina tomotau gaba va'auqidi imai ta vetala'aiedi sabi fewa ena vaoqa 'inaya.

<sup>2</sup> 'Inega iveqae adi ve'ia weaqina, ta tonivaoqa awafela adi ve'ia 'aubena 'aidegana weaqina nawale naneidi. 'Inega vetunedi itauya ena vaoqaya sabi fewa.

<sup>3</sup> "Inega baba'au tawa vanemai, 'inega tonivaoqa nana 'evivi tauya 'abaga 'ebetoava'auta 'inaya, 'inega vaina tomotau 'itedi itoatoa kavokavovo,

<sup>4</sup> 'inega gabedi vonaya, 'Omi'a wese kana tauya egu vaoqaya ona fewa ta ami ve'ia aqiaqina 'iba'igo ena neimi.' 'Inega maega itauya vaoqaya.

<sup>5</sup> Ta baba'auya ta wese 'idewani baba'au yewav-ilea 'inaya 'evivi tauya 'ebetoava'auta nana 'inaya, ta wese vaina tomotau lobedi 'inega 'ebe'ewedi tauyedi vaoqaya sabi fewa.

<sup>6</sup> 'Inega wese lavilavi lu'evivi tauya ta vaina tomotau wese lobedi vetala'aiedi vonaya, 'Tola'ai

---

\* **19:30:** Md 20:16; Lk 13:30

weaqina 'aubena qabuna ba'idia otoatoa kavokavovo?"

7 "Ta 'inega ivoneaya, 'Ima'a ge taha toga dagabema fewa weaqina.'

"Inega tonivaoqa vonaya, 'Omai, omi'a wese egu vaoqaya ona fewa.'

8\* "Tuta nana ni'a velovanea 'inega tonivaoqa ena tofewa adi to'itamaki vonea vonaya, 'Tofewa qabudi una gabedi ina mai adi ve'ia una neidi. Ta taudi i'abiboda imaia 'idiega una ve'ale una maduneidi, 'inega natauya ana laba una lu'ovoa tonugweta 'idia.'

9 "Tomeqabu lavilavi 'inaya imai ive'ale ifewa adi ve'ia 'aubena 'aigedana weaqina i'ewea.

10 'Inega tofewa nugwenugweidi 'awa'awai 'inaya ive'ale ifewa ivonaya be adi ve'ia ma ana givetomana ina 'ewei, ge taudi imai 'abibodadia adi ve'ia 'idewani. Ta gebu, mana taudi wese ve'ia 'aubena 'aidegana weaqina i'ewea.

11 'Inega adi ve'ia i'ewea i'itea ta weaqina ge ida qaiawa, 'inega tonivaoqa 'inaya ilugwae ivonaya,

12 'Tomotau vauvaudi imai ifewa tuta kusakusana, ta ima'a 'aubena kuena wese baba'au valema ta afewa, 'inega ama ve'ia agona ada 'ewea. Ta ma'oda 'inega ama ve'ia lelelea alobei?"

13 "Inega tonivaoqa tofewa taha voneaya, 'Iagu, ge taha luveifana eda viaqi 'imia, mana egu awafela ami ve'ia 'aubena 'aidegana weaqina tawadega yavonemi ta o'awahaqiaqiea, waisa?"

---

\* 20:8: Luvi 19:13; Luve 24:15



14 'Inega au ve'ia ba'e una 'eweua una tauya. Ya'a egu luvine ba'e 'idewani, tomeqabu imai lavilavi adi ve'ia yaneidi o'a wese au ve'ia 'idewana.

15 Vonahaqiaqi, ya'a luaqiaqiegu be egu 'ebeluvine 'inaya agu 'aidega yaluluvine, waisa? Ta omi'a egu veyoluba tomotau 'idia weaqina ge ona nualuveifa.' ”

16 \* Ta Iesu ena vona lu'ovoa vonaya, “Inega aiqabu i'abi'abiboda nawale ina nugweta, ta aiqabu inugwenugweta nawale ina 'abiboda.”

*Iesu ena vona vetoina ena 'aliga weaqina*  
(Maki 10:32-34; Luke 18:31-34)

17 Tuta nana Iesu Ielusalema weaqina nawale 'wato'watovu 'inega ana to'abibodayavo tuwelo vanaqoyedi 'eda nanavinaya ta vematamagila-fuyedi,

18\* vonaya, “Katautauya oade Ielusalema 'inaya ta ya'a Tomotau Natuna ina ve'ineiegu toveguba qiduqiduadi be luvine ana tove'itayavo 'idia. Ta taudi ina luvine egu 'aliga weaqina.

19 'Inega 'abiboda ina ve'ineiegu taudi ge me Diu 'idia, ta ina givenu'wegu be wayoyega ina vunuqa dadanegu, 'inega 'etoluai 'inaya ina tutuve'ewegu. Ta 'aubena vetoina 'inaya Yaubada 'aligege na-giveya 'itoto 'eviviegu.”

*Iesu ena ve'ita vetofewa weaqina*  
(Maki 10:35-45)

20 'Inega Sebedi moqanena ma natudiavo imai Iesu 'inaya ta tuqatuqadiege isobadi nuanuadi Iesu ina venoqiea taha yani weaqina.

---

\* 20:16: Md 19:30; Mk 10:31      \* 20:18: Md 16:21; 17:22-23

21 \* 'Inega Ieisu vonaya, "Tola'ai nuanuami?"

'Inega vavine dina ivonaya, "Egu nuanua be natugwavo una awafeledi eu 'Ebeluvine gamon-aya di'weuya ina toabui taha au 'ataqia ta taha au kelias."

22 \* 'Inega Ieisu natudiavo vonedia, "Omi'a emi noqi ba'e ana alamani aqiaqi ge oda 'ewei, mana nawale visiqa vedina 'inega ena numa. Nage omi'a wese ami fata vedi nana 'inega ona numa?"

Ta ivonaya, "Ama fata."

23 'Inega Ieisu vonaya, "Vonahaqiaqi, vedi nana 'inega ena numa omi'a wese 'inega ona numa. Ta ge agu fata tomotau ena venua'ivinidi aiqabu nawale egu 'Ebeluvine 'inaya agu 'ataqiega wese agu keliega ina toabui. Ta 'esi Tamagu ana 'aigeda 'ebetoa diavona ni'a 'iva'ava'aidi tomotau weaqidi."

24 'Inega to'abiboda ediavo adi yau teni, Iemesa ma taina Ioni edi noqi inoqolia 'inega diadi vilea.

25 \* 'Inega Ieisu gaba va'auqidi vonedi vonaya, "Omi'a ni'a oalamaniana bwa'obwa'oya toluvine qidudquadi edi tomotauyavo tuta qabuna iluviluvinedi ta luvine falafalana ineineidi.

26 \* Egwavo, omi'a ge wese 'idewana ona veilivu 'aiqa. Ta 'esi 'eguma taha toga 'imiega nuanuau una vetoluvine, 'inega emwavo weaqidi una vetofewa.

27 "Ta wese 'eguma togama 'imiega nuanuau una vetovanugweta 'inega luaqiaqieu emwavo weaqidi una vetofewa.

---

\* **20:21:** Md 19:28; Lk 22:30      \* **20:22:** Md 26:39; Ion 18:11

\* **20:25:** Lk 22:25-26      \* **20:26:** Md 23:11; Mk 9:35

28\* Wese 'idewana ya'a Tomotau Natuna ge eda mai bwa'obwa'oya be vonigo tomotau weaqigu ina vetofewa, ta 'esi yamai sabi vetofewa tomotau weaqidi, ta wese ni'a yahawafelegu be ena 'aliga tomotau qabumi ami 'etoyavua weaqina."

*Matakwaya magilafudi Ieisu giveaqaqiedi*  
(Maki 10:46-52; Luke 18:35-43)

29 'Inega Ieisu ma ana to'abibodayavo Ieliko inogea ta qabu qiduadi Ieisu i'abi'abibodea.

30 Ta 'oloto magilafudi matadi kwayakwayana 'eda nanavinaya itoabui itoatoa, ta Ieisu maimai valena inoqonoqolia 'inega igabea ivonaya, "Deibida tubuna ye, uda nuakolokoloyema!"

31 'Inega qabu diavona edi gaba nana inoqolia ta ilugwaeyedi ivonaya, "Omi'a olua'u, ge ona gaba."

Ta magilafudina igaba bonadi qiduanega ivonaya, "Kaiwabu, o'a Deibida natuna ye uda nuakolokoloyema!"

32 'Inega Ieisu veutovolo ta gabedi imai vonedia, "Tola'ai nuanuami ena viaqi weaqimi?"

33 Ta ivonaya, "Kaiwabu, nuanuama matama una giveaqaqiedi be yaqisa ama fata ana 'ita!"

34 'Inega Ieisu nuakolokoloyedi 'abo matadi gitonovia 'inega matadi lukwayavonega 'eaea ta i'ita aqiaqi, 'inega Ieisu i'abibodea.

## 21

*Ieisu ena lugu Ielusalema 'inaya*

(Maki 11:1-11; Luke 19:28-40; Ioni 12:12-19)

1 Tuta nana Ieisu ma ana to'abibodayavo itautauya Ielusalema weaqina, 'inega i'ifoqe

---

\* 20:28: Lk 22:27; Fil 2:7

'abaga Bedifegi bwanaga Olibe 'inaya. 'Abaga nana ge luluvai Ielusalemayega, 'inega Ieisu ana to'abibodayavo magilafudi vetunedi ina nugweta,

<sup>2</sup> ta vebibinedi vonaya, “Abaga 'iawadaya ona tauya, ta tuta nana ona 'ifoqe yubai doniki ma natuna ona 'itedi 'aiwe 'inaya yoqoyoqonidi itovotovo, ta magilafudi ona li'emidi ona miedi 'iguya.

<sup>3</sup> Ta 'eguma togama navetala'aiemi tola'ai weaqina doniki o'ewe'ewedi, 'inega ona vonaya, 'Ema Kaiwabu ena nuanua 'idewani', 'inega tovetala'ai nana nahawafeledi 'imia.”

<sup>4</sup> Ba'e yani nana 'ifoqe be 'inega tola'ai lova tovesimasimana isimanea ana aqiaqina na'ifoqe, e ba'e 'idewani ivonaya,

<sup>5</sup>\* “Saioni tomotaudi ona vonedi ona vonaya, 'O'itea, emi Kini maimai 'imia.

Tauna tonuawebui doniki natudi gwavunaya gelu.

Ta doniki nana me'olotona ta kekeyavauna 'inaya.’”

<sup>6</sup> Ieisu ana to'abibodayavo ena vona i'abibodea tuata itauya.

<sup>7</sup> 'Inega doniki nana ma natuna ilobedi 'abo imiedi, ta adi kalekoyega doniki gwavudi ita'uli, 'abo Ieisu gelu.

<sup>8</sup> Ta qabu diavona wese adi kaleko 'edaya ita'ulidi ta vaina magimagi 'waedi ida'edi ta 'eda nana ita'ulia.

---

\* 21:5: Sek 9:9

9 \* Ieisu qabu nuanidia maega itautauya, ta qabu diavona koluega iawahawatuboya ivonaya, “Osana! Kaiwa qiduana o’a Deibida tubuna ’iuya! Yaubada, nuanuama tauna maimai Kaiwabu ana wawega una vona veyolubea.

Yaubada Toatoa Vane Otaqiu ahawahawatubou!”

10 Tuta nana Ieisu lugu Ielusalema tomotau qabudi divelegudi ta givenuavoqanidi ivonaya, “Isana omo’ena togama?”

11 Ta qabu dina Ieisu maega itautauya tonuavoqana dina edi vona ive’evivia ivonaya, “Ba’e tauna tovesimasimana ana wawa Ieisu, tauna Nasaleta ’olotona di’we Galili ’inega mai.”

*Ieisu lugu Vanue Gwalagwalana ’inaya  
(Maki 11:15-19; Luke 19:45-48; Ioni 2:13-22)*

12 Inega Ieisu lugu Vanue Gwalagwalana ’inaya, ta togimwaneavo ta wese tovegimwaneavo qabudi ’wavinidi. Ta mane ana tosenisiavo edi ’ebea’u ta wese bunebune adi tovegimwaneavo edi ’ebetoa ’e’ubuini,

13 \* ta vonedi vonaya, “Buki Nugwenugweina gamonaya Yaubada ena vona i’wayavia vonaya, ‘Egu vanue ina gabea vanue ’ebevenoqi’, ta omi’a ogivilea vonigo tovanawala adi watu’ubu ’idewani.”

14 Ieisu nawale toatoa Vanue Gwalagwalana ’inaya, ’inega matadi kwayakwayana ta wese ’aqedi veifana imai Ieisu ’inaya ’abo qabudi giveaqiaqiedi.

---

\* 21:9: Same 118:25-26; 148:1      \* 21:13: Ais 56:7; Iel 7:11

15 Ta toveguba qiduqiduadi ta wese luvine ana tove'itayavo Ieisu ena viaqa aqiaqina ta waiwaina i'itedi, ta wese gogama bonadi inoqolia Vanue Gwalagwalana gamonaya ivevekolukolua, ivon-avonaya, "Deibida tubuna kana awatuboya!"

16 \* 'Inega toveguba dina Ieisu ivetala'aiea ivon-aya, "Nage gogama ba'e edi vona unoqolia?"

'Inega Ieisu vona 'eviviedi vonaya, "Ao, ni'au yanoqolia, ta nage Buki Nugwenugweina gamon-aya ge oda avoya vonaya, 'Gogama agoagodi ta wese sususudi ni'a uve'itedi ma'oda 'inega 'awadiega ina awatubo aqi-aqieu.' "

17 'Inega Ieisu tomotau nogedi Ielusalema 'inaya, ta 'ifoqe tauya Bedani 'inaya, ta omo'e 'inaya 'enova.

*Ieisu 'ala'ai vona ve'alatea  
(Maki 11:12-14,20-24)*

18 Ta mahala ahalia Ieisu ya'itoto 'evivi tautauya Ielusalema weaqina, ta 'edaya botana lutonovia.

19 Nawale tautauya, 'inega taha 'ala'ai 'itea 'eda nanavinaya 'abo vanaqo 'itea vuaqa gegana, ta 'esi 'waenamo. 'Inega Ieisu 'aiwe nana vona ve'alatei vonaya, "Nawale ge wese una vuaqa 'evivi!" Ta 'inega 'aiwe nana mwatuqu kwayavona.

20 Ta tuta nana Ieisu ana to'abibodayavo ba'e viaqa nana i'itea 'inega nuadi voqana ta ivoneaya, "Ma'oda 'inega 'aiwe nana mwatuqu kwayavona?"

21 \* Ta Ieisu vonedi, "Yavona aqiaqiemi, 'eguma me emi vetumaqana ta ge ona venuana magilafu,

\* 21:16: Same 8:2 \* 21:21: Md 17:20; Lk 17:6; 1Kol 13:2

'inega tola'ai ni'a yaviaqia ba'e 'aiwe nana 'inaya, omi'a wese ami fata 'idewanina ona viaqia. Ta wese 'eguma bwanaga ba'e 'inaya ona vonaya, 'Utovolo utoaiqo mwade'waya!' e 'inega 'idewani naviaqia.

22 \* 'Eguma me emi vetumaqana ona noqi Yaubada 'inaya vaina yani weaqina, e 'inega yani diavona ona lobeas."

*Isisu ivetala'aiea ena luvine 'iuna weaqina  
(Maki 11:27-33; Luke 20:1-8)*

23 'Inega Isisu Vanue Gwalagwalana 'inaya 'evivi lugu ta veve'ita. 'Inega toveguba qidudid-uadi wese 'abaga ana tovanugwetayavo imai 'abo Isisu ivetala'aiea ivonaya, "Uvonema togama ena luvineyega ba'e 'idewana ufewafewa 'aiqa? Ta wese togama ena waiwaiega yani ba'e uviavi-aqidi?"

24 Ta Isisu vonedi vonaya, "Nugweta taha yani ena vetala'aiemi, ta 'eguma egu vona ona ve'ia aqiaqiea e 'inega ya'a wese ena vonemi egu luvine weaqina.

25 Egu vetala'ai ba'e, 'Togama ena luvineyega Ioni tomotau givehabitaisodi, Yaubada 'inega nage tomotau 'idiega? "

'Inega taudi adi 'aidega iveqae ivonaya, "Ma'oda ena vona kana ve'evivi 'aiqei? Mana 'eguma kana vonaya 'Yaubada 'inega', e nawale navona 'evivieda navonaya, "Inega tola'ai weaqina Ioni ge oda vetumaqanei?"

---

\* 21:22: Md 7:7-11; 18:19

26\* Ta wese 'eguma kana vona, 'Tomotau 'inega', e nawale qabu ina nualuveifa 'idaya mana qabudi Ioni i'awatovesimasimanea."

27 'Inega Ieisu ena vetala'ai ive'evivia ivonaya, "Ge ada alamania."

'Inega Ieisu wese vonedi vonaya, "'Inega ya'a wese ge ena vonemi togama ena luvineyega ba'e 'idewani yaviaviaqa 'aiqa."

*Vona sesebai 'oloto natunavo magilafudi weaqidi*

28 'Inega Ieisu wese vonedi, "Ba'e egu vona ona nuaia. Taha 'oloto natunavo me'olotodi magilafudi itoatoa. 'Inega tamadi natuna 'unutauna vonea vonaya, 'Natugu, 'itaga una tauya vaoqaya una fewa',

29 "ta 'unutau nana tamana ena vona ve'evivia vonaya, 'Iko'i', ta 'abiboda nuana givila 'abo tauya ve'ale fewa.

30 "'Oloto nana natuna tugamwanina wese 'idewanina vonea vonaya, 'Natugu, 'itaga una tauya talaqaya una fewa',

"'abo natuna vonaya, 'E aqiaqina 'idewani, nawale ena tauya', ta ge datauya.

31 "'Inega magilafudi 'idiega togama tamadi ena vona 'abibodei?"

Ta tovegubayavo wese 'abaga ana to'itamakiavo ivonaya, "Unutauna".

'Inega Ieisu vonedi vonaya, "Vonahaqiaqi, toluveifadi taudi takesi ana to'ewayavo be wese tokodada nawale ina madulugu Yaubada ena 'Ebeluvine 'inaya, ta omi'a 'abiboda.

32\* Mana lova Ioni 'eda tunutunuqina ve'itemi

\* 21:26: Md 14:5      \* 21:32: Lk 3:12; 7:29-30



ta ge oda vetumaqanea, ta 'esi takesi ana to'ewayavo be wese tokodada ivetumaqanea. Matamiega wese o'itedi inuagivila, ta omi'a ge oda nuagivila ta nawale ge oda vetumaqanea, waisa?"

*Vona sesebai vaoqa ana to'itamaki weaqidi  
(Maki 12:1-12; Luke 20:9-19)*

33 \* Ta Iesu wese vonedi vonaya, "Taha vona sesebai wese ona noqolia tonivaoqa taha weaqina. Tonivaoqa nana 'oine ana loi 'wadia ena vaoqa gamonaya, ta 'ali vivilia ta wese 'oine ana 'ebememe viaqia. 'Inega gweda vaoqa gamonaya yoqonia ta tomotau 'ewedi be vaoqa ina 'itamakia, ta tauna tauya mali di'we 'inaya.

34 Ta bolimana ana tuta 'inaya ena tofewayavo vaina vetunedi ena vaoqaya 'oine vuaqina sabi 'ewadi ena to'itamakiavo 'idiega.

35 "E tuta nana itauya vaoqaya 'inega to'itamakiavo tofewa dina ikafidi, ta taha ivunuqia ta vemagilafuna iluve'aligia ta vetoina iludaboya.

36 'Abiboda tonivaoqa nana wese ena tofewayavo tufwana qabudi vetunedi, ta to'itamaki diavona wese 'idewana iveilivu 'aiqedi.

37 Ta tuta vetoina 'inaya tonivaoqa nana natuna me'olotona vetunea 'idia ta taunega vonaya, 'Ba'e natu otaqigu, 'inega ina 'amayabea.'

38 \* "Ta tuta nana natuna 'ifoqe i'itea 'inega to'itamaki diavona ma ediavo iveveqae ivonaya, 'Emavo, 'oloto omo'e maimai tauna kaiwabu nana

---

\* 21:33: Ais 5:1-2 \* 21:38: Md 27:1

natu otaqina, 'inega kana luve'aligia be yaqisa ita'a taudega ba'e vaoqa nana kana luvinea.'

39 \* 'Inega ikafia vaoqega ifelawebuiea 'ali gwavunaya ta iluve'aligia.

40 "Inega ona nuaia tuta nana tonivaoqa na'evivi namai tola'ai naviaqi ena to'itamakiavo 'idia?"

41 'Inega Ieisu ena vetala'ai ive'evivia ivonaya, "Tauna toluve'aliga diavona nawale naluve'aligidi be ena vaoqa nahawafelei to'itamaki aqiaqidi 'idia, 'inega bolimana ana tuta 'oine vuaqina tonivaoqa nana ina neia."

42 \* 'Inega Ieisu wese vona sesebaiega vonedi vonaya, "Nage Buki Nugwenugweina ena simana 'inega onuave'avinia vonaya,

'Lova 'oqola nana to'eyoqona inogea,  
ta ba'itagana 'oqola qabudi luviluvinedi.

Ba'e eda Kaiwabu ena viaqa,  
ta viaqa nana ana 'ita aqiaqi otaqina 'idaya.'

43 "Yavona aqiaqiemi, Yaubada 'imiega ena 'Ebeluvine na'ewa yavulea ta mali qabu naneidi, be taudi 'idiega vuaqa aqiaqina na'ifoqe.

44 'Eguma taha toga 'oqola nana 'inaya nalu-tuhuyei ta nabe'u nawale luluna nabaidi, ta wese 'eguma 'oqola nana nabuinia taha toga debanaya nawale namemea."

45 Ieisu ena vona sesebai ba'e toveguba qiduqid-uadi ta wese Falisiavo inoqolidi ta ialamania vonigo taudi weaqidi vonavona.

---

\* 21:39: Ibe 13:12 \* 21:42: Same 118:22-23; Lom 9:33; 1Fit 2:6-8

<sup>46</sup> 'Inega 'eda isalia nuanuadi Ieisu ina kafia, ta imwaniniva qabu weaqidi, mana Ieisu i'awatovesimasimanea.

## 22

*Vona sesebai vaqi 'abwagana weaqina*  
(*Luke 14:15-24*)

<sup>1</sup> Taha wese vona sesebai Ieisu neidi vonaya,

<sup>2</sup> “Mahala ana 'Ebeluvine 'idewani taha kaiwabu 'abwaga 'iva'ava'aia natuna me'olotona ena vaqi weaqina.

<sup>3</sup> 'Inega ena tofewayavo luvetunedi itauya tomeqabu taudi lova vematamagilafu ni'a i'ewea 'abwagana weaqina sabi 'ebe'ewadi, ta inoga.

<sup>4</sup> “Inega wese ena tofewayavo vaina luvetunedi itauya taudi lova wese vematamagilafu i'ewea 'idia. 'Inega i'aionidi ivonaya, 'Kaiwabu ena 'abwaga tawa 'iva'ava'aia, 'inega ena bulumakau qiduana be vaina kekeyauvaudi maega ni'au luguhudi lubudedi. Ta yani qabuna ni'au 'elumao, 'inega ona mai kana tauya 'ai nana weaqina.’

<sup>5</sup> Ta inoga ge ida mai, ta 'esi itutuvila itauya edi nuanua sabi viaqidi. 'Inega taha 'oloto tauya ena vaoqaya, ta wese taha 'oloto tauya ena sitoa 'inaya.

<sup>6</sup>\* “Ta kaiwabu nana wese vaina ena tofewayavo luvetunedi tomotau sabi 'aionidi, ta taudi wese inoga ta itovolo tofewa diavona iveilivu veifedi ta iluve'aligidi.

<sup>7</sup> 'Inega kaiwabu nana diana vilea ta ena toluaviayavo luvetunedi itauya toluve'aliga diavona ifofolidi ta edi 'abaga ituini 'alaia.

---

\* **22:6:** Md 21:35

8 “Abiboda kaiwabu nana ena tofewayavo 'idia vonaya, 'Vaqi 'abwagana tawa 'i'iva'ava'aina, ta taudi lova yavematamagilafuyedi edi ilivu veifana 'inega ge adi fata ina mai.

9 'Inega 'eda magalua 'inaya ona tauya ta tomeqabu ona lobedi ona 'ebe'ewedi ona miedi vaqi 'abwagana ina vayavulei ina 'ainia.'

10 'Inega i'ifoqe 'edaya 'abo tomotau qabudi igaba va'au'auqidi vaina luveifadi ta vaina aqi-aqidi imai 'abo vaqi ana vanue iluveagatuna'ia.

11 “Tuta nana kaiwabu mai 'abwaga ana to'ai sabi 'itadi 'inega 'oloto taha 'ita lobege ana kaleko aqiaqidi ta 'esi bwavubwavudi.

12 'Inega vetala'aiea vonaya, 'Iagu, ma'oda 'inega ulugu mai 'aiqa, mana ba'e kaleko diavona ge daluaqiaqiei vaqi 'abwagana weaqina, waisa?' Ta 'oloto nana gebu ana fata vetala'ai ba'e nave'evivia.

13 \* “'Inega kaiwabu ena tofewayavo vonedia, “Oloto omo'e ona kafia ta nimana be wese 'aqena ona yoqonidi ta ona inoqei na'ifoqe velovelovanaya, omo'e 'inaya tomotau qabudi idoudou ta aladi kikokiko be wese visiqa vataya ilobelobe.'

14 Mana tomotau qabudi Yaubada gabedi, ta 'idiega ge 'ealidi venua'ivinedi.”

*Vetala'ai takesi weaqina*

*(Maki 12:13-17; Luke 20:20-26)*

15 \* 'Inega Falisi adi 'aidegamo itoava'auta ta idima govaqa ma'oda Iesu ina vetala'aiei, be edi vona ana ve'ia 'inega ena luveifana ina lobei be yaqisa adi fata ina kafia.

---

\* 22:13: Md 8:12; 25:30; Lk 13:28      \* 22:15: Mk 3:6

16 'Inega adi to'abibodayavo ta wese toluvine qiduana Elodi ena qabuyavo maega iluvetunedi itauya Ieisu 'inaya ivonaya, "Tove'ita ni'a ahalamaniu eu ilivu tunutunuqina, Yaubada ena nuanua uveve'ita aqiaqiea ta wese tomotau edi waiwai weaqina gebu uda mwaniniva, ta tua vonahaqiaqi ululugaihiea tomotau qabudi 'idia.

17 Ma'oda unuanua 'aiqa, nage luaqiaqiea be ita'a me Diu kana takesi me Loma edi toluvine agona Sisa 'inaya, nage gebu? Nuanuama ana alamania."

18 Ta Ieisu edi nuanua luveifana ni'a alamania, 'inega vonaya, "Omi'a tou'ava. Tola'ai weaqina sitonova omimiei 'iguya?

19 Ta mane taha emi 'ebetakesi weaqina ove'itegu." 'Inega mane nana ineia.

20 'Inega Ieisu vonedi vonaya, "Ovonegu, ba'e mane nana 'inaya, togama 'aye'ayewana ta ma'oda ana wawa?"

21 \* Ta ivonaya, "Toluvine qiduana Sisa." Tuata Ieisu vonedia, "'Inega Sisa ena yani Sisa ona nei 'eviviea, ta Yaubada ena yani wese Yaubada ona nei 'eviviea."

22 Ieisu ena vona inoqolia ta nuadi voqana, 'inega inogei ta itauya.

*To'aliga edi ya'itoto 'evivi*

*(Maki 12:18-27; Luke 20:27-40)*

23 \* 'Aubena nana 'inaya vaina Sadusiavo taudi ge ida vetumaqana to'aliga edi ya'itoto 'evivi weaqina, imai Ieisu 'inaya ta ivetala'aiea ivonaya,

24 \* "Kaiwabu, Mosese ena luvine vonaya,

---

\* 22:21: Lom 13:7      \* 22:23: Via 23:8      \* 22:24: Luve 25:5

“Eguma taha ’oloto ma moqanena itoatoa ta natu geqadi ta ’oloto nana yawaina nagumwala, ’inega luaqiaqiea be to’aliga nana wada’ena taina na’ebe’ewei ta maega ina vaqi, ’inega vavine ina venatuna ta natudiavo to’waiva nana luseanina.’

<sup>25</sup> “Inega ba’e wese ema velulu’uya una noqolia. Taha ’oloto ma tainavo adi yau seveni maega atoatoa, ta ’oloto nana vaqi ta yawaina gumwala ta natu geqana ’inega to’waiva nana ana gwavu’ifo wada’ena maega ivaqi.

<sup>26</sup> ’Inega tauna wese yawaina gumwala ta wese ge natunamo, ta ’idewani tainavo qabudi wada’e nana ivaqia.

<sup>27</sup> Ta ’abibodadiega vavine wese yawaina gumwala.

<sup>28</sup> Inega ya’itoto ’evivi ana ’aubena ’inaya seveni dina ’idiega to’oloto moqane otaqina, mana vavine nana ’oloto diavona vaqidi ta wada’eyedi?”

<sup>29</sup> Ta Iesu edi vetala’ai ba’e ve’evivia vonaya, “Omi’a Buki Nugwenugweina ta wese Yaubada ena waiwai ge oda alamania, ’inega emi vetala’ai ba’e ge aqiaqina.

<sup>30</sup> Mana ya’itoto ’evivi ana ’aubena ’inaya tomatu ge ina vaqi, ta vonahaqiaqi, edi toa nawale kavona Yaubada ena tovale’ewa qabudi mahalaya itoatoa ’idewani.

<sup>31</sup> Nage Yaubada ena vona Buki Nugwenugweina ’inaya ya’itoto ’evivi weaqina ge oda avoi, vonaya,

<sup>32</sup> \* ‘Ya’a Ebelamo ena Yaubada, be Aisake ena Yaubada ta wese Iakobo ena Yaubada.

---

\* **22:32:** ’Ifo 3:6; Md 8:11

Vonahaqiaqi, Yaubada ge to'aliga edi Yaubada,  
ta 'esi tomtau mayawaidi edi Yaubada.' ”

<sup>33</sup> Ieisu ena vona ba'e tomtau qabudi inoqolia 'inega nuadi voqana ena ve'ita waiwaina weaqina.

*Luvine qiduana weaqina*

*(Maki 12:28-34; Luke 10:25-28)*

<sup>34</sup> Ta Falisiavo inoqolia ma'oda Ieisu Sadusiavo edi vetala'ai 'inaya ni'a 'egibodedi ena ve'ia 'inega. E 'inega Falisiavo dina wese nuanuadi Ieisu ina vetala'aiea vaina yani weaqina 'inega imai 'inaya.

<sup>35</sup> Ta 'idiega taha luvine ana toalamani aqiaqi nuanuana vetala'aiega Ieisu nasitonovia, 'inega vonaya,

<sup>36</sup> “Tove'ita, luvine qabuna 'idiega ai luvine 'ena'i otaqina?”

<sup>37</sup> \* Ta Ieisu vonaya,  
“Eu Kaiwabu Yaubada una veyolubei giwaliuyega ta niboaniuyega ta wese eu nuanua qabuna 'idiega.

<sup>38</sup> Ba'e luvine nana luvine nugwenugweina, ta luvine qabudi veqidua va'inedi.

<sup>39</sup> \* “Ta taha wese luvine qiduana ba'e 'idewani vonaya,  
'Tomotau una veyolubedi 'idewani tau'uyega uveveylubeu.’

<sup>40</sup> \* Ba'e luvine magilafudina luvine qabudi ta wese tovesimasimana edi vona qabudi adi avutugu.”

---

\* **22:37:** Luve 6:5    \* **22:39:** Luvi 19:18; Md 7:12    \* **22:40:** Lom 13:10; Gal 5:14

*To'etoyavua tauna Deibida ena gadeyega  
(Maki 12:35-37; Luke 20:41-44)*

41 Falisiavo nawale itoatoa 'inega Ieisu vetala'aiedi vonaya,

42 \* “Ma'oda emi nuanua To'etoyavua Keliso weaqina? Tauna toga ena gadeyega 'ifoqe?”

Ta ivonaya, “Kini Deibida ena gadeyega.”

43 'Inega Ieisu vonaya, “Ma'oda 'inega lova Niboana Gwalagwalana ena venuaha'u 'inega Deibida To'etoyavua nana 'awa-Kaiwabuyea vonaya,

44 \* ‘Yaubada egu Kaiwabu 'inaya vonaya,

'Ataqiguya utoabui

ana laba voalamwavo ena a'uwebuiedi,  
'inega una luvinedi.’

45 Ta 'eguma Deibida Keliso 'awa-Kaiwabuyea, 'inega ma'oda ana fata be To'etoyavua Keliso Deibida ena gadeyega 'ifoqe?”

46 Ieisu ena vetala'ai ba'e ge taha toga ana fata dave'iei. Ta ba'e tuta nana 'inega ge taha toga datovoi be Ieisu davetala'aiei, mana ena alamani weaqina imwanivea.

## 23

*Ieisu luvine ana tove'itayavo be wese Falisiavo lumaqi'aiedi*

*(Maki 12:38-40; Luke 11:39-46,52; 20:45-47)*

1 'Inega Ieisu qabu ta wese ana to'abibodayavo vonedi vonaya,

---

\* 22:42: Ion 7:42      \* 22:44: Same 110:1; Md 26:64



2 “Lova Mosese me Isileli luviluvinedi, ta 'itaga luvine ana tove'itayavo ta wese Falisiavo 'idewanina iluviluvine 'aiqemi.

3 \* 'Inega tola'ai iveve'itemi ona 'abibodedi, ta edi viaqayavo ge ona 'abibodei, mana taudi iveve'itamo, ta edi ve'itayavo dina taudiega ge ida viaqidi.

4 Taudi 'ava'avala vitadi tomotau ineineidi, ta ge taha tola'ai ida viaqi be ina iuledi ta vita nana ina 'avalei.

5 \* “Ta Buki Nugwenugweina 'inega Yaubada ena vona i'waya'wayavidi ta taka goyogoyona gamonaya idodododi ta adi kiaya be wese nima-dia iyogoyoqonidi ta i'ava'avala dadanedi. Ta wese adi kaleko matavusina kuekuedi maega ive-veaqedi, mana nuanuadi tomotau ina 'itedi.

6 Ta sagali ana tutaya nuanuadi selovaya ina toabui, be wese vanue tafwalolo 'inaya nuanuadi 'ebetoa aqiaqina.

7 Ta wese 'eguma 'ebeginwane 'inaya itautauya nuanuadi vonigo tomotau qabudi ina lukaiwa 'idia ta wese ina 'awatove'itayedi.

8 Ta omi'a ge daluaqiaqiemi be tomotau ina 'awatove'itayemi, mana qabumi lelelea ta emi Tove'ita 'aidegana namo.

9 Ta ge taha toga bwa'obwa'oya ona 'awatamanei, mana Tamami ana 'aidega mahalaya toatoa.

10 Ta ge wese daluaqiaqiemi be tomotau ina 'awakaiwabuyemi, mana Keliso tauna ana 'aidega emi Kaiwabu otaqa.

\* 23:3: Mal 2:7-8

\* 23:5: Md 6:1; 'Ifo 13:9; Luve 6:8; Naba

15:38-39

11 \* Ta 'esi 'eguma toga 'imiega navetovanugweta, 'inega tauna navetofewa 'imia.

12 \* 'Eguma taha toga 'imiega nanuavane nawale nawebui, ta toga nanuawebui nawale navaneqa.

13 “Omi'a luvine ana tove'itayavo be wese Falisiavo nuakolokolomi, mana emi u'avayavo 'idiega tomotau oawatayedi be 'inega mahala ena 'Ebeluvine 'inaya ge ina lugu. Ta wese aiqabu nuanuadi be ina lugu o'etobodedi. 'Inega omi'a wese ge ami fata be ona lugu.

14 [Omi'a luvine ana tove'itayavo be wese Falisi nuakolokolomi. Omi'a tou'ava! Mana u'avega wadawada'e edi kulufayavo edi vanueavo 'idiega ovanawalidi, be wese ovevenoqi kuena mana nu-anuami tomotau ina awatubomi.]

15 “Omi'a luvine ana tove'itayavo be wese Falisiavo nuakolokolomi. Omi'a tou'ava! Tuta qabuna oluluyaba dadana 'abaga qabudi 'idia be vonigo ami to'abiboda taha ona lobe, be 'abiboda tomotau nana taumi emi nuenuaga ona ve'itea. Ta emi ve'ita luveifana 'inega nawale luvematasabu ona lobe, ta tomotau nana luvematasabu qidua va'inena nalobe.

16 \* “Vonahaqiaqi, nuakolokolomi! Mana omi'a tovanugweta matami kwayakwayana ovonaya, “Eguma taha toga Vanue Gwalagwalana ana wawega na'awatamatamana bena'e ge taha yani 'ena'ina, ta 'esi 'eguma taha toga Vanue Gwalagwalana ana goulda 'inega na'awatamatamana e ba'e yani agona.’

---

\* **23:11:** Md 20:26; Mk 9:35; Lk 22:26      \* **23:12:** Iob 22:29; Vos 29:23; Lk 14:11; 18:14      \* **23:16:** Md 15:14

17 Ta yavona aqiaqiemi, omi'a kwavakwavami ta matami kwayakwayana. Tola'ai tauna yani qiduana? Nage goula, nage Vanue Gwalagwalana, mana vanue nana ana fata be goula nagivegwalea?

18 "Ta wese ovonaya, 'Eguma taha toga 'ebeveguba ana wawega na'awatamatamana bena'e ge yani qiduana, ta 'esi 'eguma taha toga na'awatamatamana nei kavovo 'inega 'ebeveguba 'inaya e ba'e yani qiduana. 'Inega luaqiaqiea be tola'ai ni'a vona fofofolayea, e wese naviagi.'

19 Omi'a kwavakwavami! Tola'ai yani qiduana? Nage nei kavovo, nage 'ebeveguba nana tauna 'inega nei kavovo nana ana fata nagivegwalea?

20 'Inega 'eguma taha toga 'ebeveguba ana wawega na'awatamatamana e 'inega tauna wese yani qabuna i'eno'eno 'ebeveguba nana debanaya 'idiega 'awatamatamana.

21 Ta wese 'eguma taha toga Vanue Gwalagwalana ana wawega na'awatamatamana e tauna wese Yaubada 'inaya 'awatamatamana, mana Vanue Gwalagwalana Yaubada ena 'ebetoa.

22 \* Ta 'eguma taha toga mahala ana wawega na'awatamatamana, e 'inega tomotau nana Yaubada ana galiva 'inega 'awatamatamana, ta wese galiva nana ana Totoa 'inega 'awatamatamana.

23 \* "Omi'a luvine ana tove'itayavo wese Falisiavo nuakokolomi. Omi'a tou'ava, mana emi nei kavovo dina emi yani qabudi 'idiega, ta wese yani goyogoyodi 'idewani 'e'e be, wayove

---

\* 23:22: Ais 66:1; Md 5:34 \* 23:23: Luvi 27:30; Mai 6:8

ta wese dobala 'idiega. Ta luvine toi qiduadi ovenuafanidi, 'idewani ilivu tunutunuqina be, nuakolokolo be wese gwavubiga. Luaqiaqiemi be yani ba'e qiduadi ona viaqidi, ta wese yani goyona ge ona venuafanidi.

<sup>24</sup> Ta omi'a tovanugwetayavo matami kwayakwayana. Ami du'wa 'inega kwakwakwa o'ewa'ewa yavuledi, ta yubai qiduana 'idewana kameli otonetoned.

<sup>25</sup> \* "Omi'a luvine ana tove'itayavo wese Falisiavo nuakolokolomi! Omi'a tovemeahaqila! Mana ami vedi be ami gaeba gwavuna olu'utudi ta gamona bwavubwavudi. Ta ba'e bwavu nana ana alamani emi ilivu luveifadi kavonaya be vemanuguba be 'ailugu 'idewani.

<sup>26</sup> Omi'a Falisiavo matami kwayakwayana. Ami vedi be wese ami gaeba gamodi ona 'utu nugweted, 'inega gwavudi wese navevunavunaqa.

<sup>27</sup> \* "Omi'a luvine ana tove'itayavo wese Falisiavo nuakolokolomi! Omi'a tovemeahaqila, mana omi'a kavona deba'unu debana ana 'ita wadawadaeadi ta aqiaqidi, ta gamodia to'aliga davulidi ta luludi 'eno'eno.

<sup>28</sup> \* Ta omi'a wese 'idewanina, mana ami 'ita aqi-aqi otaqina tomotau matadia, ta giwalimia u'ava ta wese luveifana qabudi 'eno'eno.

*Isisu simana 'ifoqe adi luvematasabu weaqina  
(Luke 11:47-51)*

<sup>29</sup> "Omi'a luvine ana tove'itayavo be Falisiavo nuakolokolomi. Omi'a tovemeahaqila! Lova tubumiavo tovesimasimana nugwenugweidi

---

\* 23:25: Mk 7:4      \* 23:27: Via 23:3      \* 23:28: Lk 16:15

iluve'aligidi, ta omi'a adi gudumayavo 'idia 'ebenuave'avina oviaqidi. Ta wese Yaubada ena tomotau tunutunuqidi iluveawalidi, ta omi'a adi deba'unuyavo ove'ivalidi,

<sup>30</sup> ta 'inega ovonaya, "Eguma lova tubudavo edi tutaya kada toatoa, 'inega ge kada iuledi be Yaubada ena tovesimasimanayavo kada luve'aligidi.'

<sup>31</sup> \* Emi vona ba'e 'inega taumiega osimana 'ifoqeyemi vonigo omi'a tovesimasimanayavo adi toluve'aliga tubudiavo.

<sup>32</sup> 'Inega omi'a taudi edi fewayavo nawale ona lu'ovoia.

<sup>33</sup> \* "Omi'a mwata natunavo! Nage ovonaya be vonigo ami fata 'aiwe 'ala'alainega ona dena, waisa?

<sup>34</sup> 'Inega tovesimasimanayavo be toalamaniavo wese tove'itayavo ena vetunedi 'imia be 'inega vaidi ona luve'aligidi, ta vaidi 'etoluai 'inaya ona tutuve'ewedi be vaidi emi vanue tafwalolo 'inaya wayo metametanega ona vunuqa dadanedi, be 'abaga taha taha 'idia ona 'wavi dadanedi.

<sup>35</sup> \* Ta ba'e 'inega Yaubada ena tomotau tunutunuqidi adi luve'aliga ana ve'ia omi'a lagatamina nawale ona lobe'a 'oloto tunutunuqina Eibolo ana luve'aliga 'inega e ana laba Balakaya natuna tunutunuqina Sakalaia ana luve'aliga 'inaya. Tauna oluve'aligia Vanue Gwalagwalana be 'ebeveguba nuanidia.

<sup>36</sup> Vonahaqiaqi, ba'e luve'aliga diavona adi ve'ia omi'a ba'e lagatami ona lobe'a.

---

\* **23:31:** Via 7:52    \* **23:33:** Md 3:7; 12:34; Lk 3:7    \* **23:35:** Nug 4:8; 2Yani 24:20-21

*Iesu duvoyavoya me Ielusalema weaqidi  
(Luke 13:34-35)*

<sup>37</sup> “Me Ielusalema ye, me Ielusalema ye! Omi’a tovesimasimana oluve’aligidi, ta wese taudi Yaubada vetunedi imai ’imia oludabodi. Tuta qabuna nuanuagu omi’a ena gaba va’auqimi ona mai kavona kamukamu natunavo fafenega ’au’aubodedi, ta onogegu.

<sup>38</sup> \* Ta emi noga weaqina Yaubada emi Vanue Gwalagwalana nanogea be navetomotau geqa.

<sup>39</sup> \* Ta yavonemi, ge wese ona ’ita ’eviviegu ana laba ona vonaya, ‘Tauna kana awatuboya Yaubada ana wawega maimai.’ ”

## 24

*Iesu ena vona Vanue Gwalagwalana ana bwega yavula weaqina*

*(Maki 13:1-2; Luke 21:5-6)*

<sup>1</sup> Inega Iesu webui tautauya Vanue Gwalagwalana inega, ta ana to’abibodayavo imai be nu-anuadi ina ve’itea yani qabuna aqiaqina Vanue Gwalagwalana weaqina.

<sup>2</sup> \* Ta Iesu vonedia, “Ba’e yanidiavo o’ite’itedia nawale ina bwega ’ovoidi, be ge taha dabo ena ’ebetoa inaya ona ’ita ’eviviei.”

*Tuta vitana nawale na’ifoqe  
(Maki 13:3-13; Luke 21:7-19)*

---

\* **23:38:** 1Kin 9:7-8; Iel 22:5      \* **23:39:** Same 118:26      \* **24:2:** Lk 19:44

3 'Abibodanaya Ieisu bwanaga Olibe 'inaya toabui ta ana to'abibodayavo imai 'inaya ive-tala'aiea ivonaya, "Uvonema, totuta ba'e yani di-avona na'ifoqe, ta tola'ai nave'ebe'ita eu tuta 'evivi ta wese tuta ana 'ebeluo'ova weaqina?"

4 'Inega Ieisu vonaya, "Ona 'itamakimi, be yaqisa ge taha toga na'eu'au'avemi,

5\* mana nawale tomotau 'eala agu wawega ina mai ina vonaya, 'Ya'a Keliso To'etoyavua!' ta edi vona 'inega vaina qabu ina u'avedi.

6 Ta wese vale ona noqolidi avia di'wemia ta luluvaia weaqidi, ta ba'e yani diavona weaqidi giwalimi ge naha'ala, mana ba'e yani diavona ina madu'ifoqe, ta 'abiboda bwa'obwa'o ana 'ebeluo'ova.

7 Nawale mali qabu be mali qabu maega ina luavia, ta wese mali di'we be mali di'we maega ina luavia. Ta botana qiduana ta wese mwani'ini'i na'ifoqe di'we taha taha 'idia.

8 Ba'e yani diavona tuta vitadi ana 'ebeve'ale.

9 \* "Inega omi'a nawale tomotau ina vevoalanemi ta ina kafimi be ina luve'aligimi. Ta wese mali qabu ina veaviemi mana omi'a agu tovetumaqanayavo.

10 Tomotau 'eala 'imiega edi vetumaqana ina nogei, ta ma ediavo taudiega nuanidia ina vesulululedi. Ta wese vevoalana na'ifoqe nuanidia.

11\* Ta wese tovesimasimana 'e'eu'au'avididi 'eala ina 'ifoqe ta ina vanugweta veifemi.

12 'Inega ilivu luveifadi nave'ena'i, ta tomotau 'eala edi veyoluba navegoyo.

---

\* 24:5: Md 24:23-24; 1Ion 2:18      \* 24:9: Md 10:22      \* 24:11: Md 24:5,24; 1Ion 4:1

13 \* Ta 'eguma togama natovolo'i'ita ana laba tuta 'ebel'u'ovoa 'inaya e tauna 'etoyavua nalobea.

14 \* Ta Yaubada ena 'Ebeluvine valena ina simana dadanea di'we taha taha ana tomotauyavo 'idia, ta 'abiboda tuta ana 'ebel'u'ovoa na'ifoqe.”

*Tuta vitana ta 'ebegaululu weaqina  
(Maki 13:14-23; Luke 21:20-24)*

15 \* Ta wese Iaisu vonedi vonaya, “Tovesimasi-mana Daniela simanea taha yani bwavubwavuna ta wese 'edugaugaululuna Vanue Gwalagwalana 'inaya natovolo. (Ta tomeqabu vona ba'e ina avoya luaqiaqiedi be ana alamani ina sali aqi-aqiea.)

16 Omo'e tuta nana 'inaya Iudia ana tomotauyavo luaqiaqiedi be bwanagaya ina dena.

17 \* Ta 'eguma taha toga selovaya toatoa naluk-wayavoni nadena, ta ge nalugu 'evivi vanuea ena kulufa sabi 'ewana.

18 Ta wese toga ena vaoqaya fewafewa ge na'evivi vanuea ana kwakwalufai sabi 'ewana.

19 Tuta omo'e 'inaya vivine gamwegamwe'idi be tovesusuyavo nuakolokolodi.

20 Yaubada Tamada 'inaya ona venoqi yaqisa ge ona dena 'wei ana tutaya ta wese Sabate 'inaya.

21 \* “Vonahaqiaqi, omo'e tutana 'inaya vita qid-uana na'ifoqe, mana bwa'obwa'o ana 'ebeve'ale 'inega be ana laba tuta ba'e 'inaya ge taha wese vita ba'e 'idewana da'ifoqe, ta wese tuta maimai 'inaya vita ba'e 'idewana ge na'ifoqe 'evivi.

---

\* 24:13: Md 10:22 \* 24:14: Md 28:19 \* 24:15: Dan 9:27; 11:31;  
12:11 \* 24:17: Lk 17:31 \* 24:21: Dan 12:1



22 Omo'e vita nana 'eguma Yaubada ana tuta ge dagivekusei e nawale tomotau qabudi ida 'aliga. Ta Yaubada 'aubena dina nagivekusedi ena tomotau vevenua'ivinidi weaqidi.

23 \* Ta omo'e tutanaya 'eguma togama 'iuya navonaya, 'U'itei, ba'e tauna Keliso!' nage 'Omo'e tauna!' 'inega vona diavona ge una vetumaqanedi.

24 \* Mana vaina tomotau to'eu'au'ava ina vonaya 'Ya'a Keliso!' ta wese ina vonaya 'Ya'a tovesimasimana!' Nawale ina 'ifoqe ta ve'ita 'ebenuavoqana ina viaqidi. Ta vonigo 'eguma adi fata 'inega wese Yaubada ena tomotauyavo vevenua'ivinidi ina u'avedi.

25 Ta to'eu'au'ava diavona weaqidi ni'a yamaduvonemi, mana nawale ina 'ifoqe 'imia.

26 \* "Wese 'eguma tomotau ina vonemi, 'Keliso toatoa di'we tomotau geqanaya', 'inega ge ona tauya. Ta wese 'eguma ina vonemi, 'Keliso vanue gamonaya toatoa', e ge ona vetumaqanedi.

27 \* Ya'a Tomotau Natuna egu mai 'evivi ana 'ita kavona namala 'idewani na'waia ta mahala naguvesimatalia baba'au ena 'ebeyayaqega be ena 'ebewebui 'inaya.

28 \* "Yubai 'ali'aligina ena 'ebe'eno ni'a kahalamaniamana, mana omo'e 'inaya bwayobwayo ivava'auta.

*Jeisu ena 'evivi mai weaqina  
(Maki 13:24-27; Luke 21:25-28)*

---

\* 24:23: Md 24:5 \* 24:24: Luve 13:1-3; 2Te 2:8-9; Ve 13:13-14

\* 24:26: Lk 17:23-24 \* 24:27: Md 24:37-39 \* 24:28: Lk 17:37

29 \* ‘Tuta vitana nalu’ovoa ta lukwayavonega  
 baba’au navelovanea,  
 ta wai’ena ena simatala na’weu,  
 be ’wadi’wadima mahalega ina avuta,  
 ta wese yani qabuna waiwaidi mahalaya itoa-  
 toa ina dedela.’

30 \* “Ya’a Tomotau Natuna, omo’e tutana ’inaya  
 ’ebe’ita weaqigu mahalaya na’ifoqe, ta tomo-  
 tau qabudi bwa’obwa’oya ina nuavita ina dou.  
 Ta gawatega ena gelu ’inega tomotau ina ’itegu  
 egu waiwai ’inega be wese egu simatala aqiaqi  
 otaqina ’inega yamaimai.

31 \* Ta tuta nana bea nanunuqa ’inega egu  
 tovale’ewayavo ena vetunedi bwa’obwa’o ena  
 ’ebeve’ale ’inega be ena ’ebelu’ovoa ’inaya ta  
 wese mahalega egu tomotau vevenua’ivinidi ina  
 va’auqidi.

*’Ebevetalatutula mafa*

*(Maki 13:28-31; Luke 21:29-33)*

32 “Ebevetalatutula mafa ’inega ena ve’itemi.  
 Tuta nana mafa ’waena nave’ale sabi galu ’inega  
 ni’a oalamaniania ive ana tuta ni’au vadi’weda.

33 Ta wese ’idewani ’eguma ba’e ’ebe’ita diavona  
 ni’a yavonemia ona ’itedi, e ’inega ona alamaniania  
 egu ’evivi mai ana tuta ni’a vadi’wea.

34 \* Vonahaqiaqi lagata ba’e ge ona ’aliga ana  
 laba ba’e yani diavona ina ’ifoqe.

---

\* 24:29: Ais 13:10; 34:4; Isi 32:7; Ioe 2:10,31; 2Fit 3:10; Ve 6:12-13

\* 24:30: Sek 12:10; Ve 1:7; Dan 7:13 \* 24:31: 1Kol 15:52; 1Te 4:16

\* 24:34: Md 16:28

35 \* Mahala be bwa'obwa'o nahawala, ta ya'a egu vona ge taha ana tufwa nahawala ta 'esi na'eno vataya.

*Leisu ena mai 'evivi ana tuta ge taha toga dahalamaniamania*

*(Maki 13:32-37; Luke 17:26-30,34-36)*

36 \* “Ge taha toga dahalamaniamania totuta nage to'aubena 'inaya ena 'evivi ena mai, ta wese Yaubada ena tovale'ewayavo mahalaya ge ida alamaniamania, be wese ya'a Tomotau Natuna ge eda alamaniamania. Ta 'esi Tamagu ana 'aidega alamaniamania.

37 \* Ya'a Tomotau Natuna egu 'evivi ana tuta lova Noa ena tutaya 'idewani.

38 Mana Noa ena tutaya tomotau i'ai'ai be inumanuma ta wese 'oloto be vivine ivaqivaqi ta wese tomotau natudiavo ivevevaqiedi ana laba Noa ena wagaya gelu.

39 \* Ta seuseu luveafedi 'inega tomotau qabudi idamana, e ya'a Tomotau Natuna egu mai 'evivi wese 'idewani na'ifoqe.

40 “Tuta nana 'inaya 'eguma 'oloto magilafudi edi bwa'o ina talatalaqa 'inega taha 'idiega ena 'ebe'ewea ta taha natao.

41 Ta wese vivine magilafudi 'abwaga ina dabidabi 'inega taha 'idiega ena 'ebe'ewea ta taha natao.

42 \* 'Inega ona 'itamaki aqiaqiemi mana ya'a emi Kaiwabu egu 'evivi mai ana tuta ge oda alamaniamania.

43 \* Ona nuave'avinia, 'eguma tonivanue nahalamaniamania totuta tovanawala nalugu ena vanuea, e

\* 24:35: Md 5:18 \* 24:36: Via 1:7; 1Te 5:1-2 \* 24:37: Nug 6:5-8

\* 24:39: Nug 7:21-23 \* 24:42: Md 25:13 \* 24:43: Lk 12:39-40;

Ve 16:15

vonahaqiaqi me ena 'iva'ava'ata natoatoa, 'inega tovanawala nana ge ana fata ena vanue naqeuni ta nalugu.

<sup>44</sup> 'Inega omi'a wese 'idewani me emi 'iva'ava'ata ona toatoa, mana tuta nana 'inaya tomotau ina vonaya, 'Ge wese namai!' e 'inega ya'a Tomotau Natuna ena luveafedi ena 'ifoqe.

*Tofewa ena gwavubiga ta ena gwavu'ai weaqina (Luke 12:41-48)*

<sup>45</sup> "Eguma taha tofewa ma ana vetumaqana ta me ena alamani toatoa, 'inega tauna ena kaiwabu navenua'ivinea be enavo na'itamakidi ta wese adi 'abwaga naneidi 'aubena 'aidega 'aidega 'idia.

<sup>46</sup> Ta tuta nana ena kaiwabu na'evivi namai 'inega tofewa nana ana veyoveyoea na'itea viavi-aqa aqiaqiea, e 'inega weaqina naqaiawa.

<sup>47</sup> \* Yavona aqiaqiemi, ba'e kaiwabu nana ena kulufa be wese ena kaikaiwabu qabudi ena tofewa nimanaya naha'udi be na'itamakidi.

<sup>48</sup> "Ta 'eguma tofewa nana naveilivu veifa ta navonaya, 'Egu kaiwabu tauya ta nawale gi-give'ove'o',

<sup>49</sup> 'inega ve'ale enavo vunuuqidi, ta tovekwavak-wava 'ebe'ewedi imai ta maega i'ai'ai ta wese inumanuma.

<sup>50</sup> Ta tuta nana ena kaiwabu na'evivi namai 'inega naluveafea ta ena ilivu veifana na'itedi.

<sup>51</sup> 'Inega navunuqia be na'wavinia na'ifoqe tou'ava edi di'we 'inaya, ta omo'e 'inaya tou'ava dina maega adi luvematasabu 'aidegana ina lobe, 'inega tauna nadou be alana navetalakikoko."

---

\* **24:47:** Md 25:21,23

## 25

### *Vona sesebai iahaba teni weaqidi*

<sup>1</sup> \* Ta Ieisu wese vonedi vonaya, “Mahala ena ’Ebeluvine ba’e ’idewana: Iahaba adi yau teni edi lamufa i’ewedi itauya tovaqi me’olotona ena vaqi ’abwagana weaqina sabi ’itana.

<sup>2</sup> ’Idiega adi yau faibi kwavakwavadi ta wese faibi me edi alamani.

<sup>3</sup> Tovekwavakwava dina edi lamufa gebu ana go’ila ana luvetomana ida ’ewei.

<sup>4</sup> Ta toalamani dina edi go’ila ma botolina i’ewedi edi lamufa ana luvetomana weaqidi.

<sup>5</sup> Ta tovaqi me’olotona i’ive’ove’o, ’inega iahaba teni dina matadi dunedune ’abo i’eno motaiva.

<sup>6</sup> “Inega tou gamonaya taha tomotau gaba vonaya, ‘Ei qabumi oya’itoto, tovaqi nana ni’a maimai ’inega ka’itei ka’ebe’ewei!’

<sup>7</sup> Inega iahaba diavona iya’itoto edi lamufa sabi giaqiaqiedi.

<sup>8</sup> “Ta kwavakwava dina ediavo ivenoqiedi ivonaya, ‘Emavo, lamufa ana go’ila dibuna oda neima mana ema simatala mo’ita na’weu.’

<sup>9</sup> “Ta toalamani dina ivona ’eviviedi ivonaya, “Eguma ema go’ila dibuna ana neimi e ’inega ima’a ana kusa, ’inega ona tauya tovegimwaneavo ’idia be emi go’ila ona gimwane.’

<sup>10</sup> Ta tuta nana itautauya sabi gimwane, ’inega tovaqi nana ’ifoqe ta taudi ni’au i’iva’ava’ata maega ilugu vaqi ’abwagana weaqina. Ta ’awa iguduya.

---

\* 25:1: Ve 19:7; Lk 12:35

11 \* “Ta ’abiboda iahaba kwavakwava dina i’evivi imai ivonaya, ‘Kaiwabu, ’awa usiwa’ei ta ana lugu wai.’

12 \* “Inega tovaqi nana edi vona ve’evivia von-aya, ‘Yavona aqiaqiemi, ya’a ge eda alamanimi.’ ”

13 \* Ieisu ena vona lu’ovoia ’inega ana to’abibodayavo vonedi vonaya, “Ona ’itamaki aqiaqiemi, mana egu ’evivi ana ’aubena be ana tuta ge oda alamania.

*Vona sesebai tofewa toidi weaqidi*  
(*Luke 19:11-27*)

14 “Mahala ena ’Ebeluvine wese ba’e ’idewani. Taha kaiwabu nuanuana natauya mali di’wea, ’inega ena tofewayavo gaba va’auqidi imai ta vonedi ena ’ebeluvine ina ’itamakia.

15 \* ’Inega ena tofewa mane ma kodekodena adi yau faibi neia, ta wese tofewa taha mane ma kodekodena magilafuna neia, ta wese tofewa ve-toina mane ma kodekodena ’aigedana neia, mana toi dina edi waiwai ta wese edi alamani ana fata ’inega neidi, e ’abiboda kaiwabu nana nogedi ta tauya.

16 “Inega tofewa nana mane ma kodekodena ana yau faibi lukwayavonega vefewedi, ta adi luvetomana wese mane ma kodekodena ana yau faibi lobedi.

17 Ta tofewa vemagilafuna wese ’idewani mane ma kodekodena magilafuna vefewedi, ’inega ana luvetomana kodekode magilafuna wese lobedi.

---

\* 25:11: Lk 13:25-27      \* 25:12: Md 7:23      \* 25:13: Md 24:42

\* 25:15: Lom 12:6

18 Ta tofewa vetoina mane ma kodekodena 'aidegana 'eweaya, e tauna bwa'obwa'o alei ta ena kaiwabu ena mane ivuya gamonaya.

19 "Ta edi kaiwabu tufwana tuta kuena di'we nana 'inaya toatoa, ta 'inega 'evivi mai. 'Inega ena tofewayavo wese gaba va'auqidi mana nuanuana nahalamaniana ma'oda ena mane ivefewa 'aiqedi.

20 'Inega tofewa nana mane ma kodekodena ana yau faibi mai be ana luvetomana mane ma kodekodena ana yau faibi wese miedi ta vonaya, 'Kaiwabu, o'a mane ma kodekodena ana yau faibi uneigu, ta ya'a yavefewea 'inega wese mane ma kodekodena faibi adi luvetomana yalobea, e 'inega eu mane ma kodekodena teni ba'e.'

21 \* "Ta kaiwabu nana vonaya, 'Aqiaqina, o'a tofewa aqiaqiu ta ma au vetumaqana, mana o'a uvetafewa yani goyona 'idiega, e 'inega yani agodi ena neiu ta una luvinedi be una 'itamakidi. Ba'e 'inega una lugu mahalaya ta kana qaiawa vataya.'

22 "'Inega tofewa nana lova mane ma kodekodena magilafuna 'ewedi lugu mai ena kaiwabu 'inaya, ta vonaya, 'Kaiwabu, lova mane ma kodekodena magilafuna uneigu, ta mane nana yavefewea, 'inega wese mane ma kodekodena adi yau magilafuna adi luvetomana yalobea, e 'inega eu mane ma kodekodena foa ba'e.'

23 "'Inega kaiwabu nana vonaya, 'Aqiaqina, o'a tofewa aqiaqiu ta ma au vetumaqana, mana ni'au uvetafewa yani goyona 'idiega, e 'inega yani agodi ena neiu ta una luvinedi be una 'itamakidi. Ba'e 'inega una lugu mahalaya ta kana qaiawa vataya.'

---

\* 25:21: Md 24:45-47; Lk 16:10

24 “Inega tofewa vetoina ena mane ma kodekodena 'aidegina lugu mai ta vonaya, 'Kaiwabu, ya-halamanina o'a lumaqimaqi'ai 'avau, ta eu kaikaiwabu u'ewa'ewa kavovodi mali tomotau edi fewa 'idiega.

25 'Inega yamwaniniveu ta yatauya eu mane ma kodekodena 'aidegina bwa'obwa'o gamonaya yaivuya, e eu mane ba'e.'

26 “Ta ena kaiwabu lugwaeyea vonaya, 'Tofewa luveifau ta gwavu'ai otaqiu, ualamanigu vonigo egu kaikaiwabu ya'ewe'ewea mali tomotau edi fewa 'inega.

27 Ta 'esi luaqiaqieu 'eguma mane nana uda a'uya mane ana vanue 'inaya, be 'inega 'itagana ma ana luvetomana eda lobe, ta gebu.'

28 “Inega ena tofewayavo vaina 'idia vonaya, 'Ba'e 'olotona 'inega mane ma kodekodena 'aidegina ona 'ewei be ona neia tauna 'oloto nana mane ma kodekodena teni 'inaya.'

29 \* “Yavona aqiaqiemi, tomeqabu tola'ai ni'a i'ewea ta ivefewa aqiaqiea, e taudi nawale adi luvetomana wese ina lobe, 'inega naveago va'ine. Ta tomeqabu ge ma adi vetumaqana toyani goyona 'idia 'eno'eno nawale na'waiva 'idiega.

30 \* 'Inega kaiwabu nana ena tofewayavo vonedi tofewa luveifana ina fela 'ifoqeyea di'we velovelovanina 'inaya. Ta omo'e 'inaya nadou ta alana navetalakikokiko.

*Isisu totoa bwa'obwa'o qabudi nawale nagivutuqidi*

---

\* 25:29: Md 13:12; Mk 4:25; Lk 8:18      \* 25:30: Md 8:12; Lk 13:28



31 \* “Ya’a Tomotau Natuna nawale egu simatala aqiaqi otaqina ’inega egu tovale’ewayavo maega ana mai, be ’inega agu galiva kaikaiwabuna ’inaya ena toabui sabi givutuqa.

32 \* Be tomotau bwa’obwa’oya ina va’auqidi ina mai mataguya be ena a’uvidividinidi ’idewani sifi adi to’itamaki a’uvidividinidi goti ’idiega.

33 Be tomotau tunutunuqidi ena givutuqidi agu ’ataqia ta veiveifadi agu kelia.

34 “Inega ya’a Kini luaqiaqiegu taudi agu ’ataqia itoatoa ena vonedia, ‘Omi’a Tamagu ena vey-oluba ’ayanaya otoatoa ona qaiawa. Omai, ta ena ’Ebeluvine ona ’ewea. Ba’e ’Ebeluvine nana lova kuyavata qabudi adi ’iva’ava’ata ’unu ’inega Yaubada ’iva’ava’aia weaqimi.

35 \* Mana lova ’ai weaqina yabotana ta ove’ainigu, wese magagu luayahaya ta ovenumegu, ta wese ge oda alamanigu, ta tua o’ebe’ewegu yamai emi vanuea.

36 Ta wese ge agu kalekomo ta ovekalekogu, be wese yavevihiqa ta o’itamakigu, ta wese vanue ’ebeyoqona ’inaya yatoatoa ta ovayausigu.’

37 “Inega tunutunuqi dina ’iguya ina vonaya, ’Kaiwabu, totutaya a’iteu ma botaniu ta ave’ainiu, ta wese totutaya magau luayahaya ta go’ila aneiu?

38 Totutaya avemwageyeu ema ’abagaya ta tua agabeu umai vanuea? Totutaya a’iteu ge au kalekomo ta avekalekou?

39 Ta totutaya ma au vihiqa a’iteu? Ta wese totutaya vanue ’ebeyoqona ’inaya utoatoa ta avayausiu?’

---

\* 25:31: Md 16:27; 19:28

\* 25:32: Isi 34:17; Ve 20:11-13

\* 25:35: Ais 58:7

40 \* “Inega ena vonedi, ‘Vonahaqiaqi, ’eguma tomotau kavokavovo ni’a oiuledi, e ’inega ya’a wese ni’au oiulegu.’

41 \* “Ta taudi agu kelia itoatoa ena vonedia, ‘Onogegu! Omi’a tawa Yaubada vona ve’alatemu be vematasabu qiduana ona lobe, ’inega ona tauya ’aiwe ’ala’alata vataya ’inaya. Omo’e di’we nana lova Yaubada ni’a ’iva’ava’ata vatayea Seitani me ena tofewayavo weaqidi.

42 Mana lova yabotana ta gebu oda ve’ainigu, ta wese magagu luayahaya ta go’ila ge oda neigu.

43 Ta lova yavewagawaga yamai emi ’abagaya ta ge oda ’ebe’ewegu emi vanuea, be o’itegu ge agu kalekomo ta ge oda vekalekogu, ta wese yavevihuqa be vanue ’ebeyoqona ’inaya yatoatoa ta ge oda vayahaya.’

44 “Inega taudi egu vona ba’e ina ve’iei ina vonaya, ‘Kaiwabu, totuta a’iteu ma botaniu nage magau luayahaya? Ta totutaya uvewagawaga umai ema ’abagaya? Totutaya a’iteu ge au kalekomo? Ta totutaya uvevihuqa? Ta wese totutaya vanue ’ebeyoqona ’inaya utoatoa ta gebu ada iuleu?’

45 “Inega ena vonedi, ‘Yavona aqiaqiemi, lova tuta nana tomotau ge adi wawa ’ena’ina ba’e vita diavona ilobedi ta omi’a ge oda iuledi, ’inega wese ya’a ge oda iulegu.’

46 \* ’Inega todewa kavokavovo edi ilivu veifana weaqina ina tauya visiqa vataya ’inaya, ta ’esi taudi tunutunuqidi yawai vataya ina lobe.”

\* 25:40: Vos 19:17; Md 10:42; Mk 9:41

\* 25:41: Md 7:23

\* 25:46: Dan 12:2; Ion 5:29

## 26

### *Tolvineavo nuanuadi Iesu ina luve'aligia (Maki 14:1-2; Luke 22:1-2; Ioni 11:45-53)*

<sup>1</sup> Tuta nana Iesu ana to'abibodayavo yani qabuna tuta ena 'ebelu'ovoa weaqina ve'itedi gumwala 'inega vonedi vonaya,

<sup>2</sup> \* “Ni'a oalamaniana 'aubena magilafuna nagumwala 'inega 'Auvivia Sagalina nave'ale, be 'inega agu tosuluva naneiegu agu aviayavo 'idia, be 'etoluai 'inaya ya'a Tomotau Natuna ina tutuve'ewegu.”

<sup>3</sup> Ta ba'e tuta nana 'inaya toveguba qiduquadi be 'abaga ana tovanugwetayavo iva'auta toveguba edi tovanugweta Kaiafa ena vanuea.

<sup>4</sup> 'Inega adi 'aidega idima govaqa ma'oda 'waivega Iesu ina kafi 'aipei 'abo ina luve'aligia.

<sup>5</sup> Ta ivonaya, “Ge 'Auvivia Sagalina ana tuta 'inaya Iesu kana kafia, mana 'eguma 'idewani nawale tomotau diadi navilea ta ina manini 'idaya.”

### *Vavine taha Iesu dede'wega iwaqia 'abaga Bedani 'inaya*

*(Maki 14:3-9; Luke 22:3-6)*

<sup>6</sup> Iesu Bedani 'inaya toatoa Saimoni ena vanuea, tauna lova to'wagota taha.

<sup>7</sup> \* Ta 'ai ana tuta 'inaya taha vavine me ena dede'wa mai lugu vanuea, ta dede'wa nana ana maisa qiduana ma botolina viaviaqina alabasita 'inega. Ta vavine nana ba'e dede'wa nana iwaqia Iesu debanaya.

---

\* **26:2:** 'Ifo 12:1-27; Md 20:18      \* **26:7:** Lk 7:37-38

8 Ta tuta nana Ieisu ana to'abibodayavo vavine nana ena viaqa Ieisu 'inaya i'itea 'inega ilugwaeyea ivonaya, "Tola'ai weaqina dede'wa uiwaqa kavovoi mana ana maisa gegoyo?"

9 Luaqiaqiea be dede'wa nana davegimwaneyea be ana ve'ia agona da'ewea be davewila'ayea lukwalukwa 'idia."

10 Ieisu edi nuanua ni'a alamania ta vonaya, "Gebu vavine ona lugwaeyei mana ba'e yani aqi-aqi otaqina 'iguya viaqia.

11 \* Lukwalukwa dina tuta qabuna maega otoa-toa, ta ya'a ge tuta kuena omi'a maega kana toatoa.

12 Tuta nana vavine ba'e 'wafigu dede'wega iwaqia, 'inega 'iva'ava'aigu agu tavuna weaqina.

13 Yavona aqiaqiemi, ma'inaya Valegu ina lugaihi dadanea di'we taha taha bwa'obwa'o debanaya, e omo'e 'inaya wese vavine ba'e ena viaqa 'iguya ina velulu'uyayea 'inega tomotau ina nuave'avinia."

*Iudasa nuanuana Ieisu nasuluvea*  
(Maki 14:10-11; Luke 22:3-6)

14 Ieisu ena vona ba'e lu'ovoia 'inega Tuwelo dina 'idiega taha ana wawa Iudasa Isakaliota tauya toveguba qiduquduadi 'idia,

15 \* 'inega vonedi vonaya, "Evisa ve'ia ona neigu 'eguma Ieisu ena ve'ineiea 'imia?" 'Inega mane siliba ana yau 30 ineia.

16 E tuta ba'e 'inega Iudasa tuta aqiaqina vewa'ia be 'inega Ieisu nasuluvea 'idia 'abo ina kafia.

---

\* 26:11: Luve 15:11      \* 26:15: Sek 11:12; Ion 11:57

*Ieisu ma enavo 'Auvivia Sagalina ana 'abwaga i'ainia*

*(Maki 14:12-21; Luke 22:7-13,21-23; Ioni 13:21-30)*

<sup>17</sup> \* Beledi ge ana isitimo Sagalina ana 'aubena nugweta 'inaya Ieisu ana to'abibodayavo imai ivetala'aiea ivonaya, "Kaiwabu, ma'inaya nuanuau 'Auvivia Sagalina 'abwagana ana 'iva'ava'aia weaqiu?"

<sup>18</sup> 'Inega Ieisu vonaya, "Ona tauya Ielusalema 'inaya, ta taha 'oloto ona 'ita 'inanea ta ona vonea. Ema tove'ita ena vona ba'e 'idewani: Egu tuta ni'a mai ta nuanuagu 'Auvivia Sagalina ana 'abwaga ma agu to'abibodayavo eu vanuea ana 'ai."

<sup>19</sup> E to'abiboda dina Ieisu ena vona imatayagea, 'inega 'oloto nana ena vanuea 'Auvivia Sagalina ana 'abwaga i'iva'ava'aia.

<sup>20</sup> 'Inega lavilavi otaqaya Ieisu Tuwelo dina maega ilugu, 'abo 'abwaga nana i'ai.

<sup>21</sup> Ta tuta nana i'ai'ai 'inega Ieisu vonaya, "Egwavo, yavona aqiaqi 'imia, nawale taha 'imiega nasuluvegu."

<sup>22</sup> Ieisu ena vona ba'e weaqina nuadi vita aqi-aqi, 'inega 'aidega 'aidega Ieisu ivetala'aiea ivonaya, "Kaiwabu, togama, nage ya'a?"

<sup>23</sup> \* Ta Ieisu vonedia, "Oloto nana tauna maega gaeba ma du'wana gamonaya ama beledi a'au'aubwa'uya ta a'ai'ai, e tauna nawale nasuluvegu.

<sup>24</sup> Ya'a Tomotau Natuna nawale 'aliga ana 'edega ena tauya 'idewani lova Buki

---

\* 26:17: 'Ifo 12:14-20      \* 26:23: Same 41:9

Nugwenugweina 'inaya maduvonayea, ta tauna agu tosuluva nana nuakokololona, ta 'esi luaqiaqiea 'eguma lova inana ge ida venatunei."

<sup>25</sup> 'Inega ana tosuluva, Iudasa vonaya, "Kaiwabu, to'oloto, nage ya'a?"

'Inega Ieisu voneaya, "Ni'a tau'uyega usimanayeu."

*Kaiwabu ena 'ai 'ebenuave'avina*

*(Maki 14:22-26; Luke 22:14-20; 1 Kolinita 11:23-25)*

<sup>26</sup> Nawale i'ai'ai 'inega Ieisu beledi 'ewei ta vona veyolubea 'inega gitomwea 'abo ana to'abibodayavo neidi, vonedia, "Ba'e 'wafigu, ta ona 'ewei ona 'ai."

<sup>27</sup> 'Abiboda 'oine ma vedina wese 'ewei 'inega lukaiwa Yaubada 'inaya 'abo neidi ta vonaya, "Qabumi ona numea,

<sup>28</sup> \* ba'e sulaligu inoinoqa luvine vauvauna weaqina, ta sulala nana tomtau qabumi emi luvifana ana nuataqo weaqina.

<sup>29</sup> Ta yavonemi, ge wese 'oine ena numa 'eviviei ana laba omi'a maega 'oine vauvauna kana numea Tamagu ena 'Ebeluvine 'inaya."

<sup>30</sup> \* 'Ai gumwala 'inega 'evosi taha i'evosiea 'abo i'ifoqe ta i'watovu bwanaga Olibe 'inaya.

*Ieisu madusimanea Fita ena vegeqa weaqina*

*(Maki 14:27-31; Luke 22:31-34; Ioni 13:36-38)*

<sup>31</sup> \* Ta Ieisu vonedi vonaya, "Ba'e velovana nana 'inaya qabumi ona dena ta ona nogegu 'idewana Buki Nugwenugweina ena vona vonaya,

---

\* **26:28:** Sek 9:11; 'Ifo 24:8; Iel 31:31-34; 1Kol 10:16      \* **26:30:** Lk 22:39; Ion 18:1      \* **26:31:** Sek 13:7; Ion 16:32

'To'itamaki sifi ena luve'aligia  
be sifi qabudi ina yavula dadana.'

<sup>32</sup> \* "Ta egu ya'itoto 'evivi 'aligega 'abibodanaya ena nugweta ena tauya Galili 'inaya, ta omi'a ona 'abibodegu ona wai."

<sup>33</sup> 'Inega Fita vona 'evivi vonaya, "Eguma nawale qabudi ina dena 'iuyega, ya'a agu 'aidega ena toa."

<sup>34</sup> \* 'Inega Iesu Fita vonea vonaya, "Yavona aqi-aqieu, velovana ba'e 'inaya nawale una vegeqegu ana yau toi, ta 'abiboda kamukamu nadou."

<sup>35</sup> Ta Fita vonaya, "Kaiwabu, ge ena vegeqeu! 'Eguma ina luve'aligiya ya'a wese maega ina luve'aligigu." Ta to'abibodayavo qabudi edi vona wese 'idewani.

*Gedesemani 'inaya Iesu noqinoqi Tamana 'inaya*

*(Maki 14:32-42; Luke 22:39-46)*

<sup>36</sup> 'Inega Iesu ma ana to'abibodayavo itauya di'we taha ana wawa Gedesemani 'inaya, ta vonedi vonaya, "Ba'idia ona toatoa, ta ya'a yatautauya ena venoqi Yaubada 'inaya."

<sup>37</sup> 'Inega Iesu Fita ta wese Sebedi natunavo magilafudi 'ebe'ewedi itauya tufinaya. 'Inega Iesu me ena giwali visiqqa ta me ena nuavita vonedi vonaya,

<sup>38</sup> \* "Giwaligu visivisiqqa qiduana, ta agu lutionova luveifa otaqa, 'inega ba'idia ona toatoa ta ge matami nadune."

---

\* **26:32:** Md 28:7,16    \* **26:34:** Md 26:69-75    \* **26:38:** Ion 12:27

<sup>39</sup> 'Inega Ieisu vanaqo ta givelukabwebwe venoqi vonaya, "Tamagu ye, 'eguma ana fata visiqa vedina ba'e 'iguyega una 'ewa yavulea, ta gebu ya'a egu nuanua ta 'esi o'a eu nuanua 'idewana ena viaqia."

<sup>40</sup> 'Inega 'evivi ana to'abibodayavo toidi 'idia ta 'itedi i'eno motaiva, ta Ieisu Fita divanoya, vonaya, "Tola'ai weaqina o'eno'eno! Ma'oda, nage ge ami fata be tuta kukusana namo oda vevekova ta oda ba'eba'eyegu, waisa?"

<sup>41</sup> Ta wese vonedi vonaya, "Luaqiaqiemi be matami ge nadune ta 'esi ona vevenoqi be 'inega Seitani ge nasitonovimi. Vonahaqiaqi, niboanimi nuanuana, ta 'wafimi dawalili."

<sup>42</sup> 'Inega Ieisu tuta vemagilafuna naqo 'evivi sabi venoqi vonaya, "Tamagu, vonahaqiaqi 'eguma ge taha wese 'eda da'eno'eno tomotau adi 'etoyavua weaqina, 'inega ba'e visiqa vedinega ena numa be yaqisa eu nuanua ena viaqia."

<sup>43</sup> Ta Ieisu wese 'evivi ana to'abibodayavo 'idia 'inega lobedi i'eno motaiva, mana matadi tawa dunedune.

<sup>44</sup> 'Inega tuta vetoina wese 'evivi sabi venoqi, ta tawadega ma'oda venoqi 'aiqa wese lu'eviviea 'idewani.

<sup>45</sup> Ta wese 'evivi ana to'abibodayavo divanodi vonaya, "Ma'oda, nage nawale o'eno'eno ta oveveyawai, waisa? O'itei, ya'a Tomotau Natuna egu tuta tawa 'ifoqe be ina ve'ineiegu tomotau luveifadi 'idia.

<sup>46</sup> \* Oya'itoto katauya, mana agu tosoluva maimai."

---

\* 26:46: Ion 14:31



*Ieisu ikafia**(Maki 14:43-50; Luke 22:47-53; Ioni 18:3-12)*

<sup>47</sup> Ta Ieisu nawale vonavona, 'inega taha 'oloto Tuwelo dina 'idiega tauna Iudasa qabu qiduana maega i'ifoqe. Ta ba'e qabu diavona toveguba qiduqiduadi be wese 'abaga ana tovanugwetayavo edi luvine 'inega ivetunedi imai Ieisu ana kafi weaqina me edi kefata be wese me edi gita.

<sup>48</sup> Ta Iudasa toluavia ni'a vonedia, "Tomotau nana nawale ena talafafea e tauna Ieisu, 'inega ona kafia."

<sup>49</sup> 'Inega tauya tunutunuqina Ieisu 'inaya vonaya, "Kaiwabu, kaiwa!" 'inega talafafea.

<sup>50</sup> Ta Ieisu vonaya, "Iagu, tola'ai nuanuau una viaqia ase uviaqa kwayavoni." 'Inega toluavia imai Ieisu 'inaya 'abo ikafia.

<sup>51</sup> \* 'Inega taha 'oloto Ieisu ena qabu 'inega ena kefata siwaia ta toveguba edi tovanugweta ena tofewa teniqana 'ilaufea.

<sup>52</sup> \* Ta Ieisu 'oloto nana vonea, "Ta'iwa! Eu kefata una a'u'eviviea ana umaya, mana toluaviayavo taudi luaviayega i'ali'aliga.

<sup>53</sup> Ona alamanian vonigo 'eguma nuanuagu Tamagu 'inega ena noqi iula weaqina, e nawale ena tovale'ewa qabu ago va'inedi navetunedi 'iguya.

<sup>54</sup> Ta gebu, mana 'eguma 'idewanina 'inega ma'oda Buki Nugwenugweina ena simana weaqigu ana aqiaqi na'ifoqe 'aiqa?"

<sup>55</sup> \* 'Inega Ieisu ana tokafi qabudi vonedi vonaya, "Nage ya'a kavona tovanawala taha, 'inegana me emi kefata be wese me emi gita omai sabi

\* 26:51: Ion 18:26

\* 26:52: Nug 9:6; Ve 13:10

\* 26:55: Lk

19:47; 21:37

vunuqigu? Lova 'aubena qabuna 'idia Vanue Gwalagwalana 'inaya yatoatoa ta yaveve'ita to-motau 'idia, ta tola'ai weaqina ge oda kafigu tuta diavona 'idia?

<sup>56</sup> Ta ba'e yani diavona i'ifoqe be 'inega tovesi-masimanayavo edi simana Buki Nugwenugweina gamonaya ana vonahaqiaqi na'ifoqe."

'Inega ana to'abibodayavo qabudi Ieisu inogei ta idena.

*Ieisu tovolu me Diu edi kaniselayavo 'iawadia  
(Maki 14:53-65; Luke 22:54-55,63-71; Ioni 18:13-14,19-24)*

<sup>57</sup> Qabu diavona Ieisu ni'au ikafia ta imiea toveguba edi tovanugweta ana wawa Kaiafa 'inaya, ta wese luvine ana tove'itayavo be 'abaga ana tovanugwetayavo ni'a iva'auta ena 'abagaya.

<sup>58</sup> Fita tufwana luluvaiega Ieisu tala'obeia ta mai toveguba edi tovanugweta ena 'abagaya, 'inega lugu ta toabui Vanue Gwalagwalana ana to'itamakiavo maega 'ebekotu di'wenaya be vonigo Ieisu ana luvine nanoqolia.

<sup>59</sup> Taudi toveguba qiduduadi ta wese kanise-layavo nuanuadi Ieisu ana tove'ewayavo ina lobedi be edi 'eu'au'ava 'inega Ieisu ina luve'aligia.

<sup>60</sup> 'Inega tomotau 'eala imai, ta edi u'ava 'inega toluvineavo ge adi fata be Ieisu ina luvinei mana u'ava dina ivego'ila.

Ta 'abiboda 'oloto magilafudi imai itovolo,

<sup>61</sup> \* ta ivonaya, "Ieisu lova vonaya, 'Agu fata be Yaubada ena Vanue Gwalagwalana ena qeu yavulea, be 'aubena toi 'idia ena yoqona 'eviviea.'"

---

\* **26:61:** Ion 2:19-21

62 'Inega toveguba edi tovanugweta agona to-  
volo ta vonaya, "Tomotau omo'e edi ve'ewa 'iuya  
ni'au unoqolia, waisa? 'Inega 'evisa eu ve'ia?"

63 \* Ta Ieisu ge taha vona da'inanei.

'Inega toveguba nana wese Ieisu vonea vonaya,  
"Uvonahaqiaqi Yaubada mayawaina matanaya,  
nage o'a To'etoyavua ta Yaubada Natuna, nage  
gebu?"

64 \* 'Inega Ieisu vonea, "Ni'au bena'e uvona,  
ta wese yavonemi vonigo ya'a Tomotau Natuna  
nawale ona 'itegu Tovewaiwai otaqa ana 'ataqia  
ena toatoa be wese mahalega waumana debanega  
ena mai."

65 \* 'Inega toveguba edi tovanugweta diana vila  
veiveifea e taunega ana kaleko kuena abuya ta  
vonaya, "Ena vona veifana ni'a onoqolia. Von-  
ahaqiaqi, 'oloto ba'e ena vona 'inega taunega  
givaneyea kavona tauna Yaubada. Ta'iwa, ge  
taha wese tove'ewayavo ina vonavona ena lu-  
veifanayavo weaqidi.

66 \* Ma'oda emi nuanua Ieisu weaqina?"

Ta taudi ivonaya, "Luaqiaqiea be na'aliga, mana  
me ena luveifana!"

67 \* 'Inega 'iawana igida'wea ta ivunuqa  
dadanea nimadiega, ta wese vaina i'au'ae'aea,

68 ta ivonavonaya, "Eguma o'a vonahaqiaqi  
To'etoyavua 'inega usimana 'ifoqe 'imaya togama  
vunuvunuqiu."

---

\* 26:63: Ais 53:7; Md 27:12      \* 26:64: Same 110:1; Dan 7:13; Md

24:30      \* 26:65: Md 9:3; Ion 10:33      \* 26:66: Luvi 24:16; Ion 19:7

\* 26:67: Ais 50:6; 53:5

*Fita Ieisu vegeqea*

(*Maki 14:66-72; Luke 22:56-62; Ioni 18:15-18,25-27*)

<sup>69</sup> Fita nawale toatoa 'ebekotu di'wenaya, 'inega tofewa iahaba taha 'ifoqe mai ta vetala'aiea vonaya, "O'a wese lova Ieisu Galili 'olotona maega oluluyaba dadana, waisa?"

<sup>70</sup> Ta tomotau qabudi matadia Fita vegeqa vonaya, "Ba'e yani nana uveveqaevea ya'a ge eda alamaniamania."

<sup>71</sup> 'Inega 'ifoqe masu'edanaya ta taha wese iahaba 'itea Fita 'inega vonaya, "Oloto omo'e lova Ieisu Nasaleta 'olotona maega itoatoa."

<sup>72</sup> 'Inega wese Fita vegeqa ta 'awatamatamana vonaya, "Ba'e 'oloto nana ya'a ge eda alamaniamania."

<sup>73</sup> Ge tuta kuena 'abibodanaya vaina 'oloto itovotovolo Fita di'wenaya ta ivoneaya, "Vonahaqiaqi, o'a Ieisu taha ena tomotau, mana bonau ana noqola kavona me Galili bonadi."

<sup>74</sup> 'Inega Fita vonaya, "Tamada! 'Oloto ba'e ya'a ge eda alamaniamania! 'Eguma egu vona ge vonahaqiaqi nawale Yaubada naluvematasabugu."

Tuta omo'e 'inaya kamukamu dou.

<sup>75</sup>\* 'Inega Fita Ieisu ena vona nuaia, "O'a nawale tuta toi ana yau una vegeqegu, ta 'abiboda kamukamu nadou." 'Inega Fita me ena nuavita 'ifoqe 'abagaya ta dou.

**27***Ieisu itauyea Failato matanaya*

(*Maki 15:1; Luke 23:1-2; Ioni 18:28-32*)

---

\* **26:75:** Md 26:34

<sup>1</sup> Ni'a mahala vulihia 'inega toveguba qiduqid-uadi wese 'abaga ana tovanugwetayavo qabudi iluvine vonigo Ieisu ina luve'aligia.

<sup>2</sup> Inega Ieisu nimana iyoqonia itauyea me Loma edi gavana Failato 'inaya nuanuadi ina keiea be liuna ina baia ta Ieisu naluvinei 'aliga 'inaya.

*Iudasa ena 'aliga*  
(Viaqa 1:18-19)

<sup>3</sup> Tuta nana Iudasa nuana 'eqa'uya vonigo Ieisu ina luve'aligia, 'inega nuagivila ta nuanuana siliba 30 dina nanei 'eviviedi toveguba qiduqid-uadi be 'abaga ana tovanugwetayavo 'idia,

<sup>4</sup> 'inega tauya 'idia ta vonaya, "luveifana ni'a yaviaqia, mana 'oloto aqiaqina yasuluvea 'imia."

Ta ivona 'eviviea, "Ima'a ge taha ada nuanua ba'e yani nana weaqina, ta 'esi o'a tau'u eu luveifana weaqina una nuanua."

<sup>5</sup> \* 'Inega Iudasa siliba 30 dina feledi Vanue Gwalagwalana gamonaya, ta 'ifoqe tauya 'inega taunega magana sikwea 'abo 'aliga.

<sup>6</sup> Toveguba qiduqiduadi siliba dina igwagwedi ivonaya, "Ge ana fata be ba'e siliba dina kana a'udi mane ana 'ebeluveaqe 'inaya, mana luvine 'eno'eno vonaya vonigo mane luve'aliga 'inega ge ana fata be kana vefewei Vanue Gwalagwalana weaqina."

<sup>7</sup> Ta edi veqae 'abibodanaya iluvine be mane nana 'inega taha to'abi 'ulena ena bwa'obwa'o ina gimwane, ta bwa'obwa'o nana wagawaga adi deba'unu weaqidi.

---

\* 27:5: Via 1:18-19; Md 26:14-15

8 'Inega bwa'obwa'o nana igabea Sulala Bwa'obwa'ona, ta wawa nana nawale 'eno'eno.

9\* Omo'e 'inega tovesimasimana Ielemaia ena vona ana aqiaqi 'ifoqe, mana lova Buki Nugwenugweina 'inaya vonaya,

“Me Isileli tauna ana ve'ia ia'uya siliba adi yau 30 'idewani. Ta mane nana i'ewedi,

10 'inega to'abi 'ulena ena bwa'obwa'o igimwaneana, 'idewani egu Kaiwabu ena vematamagilafu 'iguya.”

*Failato Ieisu vetala'aiea*

*(Maki 15:2-5; Luke 23:3-5; Ioni 18:33-38)*

11 'Inega Ieisu me Loma edi gavana Failato 'iawanaya tovolu ta Failato vetala'aiea vonaya, “Uvonegu, nage o'a me Diu edi Kini?”

'Inega Ieisu vonaya, “Ni'a uvona 'idewani.”

12\* 'Inega toveguba qiduquduadi wese 'abaga ana tovanugwetayavo Ieisu ive'eweana Failato matanaya, ta Ieisu ge taha tola'ai weaqina davona 'eviviedi.

13 'Inega Failato vonaya, “Ma'oda, nage edi ve'ewa 'iuya unoqolia?”

14 Ta Ieisu ge taha tola'ai davonei edi ve'ewayavo weaqina, 'inega Failato nuana voqana qiduana.

*Failato Ieisu awafelea ina luve'aligia*

*(Maki 15:6-15; Luke 23:13-25; Ioni 18:39-19:16)*

15 Ya'wala 'aidega 'aidega 'idia 'Auvivia Sagalina 'inaya gavana ena ilivu ba'e 'idewani: Tomotau qabudi luaqiaqiedi be taha tomotau ina venua'ivinea be na'ifoqe vanue 'ebeyoqona

\* 27:9: Sek 11:12-13 \* 27:12: Ais 53:7

'inega, e 'inega gavana nana tomotauna nayavua naha'u'ifoqeyea 'idia.

<sup>16</sup> Tuta ba'e 'inaya 'oloto taha vanue 'ebeyoqona 'inaya toatoa ana wawa Balabasi, ta tomotau qabudi ni'a ialamania tauna 'oloto veifa otaqina.

<sup>17</sup> 'Inega tomotau iva'auta ta Failato vetala'aiedi vonaya, "To'oloto nuanuami ena yavui weaqimi, nage Balabasi nage Ieisu tauna igabea To'etoyavua?"

<sup>18</sup> \* Ta Failato ena vetala'ai ba'e 'iuna, mana ni'a alamani aqiaqiea Ieisu ive'ifi'ifiea, 'inega ikafia ta imiea 'inaya sabi luvinema.

<sup>19</sup> Tuta nana Failato nawale toatoa 'ebevekotu ana 'ivi 'inaya ta qabu diavona vevetala'aiedi, ta 'inega moqanena vale ivetunei ivonaya, "Ge taha tola'ai una viaqi ba'e 'oloto nana 'inaya, mana velovanaya ve'wayoqega visiqa qidwana yalutonovia weaqina, 'inega yahalamania tauna toatoa maiqina."

<sup>20</sup> Ta toveguba qiduqiduadi be wese 'abaga ana tovanugwetayavo qabu diavona iluvetuvetunedi ina venoqi Failato 'inaya be Balabasi nayavui 'idia ta 'esi Ieisu 'aliga nalobea.

<sup>21</sup> 'Inega Failato qabu diavona wese vetala'aiedi, "Magilafudi 'idiega togama nuanuami ena yavui weaqimi?"

'Inega ivoneaya, "Nuanuama Balabasi!"

<sup>22</sup> Ta Failato vonaya, "Tola'ai ena viaqi Ieisu 'inaya, tauna igabea To'etoyavua?"

'Inega tomotau qabudi ena vona ive'evivia ivonaya, "Etoluai 'inaya kana tutuve'ewe!"

---

\* **27:18:** Ion 11:47-48; 12:19

23 'Inega Failato vonedi, “Tola'ai ena luveifana 'inega na'aliga?”

Ta qabu diavona ikolua qiduana ivonaya, “Etoluai 'inaya kana tutuve'ewea!”

24 \* 'Inega Failato tawa alamania ge ana fata be qabu diavona nuadi nagivilei, mana 'itedi Iesu ena 'aliga weaqina i'alaweloweloloyea be tuta goyona vedavi na'ifoqe. 'Inega go'ilega nimana 'utuya qabu dina matadia 'abo vonaya, “Ge taha wese vona ena 'inanei 'imia ba'e 'oloto nana ena 'aliga weaqina. 'Inega ya'a toatoa maiqigu, ta 'esi taumiega ona luvinea.”

25 \* Ta qabudi ivonaya, “Ta'iwa, ena 'aliga ana vita ima'a natumavo maega ana 'avalea.”

26 'Inega Failato Balabasi yavuaia 'idia, ta Iesu ve'ineiea ena toluaviayavo 'idia ta vonedi wayo metametanega ina vunuqa dadanea, ta 'abiboda ina tutuve'ewea 'etoluai 'inaya.

*Toluaviayavo Iesu igivenu'wea  
(Maki 15:16-20; Ioni 19:2-3)*

27 'Inega gavana Failato ena toluaviayavo Iesu itauyea edi 'ebetoa 'inaya, ta ediavo qabudi igaba va'auqidi imai Iesu itovolo vivilia.

28 \* 'Inega ana kaleko ivaulia ta kaleko bweab-weala otaqina ivekalekoya,

29 ta ana biatuli talitaliega iviaqia 'inega 'unu'ununaya ia'uya, ta kewala ana 'ataqiega ivekafia ta wese 'iawanaya tuqatuqadiega isobadi ta igivenu'wea ivonaya, “Kaiwa, o'a me Diu edi Kini Qiduana.”

---

\* 27:24: Luve 21:6-9      \* 27:25: Via 5:28      \* 27:28: Lk 23:11



30 \* E wese igida'wea be ena kewala i'ewea 'inega 'unu'ununa ivunuqia.

31 'Inega igivenu'wei gumwala 'abo kaleko bwe-abwealina ivata'ia ta ana kalekoyega ivekaleko 'eviviea, 'inega itauyea sabi tutuve'ewana.

*Isisu itutuve'ewea 'etoluai 'inaya*

*(Maki 15:21-32; Luke 23:26-43; Ioni 19:17-27)*

32 Tuta nana Isisu i'ifoqeyei ta itautauyea 'edaye e 'inega Sailini 'olotona taha ana wawa Saimoni ilobea, ta iluvetunei be Isisu ana 'etoluai na'avalea.

33 'Inega 'avalea ana laba i'ifoqe 'abaga Goligota 'inaya, ta Goligota ana givila "Unu'unu ana 'abaga".

34 \* 'Inega 'oine be taha yani yuyuna maega iwayavilea ta Isisu ineia vonigo danuma, ta 'alatonovia 'inega nogea.

35 \* 'Inega 'etoluai 'inaya Isisu itutuve'ewea. 'Abibodanaya toluaviayavo Isisu ana kaleko i'ewedi ta nuanidia taha laha iviaqia be togama nanugweta 'inega kaleko nana na'ewedi.

36 E 'abiboda omo'e 'inaya itoabui ta Isisu i'itamakia.

37 Ta ana 'etoluai debanaya ena 'aliga 'iuna i'wayavia ba'e 'idewani,

BA'E IESU TAUNA ME DIU EDI KINI

38 \* Ta wese tovanawala magilafudi Isisu maega itutuve'ewedi, taha ana 'ataqiega ta taha ana keliegea.

---

\* 27:30: Ais 50:6      \* 27:34: Same 69:21      \* 27:35: Same 22:18

\* 27:38: Ais 53:12

39 \* 'Inega tomotau ivevedelideli ta Ieisu idagidagiei ta wese ivevegilea ivonaya,

40 \* "O'a uvona vonigo Vanue Gwalagwalana una qeunia, ta 'aubena toi 'inaya wese una yoqona 'eviviea. Ta 'eguma o'a Yaubada Natuna 'inega tau'uyega una 'etoyavui ta 'etoluaiega una webui mai."

41 Wese 'idewanina toveguba qiduqiduadi be luvine ana tove'itayavo ta wese 'abaga ana tovanugwetayavo Ieisu igivenu'wea ivonaya,

42 "Tauna mali tomotau 'etoyavuidi ta taunega ge ana fata na'etoyavui. 'Eguma tauna vonahaqiaqi me Isileli edi Kini, 'inega 'etoluaiega nawebui mai e 'inega kana vetumaqanea.

43 \* Tauna vonigo Yaubada 'inaya vetumaqana ta vonaya, 'Ya'a Yaubada Natuna', 'inega ka'itei nage Yaubada na'awahaqiaqiei be na'etoyavua, waisa?"

44 Ta tovanawala dina Ieisu maega ni'a itu-tuve'ewedi, taudi wese 'idewani igivenu'wea.

### *Ieisu ena 'aliga*

*(Maki 15:33-41; Luke 23:44-49; Ioni 19:28-30)*

45 Baba'auyega be ana laba baba'au yewavilea 'inaya 'abaga qabuna velovana bodea.

46 \* 'Inega 3 koloki 'idewani Ieisu bonana qiduanega gaba vonaya, "*Eloi, Eloi, lama sabakitani?*"

Ta ana givila vonaya, "*Egu Yaubada, egu Yaubada, tola'ai weaqina unogegu?*"

---

\* 27:39: Same 22:7; 109:25      \* 27:40: Md 26:61; Ion 2:19

\* 27:43: Same 22:8      \* 27:46: Same 22:1

47 'Inega vaina tomotau di'wenaya itovotovololo ena gaba inoqolia e ivonaya, "Onoqoli, 'oloto ba'e Ilaitia gabegabea."

48 \* 'Inega taha 'idiega lukwayavoni vihila kik-ifa 'ewei ta 'oine yuyuna 'inaya 'aubwa'ui, 'inega taha 'aiwe 'inaya 'idawayea ta ve'etovaneyea Ieisu 'awanaya vonigo davenumea.

49 Ta enavo ivonaya, "Ta'iwa, ta kana ba'e tonova, nage Ilaitia namai na'etoyavua."

50 'Inega Ieisu wese bonana agonega gaba 'evivi 'abo yawaina gumwala.

51 \* Ta tuta nana Ieisu yawaina gumwala, 'inega Vanue Gwalagwalana gamonaya 'awa ana bag-ina kaleko eabu magilafuyea debanega be webui 'ayanaya ta wese mwani'ini'i veni'i, 'inega dabo qiduquadi fisala yavuledi,

52 ta wese deba'unu 'awadi 'elu'eqauya. Ta tovetumaqana 'eala lova yawaidi gumwala mayawaidi iya'itoto 'evivi.

53 'Inega Ieisu ena ya'itoto 'evivi 'abibodanaya toya'itoto 'evivi dina wese 'abaga gwalagwalana Ielusalema 'inaya ilugu, ta tomotau 'eala i'itedi.

54 Toluavia dina me edi tovanugweta nawale Ieisu i'ita'itamakia ta tuta nana mwani'ini'i be yani qabuna i'ifoqe, 'inega imwaniniva qiduana ta ivonaya, "Vonahaqiaqi, 'oloto ba'ena Yaubada Natu Otaqina."

55 \* Ta vivine 'eala ba'e yani diavona luluvaiega ivevekovedi, taudi lova Galiliega Ieisu i'abibodea ana toiulayavo 'idewani.

---

\* 27:48: Same 69:21

\* 27:51: 'Ifo 26:31-33; Ibe 10:19-20

\* 27:55: Lk 8:2-3

56 Vivine diavona 'idiega taha ana wawa Meli Magidala, ta wese taha Meli taudi Iemesa ma taina Iosefa inadi. Ta wese Sebedi moqanena maega ivevekova.

*Jeisu itavunia*

*(Maki 15:42-47; Luke 23:50-56; Ioni 19:38-42)*

57 Ni'a velavilaviea 'inega taha 'oloto kaikai-wabuna ana wawa Iosefa 'ifoqe, tauna Alimatia 'olotona ta wese Jeisu ana to'abiboda.

58 \* 'Inega Iosefa tauya gavana Failato 'inaya, ta venoqiea Jeisu 'wafina weaqina. 'Inega Failato awafela ta ena toluaviayavo vonedi Jeisu 'wafina ina neia.

59 'Inega Iosefa ma enavo Jeisu 'wafina i'ewea ta kaleko kuena ta wadawadaeana 'inega iumea.

60 \* 'Inega Iosefa nana ana deba'unu 'evauna 'inaya Jeisu a'uya. Ta deba'unu nana lova dabo 'inaya alea ana 'ita kavona vetoa. A'u gumwala, 'inega dabo 'ena'ina ta beabeana 'inega deba'unu nana 'aubodea, ta 'abibodanaya tauya.

61 Ta Meli Magidala ma waviana deba'unu nana di'wenaya itoabui ta ivevekova.

*Deba'unu i'itamakia*

62 Jeisu itutuve'ewea me Diu edi 'aubena 'iva'ava'ata 'inaya. Ta mahala vulihia 'inega edi 'aubena tafwalolo 'inaya toveguba qiduqiduadi ta wese Falisiavo itauya gavana Failato 'inaya sabi 'itana,

---

\* 27:58: Luve 21:22-23 \* 27:60: Ais 53:9

63 \* ta ivoneaya, “Kaiwabu, tou’ava nana lova tuta nana nawale mayawaina toatoa ena vona an-uave’avinia vonaya, “Aubena toi ’abibodanaya ’aligega ena ya’itoto ’evivi.’

64 ’Inega nage ana fata be toluaviayavo una lu-vetunedi be deba’unu nana ina ’itamaki aqiaqiea ana laba ’aubena toi ina gumwala, fole Ieisu ana to’abibodayavo ina mai be ’wafina ina vanawali, e ’inega tomotau ina u’avedi vonigo Ieisu ’aligega tawa ya’itoto ’evivi. ’Inega ba’e u’ava nana u’ava nugwenugweina naveqidua va’inea.”

65 Failato edi nuanua ’awahaqiaqiea, ’inega vonedia, “Emi to’itamakiavo egu toluavia ’idiega ona ’ewedi ona tauyedi be deba’unu nana ina ’itamaki aqiaqiea.”

66 ’Inega taudi Falisi be toveguba ta wese tolu-avia itauya deba’unu nana ’inaya ta ’awana ana ’auboda ’inaya taha ’ebe’ita ia’uya ’inega ge taha toga ana fata ’auboda nana nagitonovi. ’Inega tolu-avia dina ivetovolodi deba’unu nana ’inaya be ina ’itamaki aqiaqiea, ’abo itauya.

## 28

*Ieisu ya’itoto ’evivi ’aligega*

*(Maki 16:1-10; Luke 24:1-12; Ioni 20:1-10)*

<sup>1</sup> Me Diu edi Sabate tawa gumwala, ’inega wiki ana ’aubena nugweta ’inaya ’awa’awai otaqaya Meli Magidala ma waviana iya’itoto itauya Ieisu ana deba’unu sabi ’itana.

<sup>2</sup> ’Inega mwani’ini’i qiduana ’ifoqe, mana Kai-wabu ena tovale’ewa mahalega webui mai ta

---

\* **27:63:** Md 12:40; 16:21; Mk 9:31; 10:33-34; Lk 9:22; 18:31-33; Ion 2:19-21

deba'unu ana 'auboda dabo 'uvekawawa naqoyei, 'inega vane debanaya toabui.

<sup>3</sup> Ta tovale'ewana ana 'ita kavonaya namala 'wai'waia be wese ana kaleko wadawadaea otaqina.

<sup>4</sup> Deba'unu ana to'itamakiavo tovale'ewa nana i'itea 'inega giwalidi a'ala ta idedela igivelukabwebwe bwa'obwa'oya adi 'ita kavona ida 'aliga 'idewani.

<sup>5</sup> 'Inega tovale'ewa nana vivine magilafudi vonedi vonaya, "Ge ona mwaniniva! Ni'a yahalamaniana omi'a Ieisu osalisalia tauna itutuve'ewea 'etoluai 'inaya.

<sup>6</sup> \* Ta tauna ge ba'idia, ta 'esi ni'a ya'itoto 'evivi 'aligege, lova ena vona 'idewani. Omai o'itei ana 'ivimo.

<sup>7</sup> Ta ona lukwayavoni ona tauya ana to'abibodayavo ona vonedi, 'Ieisu ni'au 'aligege ya'itoto 'evivi, ta nanugweta di'we Galili 'inaya ta omi'a ona 'abiboda, ta omo'e 'inaya ona 'itea'. Tola'ai ni'a yavonemi e ona nuave'avinia."

<sup>8</sup> 'Inega vivine dina ilukwayavoni deba'unu ino-gea ta me edi mwaniniva ta wese me edi qaiawa itauya Ieisu ana to'abibodayavo 'idia sabi vonadi.

<sup>9</sup> Nawale itautauya, 'inega Ieisu 'ifoqe 'idia vonaya, "Kaiwa." 'Inega inaqo 'inaya ta tuqatuqadiega isobadi ta 'aqenaya ikafi ta ihiwa'odu 'inaya.

<sup>10</sup> \* Ta Ieisu vonedi vonaya, "Ge ona mwaniniva, ta ona tauya egwavo 'idia be ona vematamagilafuyedi ina tauya Galili 'inaya, be omo'e 'inaya ina 'itegu."

---

\* 28:6: Md 12:40; 16:21      \* 28:10: Md 26:32

*Deba'unu ana to'itamaki edi vematamagilafu*

<sup>11</sup> Vivine dina nawale itautauya 'edaya ta deba'unu ana to'itamaki vaina itauya 'abaga Ielusalema 'inaya, ta tola'ai ni'a 'ifoqe i'itea wese ivematamagilafu toveguba qiduqiduadi 'idia.

<sup>12</sup> 'Inega tovegubayavo ta wese 'abaga ana tovanugwetayavo itoava'auta adi 'aidega idima govaqa, 'abo mane 'ena'ina deba'unu ana to'itamakiavo ineidi,

<sup>13</sup> ta ivonedi ivonaya, "Tomotau ona vonedi ona vonaya, 'Velovelovanaya a'eno motaiva a'eno'eno ta 'inega Ieisu ana to'abibodayavo imai ta 'wafina ivanawalia!" "

<sup>14</sup> Ta wese ivonedi ivonaya, "Eguma gavana Failato vale ba'e nanoqolia nawale ana u'avea 'inega ge diana navilei 'imia."

<sup>15</sup> 'Inega to'itamaki edi mane i'ewei ta tovegubayavo be wese 'abaga ana tovanugwetayavo edi nuanua i'abibodea. 'Inega ba'e u'ava nana Ieisu 'wafina weaqina valena yawala dadana me Diu 'idia, ta ba'itaga wese 'idewani ivonavona dadanea.

*Ieisu ana to'abibodayavo adi veyoveyoa neidi*

<sup>16</sup> \* 'Inega Ieisu ana to'abibodayavo adi yau leveni itauya Galili 'inaya 'abo bwanagana Ieisu ni'a vetalatutulea 'inaya i'watovu.

<sup>17</sup> Ta tuta nana Ieisu i'itea 'inega ihiwa'odu 'inaya. Ta vaina 'idiega nawale me edi venuana magilafu.

<sup>18</sup> \* 'Inega Ieisu mai di'weddia ta vonedi vonaya, "Tamagu ena waiwai ta ena luvine ni'a neigu be

---

\* **28:16:** Md 26:32      \* **28:18:** Ion 13:3; Efe 1:20-22

yani qabuna mahalaya ta wese bwa'obwa'oya ena luvinedi.

<sup>19</sup>\* 'Inega ona tauya di'we qabuna 'idia ona luga'ih'i tomotau 'idia be ina veto'abiboda weaqigu. Ta wese ona givebabitaisodi Tamagu ana wawega be Natuna ya'a agu wawega ta wese Niboana Gwalagwalana ana wawega.

<sup>20</sup> Ta luvine qabudi ni'a yaneimi ona ve'itedi ta ina matayagedi. Vonahaqiaqi, ya'a tuta qabuna omi'a maega kana toatoa ana laba bwa'obwa'o ana 'ebelu'ovoa 'inaya."

---

\* **28:19:** Mk 16:15-16; Via 1:8



**Molima New Testament**  
**The New Testament in the Molima Language of Papua**  
**New Guinea**  
**Nupela Testamen long tokples Molima long Niugini**

copyright © 2010 Folk&Språk and Swedish Mission Alliance

© 2010 Folk&Språk and Swedish Mission Alliance

Language: Molima

Translation by: Folk&Språk

Contributor: The Molima Translation Committee

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

---

PDF generated using Haiola and XeLaTeX on 18 Apr 2025 from source files dated 9 Oct 2020

fa4298de-51e6-508c-88a7-73c29a6d8004